



ସ୍ତ୍ରୀବିକଳା ମହାପଦ୍ମ

ବିଦାନବିକଳା



কপালকুণ্ডলা

বঙ্কিমচন্দ্র চট্টোপাধ্যায়



আদিত্য প্রকাশালয়

২৮/১, জাস্টিস মন্ডল কুশালী রো, কলিকাতা-৯



দ্বিতীয় মদ্রণ :
জুলাই, ১৯৫৯

প্রকাশক :
শ্রীহরিপদ বিশ্বাস
আদিত্য প্রকাশালয়
২৮/১, জাস্টিস মন্মথ মদখাজী রো,
কলিকাতা-৭০০ ০০৯

মদ্রাকর :
শ্রীসদনীলকুমার ভাণ্ডারী
জগদ্ধাত্রী প্রিন্টার্স
৫৯/২, পটুয়াটোলা কলন
কলিকাতা-৭০০ ০০৯

କପାଳକୁଂଳା

কপালকুণ্ডলা

প্রথম খণ্ড

প্রথম পরিচ্ছেদ : সাগরসঙ্গমে

“Floating straight obedient to the stream.”

Comedy of Errors

প্রায় দুই শত পঞ্চাশ বৎসর পূর্বে এক দিন মাঘ মাসের রাত্রিশেষে একখানি যাত্রীর নৌকা গঙ্গাসাগর হইতে প্রত্যাগমন করিতেছিল। পতুর্গিস্ ও অন্যান্য নাবিকদস্যদিগের ভয়ে যাত্রীর নৌকা দলবদ্ধ হইয়া যাতায়াত করাই তৎকালের প্রথা ছিল ; কিন্তু এই নৌকারোহীরা সঙ্গহীন। তাহার কারণ এই যে, রাত্রিশেষে ঘোরতর কুজ্ঝটিকা দিগন্ত ব্যাপ্ত করিয়াছিল ; নাবিকেরা দিগ্‌নিরূপণ করিতে না পারিয়া বহর হইতে দূরে পড়িয়াছিল। এক্ষণে কোন্ দিকে কোথায় যাইতেছে, তাহার কিছুই নিশ্চয়তা ছিল না। নৌকারোহিগণ অনেকেই নিদ্রা যাইতেছিলেন। একজন প্রাচীন এবং একজন যুবা পুরুষ, এই দুই জন মাত্র জাগ্রত অবস্থায় ছিলেন। প্রাচীন যুবকের সহিত কথোপকথন করিতেছিলেন। বারেক কথাবার্তা স্থগিত করিয়া বৃদ্ধ নাবিকদিগকে জিজ্ঞাসা করিলেন, “মাঝি, আজ কত দূর যেতে পারবি ?” মাঝি ইতস্ততঃ করিয়া বলিল, “বলিতে পারিলাম না।”

বৃদ্ধ ক্রুদ্ধ হইয়া মাঝিকে তিরস্কার করিতে লাগিলেন। যুবক কহিলেন, “মহাশয়, যাহা জগদীশ্বরের হাত, তাহা পশ্চিতে বলিতে পারে না—ও মূর্থ কি প্রকারে বলিবে ? আপনি ব্যস্ত হইবেন না।”

বৃদ্ধ উগ্রভাবে কহিলেন, “ব্যস্ত হব না ? বল কি, বেটারা বিশ পঁচিশ বিঘার ধান কাটিয়া লইয়া গেল, ছেলোপিলে সম্বৎসর খাবে কি ?”

এ সংবাদ তিনি সাগরে উপনীত হইলে পরে পশ্চাদাগত অন্য যাত্রীর মুখে পাইয়াছিলেন। যদ্বা কহিলেন, “আমি ত পদ্বেশ্বই বলিয়াছিলাম, মহাশয়ের বাটীতে অভিভাবক আর কেহ নাই—মহাশয়ের আসা ভাল হয় নাই।”

প্রাচীন পদ্বেশ্ববৎ উগ্রভাবে কহিলেন, “আসব না? তিন কাল গিয়ে এক কালে ঠেকেছে। এখন পরকালের কৰ্ম করিব না ত কবে করিব?”

যদ্বা কহিলেন, “যদি শাস্ত্র বদ্বিষা থাকি, তবে তীর্থদর্শনে সেরূপ পরকালের কৰ্ম হয়, বাটী বসিয়াও সেরূপ হইতে পারে।”

বদ্বশ্ব কহিলেন, “তবে তুমি এলে কেন?”

যদ্বা উত্তর করিলেন, “আমি ত আগেই বলিয়াছি যে, সমুদ্র দেখিব বড় সাধ ছিল, সেই জন্যই আসিয়াছি।” পরে অপেক্ষাকৃত মৃদু স্বরে কহিতে লাগিলেন, “আহা! কি দেখিলাম! জন্মজন্মান্তরেও ভুলিব না।

“দূরাদয়শচক্ৰনিভস্য তন্বী

তমালতালীবনরাজিনীলা।

আভাতি বেলা লবণাম্বুরাশে-

ধ্বারানিবন্ধেব কলংকরেথা ॥”

বদ্বেশ্বের শ্রুতি কবিতার প্রতি ছিল না, নাবিকেরা পরস্পর যে কথোকথন করিতেছিল, তাহাই একতামনা হইয়া শ্রুনিতেছিলেন।

একজন নাবিক অপরকে কহিতেছিল, “ও ভাই—এ ত বড় কাজটা খারাবি হলো—এখন কি বার-দরিয়ায় পড়িলেম—কি কোন্ দেশে এলেম, তা যে বদ্বিষতে পারি না।”

বস্তুর স্বর অত্যন্ত ভয়কাতর। বদ্বশ্ব বদ্বিলেন যে, কোন বিপদ আশঙ্কার কারণ উপস্থিত হইয়াছে। সশঙ্কচিত্তে জিজ্ঞাসা করিলেন, “মাঝি, কি হয়েছে?” মাঝি উত্তর করিল না। কিন্তু যদ্বক উত্তরের প্রতীক্ষা না করিয়া বাহিরে আসিলেন। বাহিরে আসিয়া দেখিলেন যে, প্রায় প্রভাত হইয়াছে। চতুর্দিক অতি গাঢ় কুজ্জ্বাটিকায় ব্যাপ্ত

হইয়াছে ; আকাশ, নক্ষত্র, চন্দ্র, উপকূল, কোন দিকে কিছ্ই দেখা যাইতেছে না । বৃদ্ধিলেন, নাবিকদের দিগ্ভ্রম হইয়াছে । এক্ষণে কোন দিকে যাইতেছে, তাহার নিশ্চয়তা পাইতেছে না—পাছে বাহির-সমুদ্রে পড়িয়া অকূলে মারা যায়, এই আশঙ্কায় ভীত হইয়াছে ।

হিমনিবারণ জন্য সম্মুখে আবরণ দেওয়া ছিল, এজন্য নৌকার ভিতর হইতে আরোহীরা এ সকল বিষয় কিছ্ই জানিতে পারেন নাই । কিন্তু নব্য যাত্রী অবস্থা বৃদ্ধিতে পারিয়া বৃদ্ধকে সর্বিশেষ কহিলেন ; তখন নৌকামধ্যে মহাকোলাহল পড়িয়া গেল । যে কয়েকটি স্ত্রীলোক নৌকামধ্যে ছিল, তন্মধ্যে কেহ কেহ কথার শব্দে জাগিয়াছিল, শূনিবামাত্র তাহারা আন্তর্নাদ করিয়া উঠিল । প্রাচীন কহিল, “কেনারায় পড় ! কেনারায় পড় ! কেনারায় পড় !”

নব্য ঈষৎ হাসিয়া কহিলেন, “কেনারা কোথা, তাহা জানিতে পারিলে এত বিপদ হইবে কেন ?”

ইহা শূনিয়া নৌকারোহিদিগের কোলাহল আরও বৃদ্ধি পাইল । নব্য যাত্রী কোন মতে তাহাদিগকে স্থির করিয়া নাবিকদিগকে কহিলেন, “আশঙ্কার বিষয় কিছ্ই নাই, প্রভাত হইয়াছে—চারি পাঁচ দণ্ডের মধ্যে অবশ্য সুবোধ্য হইবে । চারি পাঁচ দণ্ডের মধ্যে নৌকা কদাচ মারা যাইবে না । তোমরা এক্ষণে বাহন বন্ধ কর, স্রোতে নৌকা ষথায় যায় যাক্ ; পশ্চাৎ রোদ্দ হইলে পরামর্শ করা যাইবে ।

নাবিকেরা এই পরামর্শে সন্মত হইয়া তদনুরূপ আচরণ করিতে লাগিল ।

অনেকক্ষণ পর্য্যন্ত নাবিকেরা নিশ্চেষ্ট হইয়া রহিল । যাত্রীরা ভয়ে কণ্ঠাগতপ্রাণ । বেশী বাতাস নাই । সূত্রাং তাহারা তরঙ্গাশ্বেদালনকম্প বড় জানিতে পারিলেন না । তথাপি সকলেই মৃত্যু নিকট নিশ্চিত করিলেন । পুরুষেরা নিঃশব্দে দুর্গানাম জপ করিতে লাগিলেন, স্ত্রীলোকেরা সূর তুলিয়া বিবিধ শব্দবিন্যাসে কাঁদিতে লাগিল । একটি স্ত্রীলোক গঙ্গাসাগরে সস্তান বিসর্জন

করিয়া আসিয়াছিল, ছেলে জলে দিয়া আর তুলিতে পারে নাই,—
সেই কেবল কাঁদিল না ।

প্রতীক্ষা করিতে করিতে অনুভবে বেলা প্রায় এক প্রহর হইল ।
এমত সময়ে অকস্মাৎ নাবিকেরা দরিয়ার পাঁচ পীরের নাম কর্ত্তন
করিয়া মহাকোলাহল করিয়া উঠিল । যাত্রীরা সকলেই জিজ্ঞাসা
করিয়া উঠিল, “কি ! কি ! মাঝি, কি হইয়াছে ? মাঝিরাও
একবাক্যে কোলাহল করিয়া কহিতে লাগিল, “রোদ উঠেছে ! রোদ
উঠেছে ! ঐ দেখ ডাঙ্গা !” যাত্রীরা সকলেই ঔৎসুক্যসহকারে
নৌকার বাহিরে আসিয়া কোথায় আসিয়াছেন, কি বৃত্তান্ত, দেখিতে
লাগিলেন । দেখিলেন, সূর্য্যপ্রকাশ হইয়াছে । কুজ্জ্বাটিকার
অন্ধকাররাশি হইতে দিগ্‌মণ্ডল একেবারে বিমুক্ত হইয়াছে । বেলা
প্রায় প্রহরাতীত হইয়াছে । যে স্থানে নৌকা আসিয়াছে, সে প্রকৃত
মহাসমুদ্র নহে, নদীর মোহনা মাত্র, কিন্তু তথায় নদীর ঘেরূপ বিস্তার,
সেরূপ বিস্তার আর কোথাও নাই । নদী এক কুল নৌকার অতি
নিকটবর্ত্তী বটে, এমন কি, পঞ্চাশৎ হস্তের মধ্যগত, কিন্তু অপর কুলের
চিহ্ন দেখা যায় না । আর যে দিকেই দেখা যায় অনন্ত জলরাশি চঞ্চল
বারিষ্মিমালাপ্রদীপ্ত হইয়া গগনপ্রান্তে গগনসহিত মিশিয়াছে । নিকটস্থ
জল, সচরাচর সন্দর্ভ নদীজলবর্ণ ; কিন্তু দূরস্থ বারিরাশি নীলপ্রভ ।
আরোহীরা নিশ্চিত সিদ্ধান্ত করিলেন যে, তাঁহারা মহাসমুদ্রে আসিয়া
পড়িয়াছেন ; তবে সৌভাগ্য এই যে, উপকূল নিকটে, আশঙ্কার বিষয়
নাই । সূর্য্যপ্রতি দৃষ্টি করিয়া দিক্‌নিরূপিত করিলেন । সম্মুখে
যে উপকূল দেখিতেছিলেন, সে সহজেই সমুদ্রের পশ্চিম তট বলিয়া
সিদ্ধান্ত হইল । তটমধ্যে নৌকার অনতিদূরে এক নদীর মূখ
মন্দগামী কলধৌতপ্রবাহবৎ আসিয়া পড়িতেছিল । সন্মুখস্থ দাক্ষিণ
পার্শ্বে বৃহৎ সৈকতভূমিখণ্ডে নানাবিধ পক্ষিগণ অগণিত সংখ্যায়
ক্বীড়া করিতেছিল । এই নদী এক্ষণে “রসূলপুত্রের নদী” নাম
ধারণ করিয়াছে ।

দ্বিতীয় পরিচ্ছেদ : উপকূলে

“Ingratitude ! Thou marble-hearted fiend !—”

King Lear

আরোহীদের স্মৃতিব্যঞ্জক কথা সমাপ্ত হইলে, নাবিকেরা প্রস্থাব করিল যে, জোয়ারের বিলম্ব আছে,—এই অবকাশে আরোহিগণ সম্মুখস্থ সৈকতে পাকাদি সমাপন করুন, পরে জলোচ্ছ্বাস আরম্ভেই স্বদেশাভিমুখে যাত্রা করিতে পারিবেন। আরোহিবর্গও এই পরামর্শে সম্মতি দিলেন। তখন নাবিকেরা তরি তীরলগ্ন করিলে আরোহিগণ অবতরণ করিয়া স্নানাদি প্রাতঃকৃত্য সম্পাদনে প্রবৃত্ত হইলেন।

স্নানাদির পর পাকের উদ্যোগে আর এক নূতন বিপত্তি উপস্থিত হইল—নৌকায় পাকের কাষ্ঠ নাই। ব্যস্তভয়ে উপর হইতে কাষ্ঠ সংগ্রহ করিয়া আনিতে কেহই স্বীকৃত হইল না। পরিশেষে সকলের উপবাসের উপক্রম দেখিয়া প্রাচীন, প্রাগদুস্ত যুবাকে সম্বোধন করিয়া কহিলেন, “বাপু নবকুমার ! তুমি ইহার উপায় না করিলে আমরা এতদূর লোক মারা যাই।”

নবকুমার কিঞ্চিৎ কাল চিন্তা করিয়া কহিলেন, “আচ্ছা যাইব ; কুড়ালি দাও, আর দা লইয়া একজন আমার সঙ্গে আইস।”

কেহই নবকুমারের সহিত যাইতে চাহিল না।

“খাবার সময় বন্ধা যাবে” এই বলিয়া নবকুমার কোমর বাঁধিয়া একাকী কুঠার হস্তে কাষ্ঠাহরণে চলিলেন।

তীরোপরি আরোহণ করিয়া নবকুমার দেখিলেন যে, যতদূর দৃষ্টি চলে, তত দূর মধ্যে কোথাও বসতির লক্ষণ কিছুই নাই। কেবল বন মাত্র। কিন্তু সে বন, দীর্ঘ বৃক্ষাবলীশোভিত বা নিবিড় বন নহে ;—কেবল স্থানে স্থানে ক্ষুদ্র ক্ষুদ্র উদ্ভিদ মণ্ডলাকারে কোন কোন ভূমিখণ্ড ব্যাপিয়াছে। নবকুমার তন্মধ্যে আহরণযোগ্য কাষ্ঠ দেখিতে পাইলেন না ; সুতরাং উপযুক্ত বৃক্ষের অনুদন্ডস্থানে নদীতট হইতে অধিক দূর

গমন করিতে হইল। পারিশেষে ছেদনযোগ্য একটি বৃক্ষ পাইয়া তাহা হইতে প্রয়োজনীয় কাষ্ঠ সমাহরণ করিলেন। কাষ্ঠ বহন করিয়া আনা আর এক বিষম কঠিন ব্যাপার বোধ হইল। নবকুমার দরিদ্রের সন্তান ছিলেন না, এ সকল কস্মে অভ্যাস ছিল না সম্যক্ বিবেচনা না করিয়া কাষ্ঠ আহরণে আসিয়াছিলেন, কিন্তু এক্ষণে কাষ্ঠভার বহন বড় ক্লেশকর হইল। ষাহাই হউক, যে কস্মে প্রবৃত্ত হইয়াছেন, তাহাতে অস্পে ক্ষান্ত হওয়া নবকুমারের স্বভাব ছিল না, এজন্য তিনি কোন মতে কাষ্ঠভার বহিয়া আনিতে লাগিলেন। কিয়দ্দুর বহেন, পরে ক্ষণেক বসিয়া বিশ্রাম করেন, আবার বহেন ; এইরূপে আসিতে লাগিলেন।

এই হেতুবশতঃ নবকুমারের প্রত্যাগমনে বিলম্ব হইতে লাগিল। এদিকে সমাভবাহারিগণ তাঁহার বিলম্ব দেখিয়া উদ্ভিগ্ন হইতে লাগিল ; তাহাদিগের এইরূপ আশঙ্কা হইল যে, নবকুমারকে ব্যাঘ্রে হত্যা করিয়াছে। সম্ভাব্য কাল অতীত হইলে এইরূপই তাহাদের হৃদয়ে স্থির সিন্ধান্ত হইল। অথচ কাহারও এমন সাহস হইল না যে তাঁরে উঠিয়া কিয়দ্দুর অগ্রসর হইয়া তাঁহার অনুসন্ধান করে।

নৌকারোহিণী এইরূপ কম্পনা করিতেছিল, ইত্যবসরে জলরাশি-মধ্যে ভৈরব কল্লোল উত্থিত হইল। নাবিকেরা বুঝিল যে, জোয়ার আসিতেছে। নাবিকেরা বিশেষ জানিত যে, এ সকল স্থানে জলোচ্ছ্বাসকালে তটদেশে এরূপ প্রচণ্ড তরঙ্গাভিঘাত হয় যে, তখন নৌকাদি তীরবর্তী থাকিলে তাহা খণ্ডখণ্ড হইয়া যায়। এজন্য তাহারা অতিবাস্তে নৌকার বন্ধন মোচন করিয়া নদী-মধ্যবর্তী হইতে লাগিল। নৌকা মৃদু হইতে না হইতে সম্মুখস্থ সৈকতভূমি জলপ্লাবিত হইয়া গেল ; যাত্রিগণ কেবল গ্রস্তে নৌকায় উঠিতে অবকাশ পাইয়াছিল, তড়ুলাদি ষাহা ষাহা চরে স্থিত হইয়াছিল, তৎসমুদায় ভাসিয়া গেল। দুর্ভাগ্যবশতঃ নাবিকেরা সনিপদ নহে ; নৌকা সামলাইতে পারিল না ; প্রবল জলপ্রবাহবেগে তরণী রসূলপদুর নদীর মধ্যে লইয়া চলিল। একজন আরোহী কহিল, “নবকুমার রহিল যে ?” একজন

নাবিবক কহিল, “আঃ, তোর নবকুমার কি আছে ? তাকে শিয়ালে
থাইয়াছে ।”

জলবেগে নৌকা রসদুলপদুরের নদীর মধ্যে লইয়া ষাইতেছে,
প্রত্যাগমন করিতে বিস্তর ক্রেশ হইবে, এই জন্য নাবিবকেরা প্রাণপণে
তাহার বাহিরে আসিতে চেষ্টা করিতে লাগিল । এমন কি, সেই
মাঘ মাসে তাহাদিগের ললাটে শ্বেদস্রুতি হইতে লাগিল । এইরূপ
পরিশ্রম দ্বারা রসদুলপদুর নদীর ভিতর হইতে বাহিরে আসিতে লাগিল
বটে, কিন্তু নৌকা যেমন বাহিরে আসিল, অর্মান তথাকার প্রবলতর
স্রোতে উত্তরমুখী হইয়া তীরবৎ বেগে চলিল, নাবিবকেরা তাহার
তিলান্ধ্র মাত্র সংযম করিতে পারিল না । নৌকা আর ফিরিল না ।

যখন জলবেগ এমত মন্দীভূত হইয়া আসিল যে, নৌকার গতি
সংযত করা ষাইতে পারে, তখন ষাঠীরা রসদুলপদুরের মোহানা অতিক্রম
করিয়া অনেক দূর আসিয়াছিলেন । এই নবকুমারের জন্য
প্রত্যাবর্তন করা ষাইবে কি না, এ বিষয়ের মীমাংসা আবশ্যক হইল ।
এই স্থানে বলা আবশ্যক যে, নবকুমারের সহযাত্রীরা তাঁহার
প্রতিবেশী মাত্র, কেহই আত্মবন্দু নহে । তাঁহারা বিবেচনা করিয়া
দেখিলেন যে, তথা হইতে প্রত্যাবর্তন করা আর এক ভাঁটার কস্ম ।
পরে রাত্রি আগত হইবে, আর রাতে নৌকা চালনা হইতে পারিবে
না, অতএব পরদিনের জোয়ারের প্রতীক্ষা করিতে হইবে । এ কাল
পর্যন্ত সকলকে অনাহারে থাকিতে হইবে । দুই দিন নিরাহারে
সকলের প্রাণ ওষ্ঠাগত হইবেক । বিশেষ নাবিবকেরা প্রতিগমন
করিতে অসম্মত ; তাহারা কণ্ঠর বাধ্য নহে । তাহারা বলিতেছে যে,
নবকুমারকে ব্যাঘ্রে হত্যা করিয়াছে । তাহাই সম্ভব । তবে এত ক্রেশ
স্বীকার কি জন্য ?

এরূপ বিবেচনা করিয়া ষাঠীরা নবকুমার ব্যতীত স্বদেশ গমনই
উচিত বিবেচনা করিলেন । নবকুমার সেই ভীষণ সমুদ্রতীরে বনবাসে
বিসম্ভিজত হইলেন ।

ইহা শুনিয়া যদি কেহ প্রতিজ্ঞা করেন, কখনও পরের উপবাস

নিবারণার্থ কাষ্ঠাহরণে যাইবেন না, তবে তিনি উপহাসাম্পদ।
 আত্মোপকারীকে বনবাসে বিসর্জন করা যাহাদিগের প্রকৃতি, তাহারা
 চিরকাল আত্মোপকারীকে বনবাস দিবে—কিন্তু ষত বার বনবাসিত
 করুক না কেন, পরের কাষ্ঠাহরণ করা যাহার স্বভাব, সে পুনর্ব্বার
 পরের কাষ্ঠাহরণে যাইবে। তুমি অধম—তাই বলিয়া আমি উত্তম
 হইব না কেন ?

তৃতীয় পরিচ্ছেদ : বিজনে

—“Like a veil,

Which if withdraw, would but disclose the frown
 Of one who hates us, so the night was shown
 And grimly darkled o'er their faces pale
 And hopeless eyes.”

Don Juan

যে স্থানে নবকুমারকে ত্যাগ করিয়া যাত্রীরা চলিয়া যান, তাহার
 অনতিদূরে দৌলতপুর ও দরিয়াপুর নামে দুই ক্ষুদ্র গ্রাম এক্ষণে দৃষ্ট
 হয়। পরন্তু যে সময়ের বর্ণনায় আমরা প্রবৃত্ত হইয়াছি, সে সময়ে
 তথায় মনুষ্যবসতির কোন চিহ্ন ছিল না ; অরণ্যময় মাত্র,। কিন্তু
 বাঙ্গলাদেশের অন্যত্র ভূমি ঘেরূপ সচরাচর অনুস্মৃতিতনী, এ প্রদেশে
 সেরূপ নহে। রসূলপুরের মদুখ হইতে সুবর্ণরেখা পর্য্যন্ত অবাধে কয়েক
 যোজন পথ ব্যাপিত করিয়া এক বালুকাস্তূপশ্রেণী বিরাজিত আছে।
 আর কিছু উচ্চ হইলে ঐ বালুকাস্তূপশ্রেণীকে বালুকাময় ক্ষুদ্র পর্ব্বত-
 শ্রেণী বলা যাইতে পারিত। এক্ষণে লোকে উহাকে বালিয়াড়ি
 বলে। ঐ সকল বালিয়াড়ির ধবল শিখরমালা মধ্যাহ্নসূর্য্যকিরণে
 দূর হইতে অপদূর্ব্ব প্রভাবিশিষ্ট দেখায়। উহার উপর উচ্চ বৃক্ষ জন্মে
 না। স্তূপতলে সামান্য ক্ষুদ্র বন জন্মিয়া থাকে, কিন্তু মধ্যদেশে বা
 শিরোভাগে প্রায়ই ছায়াশূন্য ধবলশোভা বিরাজ করিতে থাকে।
 অধোভাগমণ্ডনকারী বৃক্ষাদির মধ্যে, ঝাটী, বনঝাউ এবং বনপুষ্পই

অধিক ।

এইরূপ অপ্রফুল্লকর স্থানে নবকুমার সঙ্গিগণকর্তৃক পরিত্যক্ত হইয়াছিলেন । তিনি প্রথমে কাষ্ঠভার লইয়া নদীতীরে আসিয়া নৌকা দেখিলেন না ; তখন তাঁহার অকস্মাৎ অত্যন্ত ভয়সঞ্চার হইল বটে, কিন্তু সঙ্গিগণ যে তাঁহাকে একেবারে পরিত্যাগ করিয়া গিয়াছে, এমনত বোধ হইল না । বিবেচনা করিলেন, জলোচ্ছ্বাসে সৈকতভূমি প্রাবিত হওয়ায় তাঁহারা নিকটস্থ অন্য কোন স্থানে নৌকা রক্ষা করিয়াছেন, শীঘ্র তাঁহাকে সম্বন্ধন করিয়া লইবেন । এই প্রত্যাশায় কিয়ৎক্ষণ তথায় বসিয়া প্রতীক্ষা করিতে লাগিলেন ; কিন্তু নৌকা আইল না । নৌকারোহীও কেহ দেখা দিল না । নবকুমার ক্ষুধায় অত্যন্ত পীড়িত হইলেন । আর প্রতীক্ষা করিতে না পারিয়া, নৌকার সম্বন্ধে নদীর তীরে তীরে ফিরিতে লাগিলেন । কোথাও নৌকার সম্বন্ধন পাইলেন না, প্রত্যাবর্তন করিয়া পূর্বস্থানে আসিলেন । তখন পর্য্যন্ত নৌকা না দেখিয়া বিবেচনা করিলেন, জোয়ারের বেগে নৌকা ভাসাইয়া লইয়া গিয়াছে ; এখন প্রতিকূল স্রোতে প্রত্যাগমন করিতে সঙ্গীদের কাজে-কাজেই বিলম্ব হইতেছে । কিন্তু জোয়ারও শেষ হইল । তখন ভাবিলেন, প্রতিকূল স্রোতের বেগাধিকবশতঃ জোয়ারে নৌকা ফিরিয়া আসিতে পারে নাই ; এক্ষণে ভাঁটায় অবশ্য ফিরিয়া আসিতেছে । কিন্তু ভাঁটাও ক্রমে অধিক হইল—ক্রমে ক্রমে বেলাবসান হইয়া আসিল ; সন্ধ্যাস্ত হইল । যদি নৌকা ফিরিয়া আসিবার হইত, তবে এতক্ষণ ফিরিয়া আসিত ।

তখন নবকুমারের প্রতীতি হইল যে, হয় জলোচ্ছ্বাসসম্ভূত তরঙ্গে নৌকা জলমগ্ন হইয়াছে, নচেৎ সঙ্গিগণ তাঁহাকে এই বিজনে পরিত্যাগ করিয়া গিয়াছে ।

নবকুমার দেখিলেন যে, গ্রাম নাই, আশ্রয় নাই, লোক নাই, আহাৰ্য্য নাই, পেয় নাই ; নদীর জল অসহ্য লবণাক্ত ; অথচ ক্ষুধা তৃষ্ণায় তাঁহার হৃদয় বিদীর্ণ হইতেছিল । দূরন্ত শীতনিবারণজন্য আশ্রয় নাই, গাত্রবস্ত্র পর্য্যন্ত নাই । এই তুষার-শীতল-বায়ু-সঞ্চারিত-

নদী-তীরে হিমবর্ষী আকাশতলে, নিরাশ্রয়ে নিরাবরণে শয়ন করিয়া থাকিতে হইবেক। রাতিমধ্যে ব্যাঘ্র ভল্লুকের সাক্ষাৎ পাইবার সম্ভাবনা। প্রাণনাশই নিশ্চিত।

মনের চাঞ্চল্যহেতু নবকুমার এক স্থানে অধিকক্ষণ বসিয়া থাকিতে পারিলেন না। তীর ত্যাগ করিয়া উপরে উঠিলেন। ইতস্ততঃ ভ্রমণ করিতে লাগিলেন। ক্রমে অন্ধকার হইল। শিশিরাকাশে নক্ষত্রমণ্ডলী নীরবে ফুটিতে লাগিল, যেমন নবকুমারের স্বদেশে ফুটিতে থাকে, তেমনি ফুটিতে লাগিল। অন্ধকারে সর্বত্র জনহীন ;—আকাশ, প্রান্তর, সমুদ্র, সর্বত্র নীরব, কেবল অবিরল কল্লোলিত সমুদ্রগর্জ্জন আর কদাচিত্ বন্য পশুর রব। তথাপি নবকুমার সেই অন্ধকারে, হিমবর্ষী আকাশতলে বালুকাস্তূপের চতুঃপার্শ্বে ভ্রমণ করিতে লাগিলেন। কখনও উপত্যকায়, কখনও অধিত্যকায়, কখনও স্তূপতলে কখনও স্তূপশিখরে ভ্রমণ করিতে লাগিলেন। চলিতে চলিতে প্রতি পদে হিংস্র পশু কতৃক আক্রান্ত হইবার সম্ভাবনা। কিন্তু এক স্থানে বসিয়া থাকিলেও সেই আশঙ্কা।

ভ্রমণ করিতে করিতে নবকুমারের শ্রম জন্মিল। সমস্ত দিন অনাহার ; এজন্য অধিক অবসন্ন হইলেন। একস্থানে বালিয়াড়ির পার্শ্বে পৃষ্ঠরক্ষা করিয়া বসিলেন। গৃহের সুখতপ্ত শয্যা মনে পড়িল। যখন শারীরিক ও মানসিক ক্রেশের অবসাদে চিন্তা উপস্থিত হয়, তখন কখনও কখনও নিদ্রা আসিয়া সঙ্গে সঙ্গে উপস্থিত হয়। নবকুমার চিন্তা করিতে করিতে তন্দ্রাভিভূত হইলেন। বোধ হয় যদি এরূপ নিয়ম না থাকিত, তবে সাংসারিক ক্রেশের অপ্রতিহত বেগ সকলে সকল সময়ে সহ্য করিতে পারিত না।

চতুর্থ পরিচ্ছেদ : স্তূপশিখরে

“—সবিস্ময়ে দেখিলা অদূরে,

ভীষণ-দর্শন মূর্তি।”

মেঘনাদবধ

যখন নবকুমারের নিদ্রাভঙ্গ হইল, তখন রজনী গভীর। এখনও যে তাহাকে ব্যাঘ্রে হত্যা করে নাই, ইহা তাহার আশ্চর্য্য বোধ হইল। ইতস্ততঃ নিরীক্ষণ করিয়া দেখিতে লাগিলেন, ব্যাঘ্র আসিতেছে কি না। অকস্মাৎ সম্মুখে বহু দূরে, একটা আলোক দেখিতে পাইলেন। পাছে ভ্রম জন্মিয়া থাকে, এজন্য নবকুমার মনোভিন্বেশপূৰ্ব্বক তৎপ্রতি দৃষ্টি করিতে লাগিলেন। আলোকপরিধি ক্রমে বর্ধিতায়তন এবং উজ্জ্বলতর হইতে লাগিল—আগ্নেয় আলোক বলিয়া প্রতীক জন্মাইল। প্রতীতিমাত্র নবকুমারের জীবনাশা পুনরুদ্দীপ্ত হইল। মনুষ্যসমাগম ব্যতীত এ আলোকের উৎপত্তি সম্ভবে না, কেন না, এ দাবানলের সময় নহে। নবকুমার গাত্রোথান করিলেন। যথায় আলোক, সেই দিকে ধাবিত হইলেন। একবার মনে ভাবিলেন, “এ আলোক ভৌতিক?—হইতেও পারে; কিন্তু শঙ্কায় নিরস্ত থাকিলেই কোন্ জীবন রক্ষা হয়?” এই ভাবিয়া নিভীকচিত্তে আলোক লক্ষ্য করিয়া চলিলেন। বৃক্ষ, লতা, বালুকাস্তূপ পদে পদে তাহার গতিরোধ করিতে লাগিল। বৃক্ষলতা দলিত করিয়া বালুকাস্তূপ লিঙ্ঘিত করিয়া নবকুমার চলিলেন। আলোকের নিকটবর্ত্তী হইয়া দেখিলেন যে, এক অত্যুচ্চ বালুকাস্তূপের শিরোভাগে অগ্নি জ্বলিতেছে, তৎপ্রভায় শিখরাসীন মনুষ্যমূর্ত্তি আকাশপটস্থ চিত্রের ন্যায় দেখা যাইতেছে। নবকুমার শিখরাসীন মনুষ্যের সমীপবর্ত্তী হইবেন স্থির সংকল্প করিয়া, অশিথিলীকৃত বেগে চলিলেন। পরিশেষে স্তূপারোহণ করিতে লাগিলেন। তখন কিঞ্চিৎ শঙ্কা হইতে লাগিল—তথাপি অকম্পিতপদে স্তূপারোহণ করিতে লাগিলেন। আসীন ব্যক্তির সম্মুখবর্ত্তী হইয়া যাহা যাহা দেখিলেন, তাহাতে তাহার রোমাঞ্চ হইল। তিষ্ঠিবেন কি প্রত্যাবর্ত্তন করিবেন, তাহা স্থির করিতে পারিলেন না।

শিখরাসীন মনুষ্য নয়ন মুদ্রিত করিয়া ধ্যান করিতেছিল—নবকুমারকে প্রথমে দেখিতে পাইল না। নবকুমার দেখিলেন, তাহার বয়ঃক্রম প্রায় পঞ্চাশৎ বৎসর হইবে। পরিধানে কোন কাপাসবস্ত্র আছে কি না, তাহা লক্ষ্য হইল না, কটিদেশ হইতে জ্ঞান পৰ্য্যন্ত

শান্দর্দলচর্মে আবৃত । গলদেশে রুদ্রাক্ষমালা ; আয়ত মৃৎখণ্ডল
 মণ্ডলজটাপরিবেষ্টিত । সম্মুখে কাষ্ঠে অগ্নি জ্বলিতেছিল—সেই
 অগ্নির দীপ্তি লক্ষ্য করিয়া নবকুমার সে স্থলে আসিতে পারিয়াছিলেন ।
 নবকুমার একটা বিকট দুর্গন্ধ পাইতে লাগিলেন ; ইহার আসন প্রতি
 দৃষ্টিপাত করিয়া তাহার কারণ অনুভূত করিতে পারিলেন । জটধারী
 এক ছিন্নশীর্ষ গলিত শবের উপরে বসিয়া আছেন । আরও সভয়ে
 দেখিলেন যে, সম্মুখে নরকপাল রহিয়াছে, তন্মধ্যে রক্তবর্ণ দ্রব্য পদার্থ
 রহিয়াছে । চতুর্দিকে স্থানে স্থানে অস্থি পড়িয়া রহিয়াছে—এমন কি,
 ষোণাসীনের কণ্ঠস্থ রুদ্রাক্ষমালামাধ্য ক্ষুদ্র ক্ষুদ্র অস্থিখণ্ড গ্রথিত
 রহিয়াছে । নবকুমার মগ্নমুগ্ধ হইয়া রহিলেন । অগ্রসর হইবেন কি
 স্থান ত্যাগ করিবেন, তাহা বুদ্ধিতে পারিলেন না । তিনি কাপালিক-
 দিগের কথা শ্রুত ছিলেন । বুদ্ধিলেন যে, এ ব্যক্তি কাপালিক ।

যখন নবকুমার উপনীত হইয়াছিলেন, তখন কাপালিক মন্ত্রসাধনে
 বা জপে বা ধ্যানে মগ্ন ছিল, নবকুমারকে দেখিয়া প্রক্ষেপও করিল না ।
 অনেকক্ষণ পরে জিজ্ঞাসা করিল “কন্তুং ?” নবকুমার কহিলেন,
 “ব্রাহ্মণ ।”

কাপালিক কহিল, “তিষ্ঠ ।” এই কহিয়া পদ্বর্ষকাষে নিষ্কৃত
 হইল । নবকুমার দাঁড়াইয়া রহিলেন ।

এইরূপে প্রহরান্বিত গত হইল । পরিশেষে কাপালিক গাত্রোথান
 করিয়া নবকুমারকে পদ্বর্ষ সংস্কৃতে কহিল, “মামনুসর ।”

ইহা নিশ্চিত বলা যাইতে পারে যে, অন্য সময়ে নবকুমার কদাপি
 ইহার সঙ্গী হইতেন না । কিন্তু এক্ষণে ক্ষুধাতৃষ্ণায় প্রাণ কণ্ঠাগত ।
 অতএব কহিলেন, “প্রভুর যেমত আজ্ঞা । কিন্তু আমি ক্ষুধাতৃষ্ণায়
 বড় কাতর । কোথায় গেলে আহাৰ্য্য সামগ্রী পাইব অনুমতি
 করুন ।”

কাপালিক কহিল, “ভৈরবীপ্রেরিতোহসি ; মামনুসর ; পরিতোষঃ
 তে ভবিষ্যতি ।”

নবকুমার কাপালিকের অনুগামী হইলেন । উভয়ে অনেক পথ

বাহিত করিলেন—পাখিমধ্যে কেহ কোন কথা কহিল না। পরিশেষে এক পর্ণকুটীর প্রাপ্ত হইল—কাপালিক প্রথমে প্রবেশ করিয়া নবকুমারকে প্রবেশ করিতে অনুমতি করিল ; এবং নবকুমারের অবোধ-গম্য কোন উপায়ে একখণ্ড কাষ্ঠে অগ্নি জ্বালিত করিল। নবকুমার তদালোকে দেখিলেন যে, ঐ কুটীর সম্বাংশে কিয়দূর পাতায় রচিত। তন্মধ্যে কয়েকখানা ব্যাঘ্রচর্ম্ম আছে—এক কলস জল ও কিছু ফলমূল আছে।

কাপালিক অগ্নি জ্বালিত করিয়া কহিল, “ফলমূল যাহা আছে, আত্মসাৎ করিতে পার। পর্ণপত্র রচনা করিয়া, কলসজল পান করিও। ব্যাঘ্রচর্ম্ম আছে, অভির্দাচি হইলে শয়ন করিও। নিষ্বিষ্টে তিষ্ঠ—ব্যাঘ্রের ভয় করিও না। সময়ান্তরে আমার সহিত সাক্ষাৎ হইবে। যে পর্য্যন্ত সাক্ষাৎ না হয়, সে পর্য্যন্ত এ কুটীর ত্যাগ করিও না।”

এই বলিয়া কাপালিক প্রস্থান করিল। নবকুমার সেই সামান্য ফলমূল আহার করিয়া এবং সেই ঈষৎজল পান করিয়া পরম পরিতোষ লাভ করিলেন। পরে ব্যাঘ্রচর্ম্ম শয়ন করিলেন, সমস্ত দিবসজনিত ক্লেশহেতু শীঘ্রই নিদ্রাভিভূত হইলেন।

পঞ্চম পরিচ্ছেদ : সমুদ্রভ্রম

“—যোগপ্রভাবো ন চ লক্ষ্যতে তে।

বিভর্ষি চাকারমনিষ্বিতানাং মৃণালিনী হৈমমিবোপরাগম্ ॥”

রঘুবংশ

প্রাতে উঠিয়া নবকুমার সহজেই বাটী গমনের উপায় করিতে ব্যস্ত হইলেন ; বিশেষ, এ কাপালিকের সান্নিধ্য কোনক্রমেই শ্রেয়স্কর বলিয়া বোধ হইল না। কিন্তু আপাততঃ এ পথহীন বনমধ্য হইতে কি প্রকারে নিষ্কান্ত হইবেন ? কি প্রকারেই বা পথ চিনিয়া বাটী যাইবেন ? কাপালিক অবশ্য পথ জানে, জিজ্ঞাসিলে কি বলিয়া

দিবে না? বিশেষ, যত দূর দেখা গিয়াছে, তত দূর কাপালিক তাঁহার প্রতি কোন শঙ্কাসূচক আচরণ করে নাই—কেনই বা তবে তিনি ভীত হন? এ দিকে কাপালিক তাঁহার পুনঃসাক্ষাৎ পর্য্যন্ত কুটীর ত্যাগ করিতে নিষেধ করিয়াছে, তাহার অবাধ্য হইলে বরং তাহার রোষোৎপত্তির সম্ভাবনা। নবকুমার শ্রুত ছিলেন যে, কাপালিকেরা মন্ত্রবলে অসাধ্যসাধনে সক্ষম—এ কারণে তাহার অবাধ্য হওয়া অনর্দচিত। ইত্যাদি বিবেচনা করিয়া নবকুমার আপাততঃ কুটীরমধ্যে অবস্থান করাই স্থির করিলেন।

কিন্তু ক্রমে বেলা অপরাহ্ন হইয়া আসিল, তথাপি কাপালিক প্রত্যাগমন করিল না। পূর্বাদিনের উপবাস, এ পর্য্যন্ত অনশন, ইহাতে ক্ষুধা প্রবল হইয়া উঠিল। কুটীরমধ্যে যে অল্প পরিমাণ, ফলমূল ছিল, তাহা পূর্বাৱেই ভুক্ত হইয়াছিল—এক্ষণে কুটীর ত্যাগ করিয়া ফলমূলান্বেষণ না করিলে ক্ষুধায় প্রাণ যায়। অল্প বেলা থাকিতে ক্ষুধার পীড়নে নবকুমার ফলান্বেষণে বাহির হইলেন।

নবকুমার ফলান্বেষণে নিকটস্থ বালুকাস্তৃপসকলের চারিদিকে পরিভ্রমণ করিতে লাগিলেন। যে দূরই একটা গাছ বালুকায় জন্মিয়া থাকে, তাহার ফলাস্বাদন করিয়া দেখিলেন যে, এক বৃক্ষের ফল বাদামের ন্যায় অতি সুস্বাদু। তদ্বারা ক্ষুধানিবৃত্তি করিলেন।

কথিত বালুকাস্তৃপশ্রেণী প্রস্থ অতি অল্প, অতএব নবকুমার অল্পকাল ভ্রমণ করিয়া তাহা পার হইলেন। তৎপরে বালুকাবিহীন নিবিড় বনমধ্যে পড়িলেন। যাহারা ক্ষণকালজন্য অপূর্বপরিচিত বনমধ্যে ভ্রমণ করিয়াছেন, তাহারা জানেন যে, পথহীন বনমধ্যে ক্ষণমধ্যেই পথভ্রান্তি জন্মে। নবকুমারের তাহাই ঘটিল। কিছু দূর আসিয়া আশ্রম কোন পথে রাখিয়া আসিয়াছেন, তাহা স্থির করিতে পারিলেন না। গম্ভীর জলকল্লোল তাঁহার কণ্ঠপথে প্রবেশ করিল; তিনি বুঝিলেন যে এ সাগরগঞ্জর্জন। ক্ষণকাল পরে অকস্মাৎ বনমধ্য হইতে বহির্গত হইয়া দেখিলেন যে, সম্মুখেই সমুদ্র। অনন্তবিস্তার নীলাম্বরমণ্ডল সম্মুখে দেখিয়া উৎকণ্ঠানন্দে হৃদয় পরিপ্লুত হইল।

সিকতাময় তটে গিয়া উপবেশন করিলেন । ফেনিল, নীল, অনন্ত সমুদ্র ! উভয় পার্শ্বে যত দূর চক্ষুঃ যায়, তত দূর পর্য্যন্ত তরঙ্গভঙ্গ-প্রক্ষিপ্ত ফেনার রেখা ; শুদ্পীকৃত বিমল কুসুমদামগ্রীথিত মালার ন্যায় সে ধবল ফেনারেখা হেমকান্ত সৈকতে ন্যস্ত হইয়াছে ; কাননকুন্তলা ধরণীর উপযুক্ত অলকাভরণ । নীলজলমণ্ডলমধ্যে সহস্র স্থানেও সফেন তরঙ্গভঙ্গ হইতেছিল । যদি কখনও এমত প্রচণ্ড বায়ুদ্বহন সম্ভব হয় যে, তাহার বেগ নক্ষত্রমালা সহস্রে সহস্রে স্থানচ্যুত হইয়া নীলাম্বরে আন্দোলিত হইতে থাকে তবেই সে সাগরতরঙ্গক্ষেপের স্বরূপ দৃষ্ট হইতে পারে । এ সময়ে অন্তগামী দিনমণির মৃদুল কিরণে নীলজলের একাংশ দ্রবীভূত সুবর্ণের ন্যায় জ্বলিতেছিল । অতিদূরে কোন ইউরোপীয় বণিকজাতির সমুদ্রপোত শ্বেতপক্ষ বিস্তার করিয়া বৃহৎ পক্ষীর ন্যায় জলধিহৃদয়ে উড়িতেছিল ।

কতক্ষণ যে নবকুমার তীরে বসিয়া অনন্যমনে জলধিশোভা দৃষ্টি করিতে লাগিলেন, তদ্বশে তৎকালে তিনি পরিমাণ-বোধ-রহিত । পরে একেবারে প্রদোষাতিমির আসিয়া কাল জলের উপর বসিল । তখন নবকুমারের চেতনা হইল যে, আশ্রম স্থান করিয়া লইতে হইবেক । দীর্ঘনিশ্বাস ত্যাগ করিয়া গাত্রোথান করিলেন । দীর্ঘ-নিশ্বাস ত্যাগ করিলেন কেন, তাহা বলিতে পারি না—তখন তাহার মনে কোন ভূতপূর্ব্ব সুখের উদয় হইতেছিল, তাহা কে বলিবে ? গাত্রোথান করিয়া সমুদ্রের দিকে পশ্চাৎ ফিরিলেন । ফিরিবামাত্র দেখিলেন, অপূর্ব্ব মূর্ত্তি ! সেই গম্ভীরনাদী বারিধিতীরে, সৈকত-ভূমে অস্পষ্ট সন্ধ্যালোকে দাঁড়াইয়া রমণীমূর্ত্তি ! কেশভার—অবেণীসম্বন্ধ, সংসর্পিত, রাশীকৃত, আগদুল্ফলম্বিত কেশভার ; তদগ্রে দেহরত্ন : যেন চিত্রপটের উপর চিত্র দেখা যাইতেছে । অলকাবলীর প্রাচুর্য্যে মৃদুমণ্ডল সম্পূর্ণরূপে প্রকাশ হইতেছিল না—তথাপি মেঘবিচ্ছেদনিঃসৃত চন্দ্ররশ্মির ন্যায় প্রতীত হইতেছিল । বিশাল লোচনে কটাক্ষ অতি স্থির, অতি স্নিগ্ধ, অতি গম্ভীর, অথচ জ্যোতির্ময় ; সে কটাক্ষ, এই সাগরহৃদয়ে ক্রীড়াশীল চন্দ্রকিরণলেখার

ন্যায় সিন্ধোজ্জ্বল দীপ্তি পাইতেছিল। কেশরাশিতে স্কন্ধদেশ ও বাহু-যুগল আচ্ছন্ন করিয়াছিল। স্কন্ধদেশ একেবারে অদৃশ্য ; বাহু-যুগলের বিমলশ্রী কিছু কিছু দেখা যাইতেছিল। রমণীদেহ একেবারে নিরাভরণ। মূর্ত্তিমধ্যে যে একটি মোহিনী শক্তি ছিল, তাহা বর্ণিতে পারা যায় না অশ্বচ্ছন্দানিসৃত কোমলদিবর্ণ ; ঘনকৃষ্ণ চিকুরজাল ; পরস্পরের সান্নিধ্যে কি বর্ণ কি চিকুর, উভয়েরই যে শ্রী বিকসিত হইতেছিল, তাহা সেই গম্ভীরনাদী সাগরকূলে, সন্ধ্যালোকে না দেখিলে তাহার মোহিনী শক্তি অনদ্ভূত হয় না।

নবকুমার অকস্মাৎ এইরূপ দূর্গমধ্যে দেবী মূর্ত্তি দেখিয়া নিম্পন্দ-শরীর হইয়া দাঁড়াইলেন। তাহার বাক্শক্তি রহিত হইল ;—সুস্থ হইয়া চাহিয়া রহিলেন। রমণীও স্পন্দহীন, অনিমেষলোচনে বিশাল চক্ষুর স্থিরদৃষ্টি নবকুমারের মুখে ন্যস্ত করিয়া রাখিলেন। উভয়মধ্যে প্রভেদ এই যে, নবকুমারের দৃষ্টি চমকিত লোকের দৃষ্টির ন্যায়, রমণীর দৃষ্টিতে সে লক্ষণ কিছুমাত্র নাই, কিন্তু তাহাতে বিশেষ উদ্বেগ প্রকাশ হইতেছিল।

অনন্তর সমুদ্রের জনহীন তীরে, এইরূপে বহুক্ষণ দুই জনে চাহিয়া রহিলেন। অনেকক্ষণ পরে তরুণীর কণ্ঠস্বর শোনা গেল। তিনি অতি মৃদুস্বরে কহিলেন, “পাথক, তুমি পথ হারাইয়াছ ?”

এই কণ্ঠস্বরের সঙ্গে নবকুমারের হৃদয়বীণা বাজিয়া উঠিল। বিচিত্র হৃদয়বিশেষের তন্ত্রীচয় সময়ে সময়ে এইরূপ লয়হীন হইয়া থাকে যে, যত যত্ন করা যায়, কিছুতেই পরস্পর মিলিত হয় না। কিন্তু একটি শব্দে, একটি রমণীকণ্ঠসম্ভূত স্বরে সংশোধিত হইয়া যায়। সকলই লয়-বিশিষ্ট হয়। সংসারযাত্রা সেই অবাধি স্নাত্তময় সঙ্গীতপ্রবাহ বাঁলায়া বোধ হয়। নবকুমারের কণ্ঠে সেইরূপ এ ধনি বাজিল।

“পাথক, তুমি পথ হারাইয়াছ ?” এ ধনি নবকুমারের কণ্ঠে প্রবেশ করিল। কি অর্থ, কি উত্তর করিতে হইবে, কিছুই মনে হইল না। ধনি যেন হৃষিকম্পিত হইয়া বেড়াইতে লাগিল ; যেন পবনে সেই ধনি বাঁহল ; বৃক্ষপরে মর্ম্মরিত হইতে লাগিল ; সাগরনাদে যেন

মন্দীভূত হইতে লাগিল । সাগরবসনা পৃথিবী সুন্দরী ; রমণী সুন্দরী ;
ধনিও সুন্দর ; হৃদয় তন্ত্রীমধ্যে সৌন্দর্যের লয় মিলিতে লাগিল ।

রমণী কোন উত্তর না পাইয়া কহিলেন, “আইস ।” এই বলিয়া
তরুণী চলিল ; পদক্ষেপ লক্ষ্য হয় না । বসন্তকালে মন্দানিলসঞ্চালিত
শুভ্র মেঘের ন্যায় ধীরে ধীরে, অলক্ষ্যে পাদবিক্ষেপে চলিল ; নবকুমার
কলের পদ্মলীর ন্যায় সঙ্গি চলিলেন । এক স্থানে একটি ক্ষুদ্র বন
পরিবেষ্টন করিতে হইবে, বনের অন্তরালে গেলে, আর সুন্দরীকে
দেখিতে পাইলেন না । বনবেষ্টনের পর দেখেন যে, সম্মুখে কুটীর ।

ষষ্ঠ পরিচ্ছেদ : কাপালিকসঙ্গে

“কথং নিগড়সংঘতাসি । দ্রুতম্
নয়ামি ভবতীমিতঃ—”

রত্নাবলী

নবকুমার কুটীরমধ্যে প্রবেশ করিয়া দ্বারসংযোজনপূর্ব্বক করতলে
মস্তক দিয়া বসিলেন । শীঘ্র আর মস্তকোত্তোলন করিলেন না ।

“এ কি দেবী—মানুষী—না কাপালিকের মায়ামাত্র !” নবকুমার
নিঃস্পন্দ হইয়া হৃদয়মধ্যে এই কথার আন্দোলন করিতে লাগিলেন ।
কিছুই বুঝিতে পারিলেন না ।

অন্যমনস্ক ছিলেন বলিয়া, নবকুমার আর একটি ব্যাপার দেখিতে
পান নাই । সেই কুটীরমধ্যে তাহার আগমনপূর্ব্বাবধি একখানি কাষ্ঠ
জ্বলিতেছিল । পরে যখন অনেক রাতে স্মরণ হইল যে, সায়াকৃত্য
অসমাপ্ত রহিয়াছে—তখন জলাশ্বেষণ অনুরোধে চিন্তা হইতে ক্ষান্ত
হইয়া এ বিষয়ের অসম্ভাবিতা হৃদয়ঙ্গম করিতে পারিলেন । শূন্য
আলো নহে, তঁড়ুলাদি পাকোপযোগী কিছু কিছু সামগ্রীও আছে ।
নবকুমার বিস্মিত হইলেন না—মনে করিলেন যে, এও কাপালিকের
কর্ম্ম—এ স্থানে বিস্ময়ের বিষয় কি আছে ।

নবকুমার সায়ংকৃত্য সমাপনান্তে তঁড়ুলগুদালি কুটীরমধ্যে প্রাপ্ত এক

মৃৎপায়ে সিঁধ করিয়া আত্মসাৎ করিলেন ।

পরদিন প্রভাতে চশ্মশয্যা হইতে গাত্রোত্থান করিয়াই সমুদ্র-তীরভিমুখে চলিলেন । পূর্বদিনের যাতায়াতের গুরুণে অদ্য অল্প কষ্টে পথ অনুভূত করিতে পারিলেন । তথায় প্রাতঃকৃত্য সমাপন করিয়া প্রতীক্ষা করিতে লাগিলেন । কাহার প্রতীক্ষা করিতে লাগিলেন ? পূর্বদৃষ্টা মায়ারিনী পুনর্ব্বার সে স্থলে যে আসিবেন—এমত আশা নবকুমারের হৃদয়ে কত দূর প্রবল হইয়াছিল বলিতে পারি না—কিন্তু সে স্থান তিনি ত্যাগ করিতে পারিলেন না । অনেক বেলাতেও তথায় কেহ আসিল না । তখন নবকুমার সে স্থানের চারিদিকে ভ্রমিয়া বেড়াইতে লাগিলেন । বৃথা অব্বেষণ মাত্র । মনুষ্যসমাগমের চিহ্নমাত্র দেখিতে পাইলেন না । পুনর্ব্বার ফিরিয়া আসিয়া সেই স্থানে উপবেশন করিলেন । সূর্য্য অস্তগত হইল ; অন্ধকার হইয়া আসিতে লাগিল ; নবকুমার হতাশ হইয়া কুটীরে ফিরিয়া আসিলেন । সায়াহ্নকালে সমুদ্রতীর হইতে প্রত্যাগমন করিয়া নবকুমার দেখিলেন যে, কাপালিক কুটীরमध्ये ধরাতলে উপবেশন করিয়া নিঃশব্দে আছে । নবকুমার প্রথমে স্বাগত জিজ্ঞাসা করিলেন ; তাহাতে কাপালিক কোন উত্তর করিল না ।

নবকুমার কহিলেন, “এ পর্য্যন্ত প্রভুর দর্শনে কি জন্য বঞ্চিত ছিলাম ?” কাপালিক কহিল, “নিজ রূতে নিষদ্ধ ছিলাম ।”

নবকুমার গৃহগমনাভিলাষ ব্যক্ত করিলেন । কহিলেন, “পথ অবগত নহি—পাথেয় নাই ; যাব্দিহিতবিধান প্রভুর সাক্ষাৎ পাইলেই হইতে পারিবে, এই ভরসায় আছি ।”

কাপালিক কেবলমাত্র কহিল, “আমার সঙ্গে আগমন কর ।” এই বলিয়া উদাসীন গাত্রোত্থান করিলেন । বাটী যাইবার কোন সমুদ্রপায় হইতে পারিবে প্রত্যাশায় নবকুমারও তাহার পশ্চাদ্বর্ত্তী হইলেন ।

তখন সন্ধ্যালোক অন্তর্হিত হয় নাই—কাপালিক অগ্রে অগ্রে, নবকুমার পশ্চাৎ পশ্চাৎ যাইতেছিলেন । অকস্মাৎ নবকুমারের পৃষ্ঠদেশে কাহার কোমল করস্পর্শ হইল । পশ্চাৎ ফিরিয়া যাহা দেখিলেন,

তাহাতে স্পন্দহীন হইলেন । সেই আগদুর্ল্‌ফলম্বিত-নিবিড়কেশরাশি-
 ধারিণী বন্যাদেবীমূর্ত্তি ! পদ্ব্যবং নিঃশব্দ নিঃস্পন্দ । কোথা হইতে
 এ মূর্ত্তি অকস্মাৎ তাঁহার পশ্চাতে আসিল ! নবকুমার দেখিলেন,
 রমণী মূখে অঙ্গুলি প্রদান করিয়া আছে । নবকুমার বুঝিলেন যে,
 রমণী বাক্যস্ফূর্ত্তি নিষেধ করিতেছে—নিষেধের বড় প্রয়োজন ছিল
 না । নবকুমার কি কথা কহিবেন ? তিনি তথায় চমৎকৃত হইয়া
 দাঁড়াইলেন । কাপালিক এ সকল কিছুই দেখিতে পাইল না, অগ্রসর
 হইয়া চলিয়া গেল । তাহারা উদাসীনের শ্রবণাতিক্রান্ত হইলে রমণী
 মৃদুস্বরে কি কথা কহিল । নবকুমারের কণে এই শব্দ প্রবেশ করিল,
 “কোথা যাইতেছ ? যাইও না ফিরিয়া যাও—পলায়ন কর ।”

এই কথা সমাপ্ত করিয়াই উক্তিকারিণী সরিয়া গেলেন, প্রত্যুত্তর
 শব্দনিবার জন্য তিষ্ঠিলেন না । নবকুমার কিয়ৎকাল অভিভূতের ন্যায়
 দাঁড়াইলেন ; পশ্চাদ্ধর্ত্তী হইতে ব্যগ্র হইলেন, কিন্তু রমণী কোন্ দিকে
 গেল, তাহার কিছুই স্থিরতা পাইলেন না । মনে করিতে লাগিলেন—
 “এ কাহার মায়া ? না আমারই ভ্রম হইতেছে । যে কথা শব্দনিত্য—
 সে ত আশঙ্কাসূচক, কিন্তু কিসের আশঙ্কা ? তান্দ্রিকেরা সকলই
 করিতে পারে । তবে কি পলাইব ? পলাইব বা কেন ? সে দিন
 যদি বাঁচিয়াছি, আজিও বাঁচিব । কাপালিক মনুষ্য, আমি মনুষ্য ।”

নবকুমার এইরূপ চিন্তা করিতেছিলেন, এমন সময়ে দেখিলেন,
 কাপালিক তাঁহাকে সঙ্গে না দেখিয়া প্রত্যাগমন করিতেছে ।
 কাপালিক কহিল, “বিলম্ব করিতেছ কেন ?”

কাপালিক পুনরাহ্বান করাতে বিনা বাক্যব্যয়ে নবকুমার তাঁহার
 পশ্চাদ্ধর্ত্তী হইলেন ।

কিয়দ্দূর গমন করিয়া সম্মুখে এক মৎপ্রাচীরবিশিষ্ট কুটীর
 দেখিতে পাইলেন । তাহাকে কুটীরও বলা যাইতে পারে, ক্ষুদ্র গৃহও
 বলা যাইতে পারে । কিন্তু ইহাতে আমাদিগের কোন প্রয়োজন নাই ।
 ইহার পশ্চাতেই সিকতাময় সমুদ্রতীর । গৃহপার্শ্ব দিয়া কাপালিক
 নবকুমারকে সেই সৈকতে লইয়া চলিলেন ; এমন সময় তীরের তুলা

বেগে পদ্বৰ্দ্ধশ্চা রমণী তাঁহার পার্শ্ব দিয়া চলিয়া গেল ; গমনকালে তাঁহার কণ্ঠে বলিয়া গেল, “এখনও পলাও । নরমাংস নহিলে তাম্রিকের পূজা হয় না, তুমি কি জান না ?”

নবকুমারের কপালে স্বেদনির্গম হইতে লাগিল । দূর্ভাগ্যবশতঃ ষড়বতীর এই কথা কাপালিকের কণ্ঠে গেল । সে কহিল, “কপালকুণ্ডলে !”

স্বর নবকুমারের কণ্ঠে মেঘগজ্জ্বলনবৎ ধ্বনিত হইল । কিন্তু কপালকুণ্ডলা কোন উত্তর দিল না ।

কাপালিক নবকুমারের হস্ত ধারণ করিয়া লইয়া যাইতে লাগিল । মানুষঘাতী করস্পর্শে নবকুমারের শোণিত ধমনীমধ্যে শতগুণ বেগে প্রধাবিত হইল—লগ্ন সাহস পুনর্ব্বার আসিল । কহিলেন, “হস্ত ত্যাগ করুন ।”

কাপালিক উত্তর করিল না । নবকুমার পুনরপি জিজ্ঞাসা করিলেন “আমায় কোথায় লইয়া যাইতেছেন ?”

কাপালিক কহিল, “পূজার স্থানে ।”

নবকুমার কহিলেন, “কেন ?”

কাপালিক কহিল, “বধার্থ ।”

অতি তীব্রবেগে নবকুমার নিজ হস্ত টানিলেন । যে বলে তিনি হস্ত আকর্ষিত করিয়াছিলেন, তাহাতে সামান্য লোকে তাঁহার হাত ধরিয়া থাকিলে হস্তরক্ষা করা দূরে থাকুক—বেগে ভূপতিত হইত । কিন্তু কাপালিকের অঙ্গমাগ্রও হেলিল না ;—নবকুমারের প্রকোষ্ঠ তাহার হস্তমধ্যেই রহিল । নবকুমারের অস্থিগ্রন্থিসকল যেন ভগ্ন হইয়া গেল । নবকুমার দেখিলেন, বলে হইবে না । কৌশলের প্রয়োজন । “ভাল দেখা যাউক,” এইরূপ স্থির করিয়া নবকুমার কাপালিকের সঙ্গে চলিলেন ।

সৈকতের মধ্যস্থানে নীত হইয়া নবকুমার দেখিলেন, পদ্বৰ্দ্ধদিনের ন্যায় তথায় বৃহৎ কাষ্ঠে অগ্নি জ্বলিতেছে । চতুঃপার্শ্বে তাম্রিক পূজার আয়োজন রহিয়াছে, তন্মধ্যে নরকপালপূর্ণ আসব রহিয়াছে—

কিন্তু শব নাই। অনুমান করিলেন, তাঁহাকে শব হইতে হইবে।

কতকগুলি শব্দ, কঠিন লতাগুল্ম তথায় পূর্ব হইতেই আহঁরিত ছিল। কাপালিক তদ্বারা নবকুমারকে দৃঢ় বন্ধন করিতে আরম্ভ করিল। নবকুমার সাধ্যমত বল প্রকাশ করিলেন : কিন্তু বল প্রকাশ কিছুমাত্র ফলদায়ক হইল না। তাঁহার প্রতীতি হইল যে, এ বয়সেও কাপালিক মত্ত হস্তীর বল ধারণ করে। নবকুমারের বল প্রকাশ দেখিয়া কাপালিক কাঁহল,

“মূর্থ ! কি জন্য বল প্রকাশ কর ? তোমার জন্ম আজি সার্থক হইল। ভৈরবীর পূজায় তোমার এই মাংসপিণ্ড অপিত হইবেক, ইহার অধিক তোমার তুল্য লোকের আর কি সৌভাগ্য হইতে পারে ?”

কাপালিক নবকুমারকে দৃঢ় বন্ধন করিয়া সৈকতোপরি ফেলিয়া রাখিলেন এবং বধের প্রাক্কালিক পূজাদি ক্রিয়ায় ব্যাপ্ত হইলেন। ততক্ষণ নবকুমার বাঁধন ছিঁড়িবার চেষ্টা করিতে লাগিলেন ; কিন্তু শব্দ লতা অতি কঠিন—বন্ধন অতি দৃঢ়। মৃত্যু আসন্ন ! নবকুমার ইষ্টদেবচরণে চিত্ত নিবিশ্ট করিলেন। একবার জন্মভূমি মনে পড়িল, নিজ স্নেহের আলয় মনে পড়িল, একবার বহুদিন অন্তর্হিত জনক এবং জননীর মুখ মনে পড়িল, দুই এক বিবদ অশ্রুজল সৈকত-বালুকায় শুষ্কিয়া গেল। কাপালিক বলির প্রাক্কালিক ক্রিয়া সমাপনান্তে বধার্থ খঞ্জ লইবার জন্য আসন ত্যাগ করিয়া উঠিল। কিন্তু যথায় খঞ্জ রাখিয়াছিল, তথায় খঞ্জ পাইল না। আশ্চর্য ! কাপালিক কিছু বিস্মিত হইল। তাহার নিশ্চিত মনে হইতছিল যে, অপরাহ্নে খঞ্জ আনিয়া উপযুক্ত স্থানে রাখিয়াছিল এবং স্থানান্তরও করে নাই, তবে খঞ্জ কোথায় গেল ? কাপালিক ইতস্ততঃ অনুসন্ধান করিল। কোথাও পাইল না। তখন পূর্বকথিত কুটীরীভিমুখ হইয়া কপাল-কুণ্ডলাকে ডাকিল, কিন্তু পুনঃ পুনঃ ডাকাতেও কপালকুণ্ডলা কোন উত্তর দিল না। তখন কাপালিকের চক্ষু লোহিত, দ্রব্ধগ আকৃষ্ট হইল। দ্রুতপদবিক্ষেপে গৃহীভিমুখে চলিল ; এই অবকাশে বন্ধন-লতা ছিন্ন করিতে নবকুমার আর একবার যত্ন পাইলেন—কিন্তু সে

যশও নিঃফল হইল ।

এমত সময়ে নিকটে বালুকার উপর অতি কোমল পদধর্নি হইল—এ পদধর্নি কাপালিকের নহে । নবকুমার নয়ন ফিরাইয়া দেখিলেন, সেই মোহিনী—কপালকুণ্ডলা । তাঁহার করে খজা দুলিতেছে ।

কপালকুণ্ডলা কহিলেন, “চুপ ! কথা কহিও না—খজা আমারই কাছে—চুরি করিয়া রাখিয়াছি ।”

এই বলিয়া কপালকুণ্ডলা অতি শীঘ্রহস্তে নবকুমারের লতাবন্ধন খজা দ্বারা ছেদন করিতে লাগিলেন । নিমিষমধ্যে তাঁহাকে মৃত্ত করিলেন । কহিলেন, “পলায়ন কর ; আমার পশ্চাৎ আইস, পথ দেখাইয়া দিতেছি ।”

এই বলিয়া কপালকুণ্ডলা তীরের ন্যায় বেগে পথ দেখাইয়া চলিলেন । নবকুমার লাফ দিয়া তাঁহার অনুসরণ করিলেন ।

সপ্তম পরিচ্ছেদ : অব্বেষণ

And the great lord of Luna
Fell at that deadly stroke ;
As falls on mount Alvernus
A thunder-smitten oak.

Lays of Ancient Rome

এদিকে কাপালিক গৃহমধ্যে তন্ন তন্ন করিয়া অনুসন্ধান করিয়া না খজা, না কপালকুণ্ডলাকে দেখিতে পাইয়া সন্দিগ্ধচিত্তে সৈকতে প্রত্যাবর্তন করিল । তথায় আসিয়া দেখিল যে, নবকুমার তথায় নাই । ইহাতে অত্যন্ত বিস্ময় জন্মিল । কিয়ৎক্ষণ পরেই ছিন্ন লতাবন্ধনের উপর দৃষ্টি পড়িল । তখন স্বরূপ অনুভূত করিতে পারিয়া কাপালিক নবকুমারের অব্বেষণে ধাবিত হইল । কিন্তু বিজন-মধ্যে পলাতকেরা কোন্ দিকে কোন্ পথে গিয়াছে তাহা স্থির করা দুঃসাধ্য । অন্ধকারবশতঃ কাহাকেও দৃষ্টিপথবর্তী করিতে পারিল না ।

এজন্য বাক্যশব্দ লক্ষ্য করিয়া ক্ষণেক ইতস্ততঃ ভ্রমণ করিতে লাগিল । কিন্তু সকল সময়ে কণ্ঠধ্বনিও শ্রুতিনিতে পাওয়া গেল না । অতএব বিশেষ করিয়া চারিদিক পর্যবেক্ষণ করিবার অভিপ্রায়ে এক উচ্চ বালিয়াড়ির শিখরে উঠিল । কাপালিক এক পার্শ্ব দিয়া উঠিল : তাহার অন্যতম পার্শ্ব বর্ষার জলপ্রবাহে স্তূপমূল ক্ষয়িত হইয়াছিল, তাহা সে জানিত না । শিখরে আরোহণ করিবামাত্র কাপালিকের শরীরভরে সেই পতনোন্মুখ স্তূপশিখর ভগ্ন হইয়া অতি ঘোর রবে ভূপতিত হইল । পতনকালে পার্শ্বত-শিখরচ্যুত মহিষের ন্যায় কাপালিকও তৎসঙ্গে পড়িয়া গেল ।

অষ্টম পরিচ্ছেদ : আশ্রয়ে

“And that very night——

Shall Romeo bear thee to Mantua.”

Romeo and Juliet

সেই অমাবস্যার ঘোরান্ধকার ষামিনীতে দুই জনে উদ্ভ্রমবাসে : বনমধ্যে প্রবেশ করিলেন । বন্য পথ নবকুমারের অপরিজ্ঞাত : কেবল সহচারিণী ষোড়শীকে লক্ষ্য করিয়া তদ্ব্যাসম্বন্ধে হুঃয়া ব্যতীত তাঁহার অন্য উপায় নাই । মনে মনে ভাবিলেন, “এও কপালে ছিল !” নবকুমার জানিতেন না যে, বাঙ্গালী অবস্থার বশীভূত, অবস্থা বাঙ্গালীর বশীভূত হয় না । জানিলে এ দুঃখ করিতেন না । ক্রমে তাঁহারা পাদক্ষেপ মন্দ করিয়া চলিতে লাগিলেন । অন্ধকারে কিছুই লক্ষ্য হয় না ; কেবল কখনও কোথাও নক্ষত্রালোকে কোন বালকাস্ত্রপের শূদ্র শিখর অঙ্গপট দেখা যায়—কোথাও খাদ্যোত-মালাসংবৃত বৃক্ষের অবয়ব জ্ঞানগোচর হয় ।

কপালকুন্ডলা পথিককে সমাভিব্যাহারে লইয়া, নিভৃত কাননাভ্যন্তরে উপনীত হইলেন । তখন রাত্রি দ্বিতীয় প্রহর । সন্মুখে অন্ধকারে বনমধ্যে এক অত্যুচ্চ দেবালয়চূড়া লক্ষিত হইল ; তন্মিকটে ইষ্টকনির্মিত প্রাচীরবেষ্টিত একটি গৃহও দেখা গেল । কপালকুন্ডলা

প্রাচীরদ্বারের নিকটস্থ হইয়া তাহাতে করাঘাত করিতে লাগিলেন ;
পুনঃ পুনঃ করাঘাত করাতে ভিতর হইতে এক ব্যক্তি কহিল, “কে
ও, কপালকুণ্ডলা বন্ধি ?” কপালকুণ্ডলা কহিলেন, “দ্বার খোল ।”

উত্তরকারী আসিয়া দ্বার খুলিয়া দিল । যে ব্যক্তি দ্বার খুলিয়া
দিল, সে ঐ দেবালয়াধিষ্ঠাত্রী দেবতার সেবক বা অধিকারী ; বয়সে
পঞ্চাশৎ বৎসর অতিক্রম করিয়াছিল । কপালকুণ্ডলা তাঁহার
বিরলকেশ মস্তক কর দ্বারা আকর্ষিত করিয়া আপন অধরের নিকট
তাঁহার শ্রবণেন্দ্রিয় আনিলেন এবং দুই চারি কথায় নিজ সঙ্গীর
অবস্থা বুঝাইয়া দিলেন । অধিকারী বহুক্ষণ পর্য্যন্ত করতললগ্নশীর্ষ
হইয়া চিন্তা করিতে লাগিলেন । পরিশেষে কহিলেন, “এ বড় বিষম
ব্যাপার । মহাপুরুষ মনে করিলেন যে সকল করিতে পারেন । যাহা
হউক, মায়ের প্রসাদে তোমার অমঙ্গল ঘটিবে না । সে ব্যক্তি
কোথায় ?”

কপালকুণ্ডলা, “আইস” বলিয়া নবকুমারকে আহ্বান করিলেন ।
নবকুমার অন্তরালে দাঁড়াইয়াছিলেন, আহুত হইয়া গৃহমধ্যে প্রবেশ
করিলেন । অধিকারী তাঁহাকে কহিলেন, “আজি এইখানে লুকাইয়া
থাক, কার্লি প্রত্যুষে তোমাকে মেদিনীপুরের পথে রাখিয়া আসিব ।”

ক্রমে কথায় কথায় অধিকারী জানিতে পারিলেন যে, এ পর্য্যন্ত
নবকুমারের আহারাদি হয় নাই । ইহাতে অধিকারী তাঁহার আহারের
আয়োজন করিতে প্রবৃত্ত হইল, নবকুমার আহারে নিতান্ত অস্বীকৃত
হইয়া কেবলমাত্র বিশ্রামস্থানের প্রার্থনা জানাইলেন । অধিকারী
নিজ রন্ধনশালায় নবকুমারের শয্যা প্রস্তুত করিয়া দিলেন । নবকুমার
শয়ন করিলে, কপালকুণ্ডলা সমুদ্রতীরে প্রত্যাগমন করিবার উদ্যোগ
করিলেন । অধিকারী তাঁহার প্রতি স্নেহ নয়নে দৃষ্টিপাত করিয়া
কহিলেন, “স্বাইও না । ক্ষণেক দাঁড়াও, এক ভিক্ষা আছে ।”

কপালকুণ্ডলা । কি ?

অধিকারী । তোমাকে দেখিয়া পর্য্যন্ত মা বলিয়া থাকি, দেবীর
পাদস্পর্শ করিয়া শপথ করিতে পারি যে, মাতার অধিক তোমাকে

স্নেহ করি। আমার ভিক্ষা অবহেলা করিবে না ?

কপালকুণ্ডলা। করিব না।

অধিকারী। আমার এই ভিক্ষা, তুমি আর সেখানে ফিরিয়া যাইও না।

কপালকুণ্ডলা। কেন ?

অধিকারী। গেলে তোমার রক্ষা নাই।

কপালকুণ্ডলা। তা ত জানি।

অধিকারী। তবে আর জিজ্ঞাসা কর কেন ?

কপালকুণ্ডলা। না গিয়া কোথায় যাইব ?

অধিকারী। এই পথিকের সঙ্গে দেশান্তরে যাও।

কপালকুণ্ডলা নীরব হইয়া রহিলেন। অধিকারী কহিলেন, “মা, কি ভাবিতেছ ?”

কপালকুণ্ডলা। যখন তোমার শিষ্য আসিয়াছিল, তখন তুমি কহিয়াছিলে যে, যুবতীর এরূপ যুবাপদ্রব্যের সহিত যাওয়া অনর্দিত ; এখন যাইতে বল কেন ?

অধিকারী। তখন তোমার জীবনের আশঙ্কা করি নাই, বিশেষ যে সদপায়ের সম্ভাবনা ছিল না, এখন সে সদপ্যু হইতে পারিবে। আইস, মায়ের অনর্দমিতি লইয়া আসি।

এই বলিয়া অধিকারী দীপহস্তে দেবালয়ের দ্বারে গিয়া দ্বারোদঘাটন করিলেন। কপালকুণ্ডলাও তাহার সঙ্গে সঙ্গে গেলেন। মন্দির-মধ্যোত্তমানবাকারপরিমিতা করাল কালীমূর্তি সংস্থাপিত ছিল। উভয়ে ভক্তিভাবে প্রণাম করিলেন। অধিকারী আচমন করিয়া পদ্পপাত্র হইতে একটি অচ্ছিন্ন বিশ্বপত্র লইয়া মন্ত্রপুত্র করিলেন, এবং তাহা প্রতিমার পাদোপরি সংস্থাপিত করিয়া তৎপ্রতি চাহিয়া রহিলেন। ক্ষণেক পরে অধিকারী কপালকুণ্ডলাকে কহিলেন,

“মা, দেখ, দেবী ঈশ্বর্য গ্রহণ করিয়াছেন ; বিলম্বিত পড়ে নাই, যে মানস করিয়া অর্ঘ্য দিয়াছিলাম, তাহাতে অবশ্য মঙ্গল। তুমি এই পথিকের সঙ্গে স্বচ্ছন্দে গমন কর। কিন্তু আমি বিষয়ী লোকের

রীতি চরিত্র জানি। তুমি যদি গলগ্রহ হইয়া ইহার সঙ্গে যাও, তবে এ ব্যক্তি অপরিচিত যুবতী সঙ্গে লইয়া লোকালয়ে লজ্জা পাইবে। তোমাকে লোকে ঘৃণা করিবে। তুমি বলিতেছ, এ ব্যক্তি ব্রাহ্মণ-সন্তান; গলাতেও যজ্ঞোপবীত দেখিতেছি। এ যদি তোমাকে বিবাহ করিয়া লইয়া যায়, তবে সকল মঙ্গল। নচেৎ আমিও তোমাকে ইহার সহিত যাইতে বলিতে পারি না।”

“বি—বা—হ।” এই কথাটি কপালকুণ্ডলা অতি ধীরে ধীরে উচ্চারণ করিলেন। বলিতে লাগিলেন, “বিবাহের নাম ত তোমাদিগের মূখে শুনিয়া থাকি, কিন্তু কাহাকে বলে সর্বিশেষ জানি না। কি করিতে হইবে?”

অধিকারী ঈশ্বরহাস্য করিয়া কহিলেন, “বিবাহ স্ত্রীলোকের একমাত্র ধর্মের সোপান; এই জন্য স্ত্রীকে সহধর্মিণী বলে; জগন্মাতাও শিবের বিবাহিতা।”

অধিকারী মনে করিলেন, সকলই বুঝাইলেন। কপালকুণ্ডলা মনে করিলেন, সকলই বুঝিলেন। বলিলেন,

“তাহাই হউক। কিন্তু তাহাকে ত্যাগ করিয়া যাইতে আমার মন সরিতেছে না। তিনি যে আমাকে একদিন প্রতিপালন করিয়াছেন।”

অধিকারী। কি জন্য প্রতিপালন করিয়াছেন, তাহা জান না।

এই বলিয়া অধিকারী তান্ত্রিক সাধনে স্ত্রীলোকের যে সম্বন্ধ, তাহা অস্পষ্ট রকম কপালকুণ্ডলাকে বুঝাইবার চেষ্টা করিলেন। কপালকুণ্ডলা তাহা কিছু বুঝিল না, কিন্তু তাহার বড় ভয় হইল। বলিল, “তবে বিবাহই হউক।”

এই বলিয়া উভয়ে মন্দির হইতে বাহির হইলেন। এক কক্ষ-মধ্যে কপালকুণ্ডলাকে বসাইয়া, অধিকারী, নবকুমারের শয্যাসন্নিধানে গিয়া তাহার শিওরে বসিলেন। জিজ্ঞাসা করিলেন, ‘মহাশয়! নির্দ্রুত কি?’

নবকুমারের নিদ্রা যাইবার অবস্থা নহে; নিজদশা ভাবিতেছিলেন।

বলিলেন, “আজ্ঞে না।”

অধিকারী কহিলেন, “মহাশয়! পরিচয়টা লইতে একবার আসিলাম, আপনি ব্রাহ্মণ ?

নবকুমার। আজ্ঞা হাঁ।

অধিকারী। কোন্ শ্রেণী ?

নবকুমার। রাঢ়ীয় শ্রেণী।

অধিকারী। আমরাও রাঢ়ীয় ব্রাহ্মণ—উৎকল ব্রাহ্মণ বিবেচনা করিবেন না। বংশে কুলাচার্য্য, তবে এক্ষণে মায়ের পদাশ্রয়ে আছি। মহাশয়ের নাম ?

নবকুমার। নবকুমার শর্মা।

অধিকারী। নিবাস ?

নবকুমার। সপ্তগ্রাম।

অধিকারী। আপনারা কোন্ গাঁই ?

নবকুমার। বন্দ্যঘটী।

অধিকারী। কয় সংসার করিয়াছেন ?

নবকুমার। এক সংসার মাত্র।

নবকুমার সকল কথা খুলিয়া বলিলেন না। প্রকৃতপক্ষে তাঁহার এক সংসারও ছিল না। তিনি রামগোবিন্দ ঘোষালের কন্যা পদ্মাবতীকে বিবাহ করিয়াছিলেন। বিবাহের পর পদ্মাবতী কিছু দিন পিত্রালয়ে রহিলেন। মধ্যে মধ্যে শ্বশুরালয়ে যাতায়াত করিতেন। যখন তাঁহার বয়স ত্রয়োদশ বৎসর, তখন তাঁহার পিতা সপরিবারে পূরুষোত্তম দর্শনে গিয়াছিলেন। এই সময়ে পাঠানেরা আকবর শাহ কর্তৃক বঙ্গদেশ হইতে দূরীভূত হইয়া উড়িষ্যা সদলে বসতি করিতেছিল। তাহাদিগের দমনের জন্য আকবর শাহ বিধিমেতে যত্ন পাইতে লাগিলেন। যখন রামগোবিন্দ ঘোষাল উড়িষ্যা হইতে প্রত্যাগমন করেন, তখন মোগল পাঠানের ষড়্ধ আরম্ভ হইয়াছে। আগমন কালে তিনি পথিমধ্যে পাঠানসেনার হস্তে পতিত হইলেন। পাঠানেরা তৎকালে ভদ্রাভদ্র বিচারশূন্য, তাহারা নিরপরাধী পথিকের

প্রতি অর্থের জন্য বলপ্রকাশের চেষ্টা করিতে লাগিল। রামগোবিন্দ কিছু উগ্রস্বভাব ; পাঠানদিগকে কটু কহিতে লাগিলেন। ইহার ফল এই হইল যে, সপরিবারে অবরুদ্ধ হইলেন ; পরিশেষে জাতীয় ধর্ম বিসর্জনপদ্বীপক সপরিবারে মুসলমান হইয়া নিষ্কৃতি পাইলেন।

রামগোবিন্দ ঘোষাল সপরিবারে প্রাণ লইয়া বাটী আসিলেন বটে, কিন্তু মুসলমান বলিয়া আত্মীয় জনসমাজে এককালীন পরিত্যক্ত হইলেন। এই সময় নবকুমারের পিতা বর্তমান ছিলেন, তাঁহাকে সন্তরাং জাতিভ্রষ্ট বৈবাহিকের সহিত জাতিভ্রষ্টা পদগ্রবন্ধকে ত্যাগ করিতে হইল। আর নবকুমারের সহিত তাঁহার স্ত্রীর সাক্ষাৎ হইল না।

স্বজনতান্ত্র সমাজচ্যুত হইয়া রামগোবিন্দ ঘোষাল অধিক দিন স্বদেশে বাস করিতে পারিলেন না। এই কারণেও বটে এবং রাজপ্রাসাদে উচ্চপদস্থ হইবার আকাঙ্ক্ষায়ও বটে, তিনি সপরিবারে রাজধানী রাজমহলে গিয়া বসতি করিতে লাগিলেন। ধর্মাস্তর গ্রহণ করিয়া তিনি সপরিবারে মহম্মদীয়া নাম ধারণ করিয়াছিলেন। রাজমহলে যাওয়ার পরে শব্দরের বা বনিতার কি অবস্থা হইল, তাহা নবকুমারের জানিতে পারিবার কোন উপায় রহিল না এবং এ পর্য্যন্ত কখন কিছু জানিতেও পারিলেন না। নবকুমার বিরাগবশতঃ আর দারপরিগ্রহ করিলেন না। এই জন্য বলিতেছি, নবকুমারের “এক সংসারও” নহে।

অধিকারী এ সকল বৃত্তান্ত অবগত ছিলেন না। তিনি বিবেচনা করিলেন, “কুলীনের সন্তানের দুই সংসারে আপত্তি কি ?” প্রকাশ্যে কহিলেন, আপনাকে একটা কথা জিজ্ঞাসা করিতে আসিয়াছিলাম। এই যে কন্যা আপনার প্রাণরক্ষা করিয়াছে—এ পরহিতার্থ আত্মপ্রাণ নষ্ট করিয়াছে। যে মহাপুরুষের আশ্রয়ে ইহার বাস, তিনি অতি ভয়ঙ্করস্বভাব। তাঁহার নিকট প্রত্যাগমন করিলে, আপনার যে দশা ঘটিতোছিল, ইহার সেই দশা ঘটিবে। ইহার কোন উপায় বিবেচনা করিতে পারেন কি না ?”

নবকুমার তাঁঁয়া বসিলেন । কহিলেন, “আমিও সেই আশঙ্কা করিতেছিলাম । আপনি সকল অবগত আছেন—ইহার উপায় করুন । আমার প্রাণদান করিলে যদি কোন প্রত্যুপকার হয়—তবে তাহাতেও প্রস্তুত আছি । আমি এমন সঙ্কল্প করিতেছি যে, আমি সেই নর-ঘাতকের নিকট প্রত্যাগমন করিয়া আত্মসমর্পণ করি । তাহা হইলে ইহার রক্ষা হইবে ।” অধিকারী হাস্য করিয়া কহিলেন, “তুমি বাতুল । ইহাতে কি ফল দর্শিবে ? তোমারও প্রাণসংহার হইবে—অথচ ইহার প্রতি মহাপুরুষের ক্রোধোপশম হইবে না । ইহার একমাত্র উপায় আছে ।”

নবকুমার । সে কি উপায় ?

অধিকারী । আপনার সহিত ইহার পলায়ন । কিন্তু সে অতি দুর্ঘট । আমার এখানে থাকিলে দুই এক দিনের মধ্যে ধৃত হইবে । এ দেবালয়ে মহাপুরুষের সর্বদা যাতায়াত । সুতরাং কপালকুণ্ডলার অদৃষ্টে অশুভ দেখিতেছি ।

নবকুমার আগ্রহসহকারে জিজ্ঞাসা করিলেন, “আমার সহিত পলায়ন দুর্ঘট কেন ?”

অধিকারী । এ কাহার কন্যা,—কোন কুলে জন্ম, তাহা আপনি কিছুই জানেন না । কাহার পত্নী,—কি চরিত্রা, তাহা কিছুই জানেন না ! আপনি ইহাকে কি সঙ্গিনী করিবেন ? সঙ্গিনী করিয়া লইয়া গেলেও কি আপনি ইহাকে নিজগৃহে স্থান দিবেন ? আর যদি স্থান না দেন, তবে এ অনাথা কোথায় যাইবে ?

নবকুমার ক্ষণেক চিন্তা করিয়া কহিলেন, “আমার প্রাণক্ষয়িত্রীর জন্য কোন কার্য আমার অসাধ্য নহে । ইনি আমার আত্মপরিবারস্থা হইয়া থাকিবেন ।”

অধিকারী । ভাল । কিন্তু যখন আপনার আত্মীয়-স্বজন জিজ্ঞাসা করিবে যে, এ কাহার স্ত্রী, কি উত্তর দিবেন ?

নবকুমার পুনর্ব্বার চিন্তা করিয়া কহিলেন, “আপনিই ইহার পরিচয় আমাকে দিন । আমি সেই পরিচয় সকলকে দিব ।”

অধিকারী । ভাল । কিন্তু এই পক্ষান্তরের পথ যুবক যুবতী অনন্যসহায় হইয়া কি প্রকারে যাইবে ? লোকে দেখিয়া শুনিয়া কি বলিবে ? আত্মীয়-স্বজনের নিকট কি বুঝাইবে ? আর আমিও এই কন্যাকে মা বলিয়াছি, আমিই বা কি প্রকারে ইঁহাকে অজ্ঞাতচরিত্র যুববার সহিত একাকী দূরদেশে পাঠাইয়া দিই ?

ঘটকরাজ ঘটকালিতে মন্দ নহেন ।

নবকুমার কহিলেন, “আপনি সঙ্গে আসুন ।”

অধিকারী । আমি সঙ্গে যাইব ? ভবানীর পূজা কে করিবে ?

নবকুমার ক্ষুণ্ণ হইয়া কহিলেন, “তবে কি কোন উপায় করিতে পারেন না ?”

অধিকারী । একমাত্র উপায় হইতে পারে,—সে আপনার ঔদার্য্য গুণের অপেক্ষা করে ।

নবকুমার । সে কি ? আমি কিসে অস্বীকৃত ? কি উপায় বলুন ?

অধিকারী । শুনুন । ইনি ব্রাহ্মণকন্যা । ইঁহার বৃত্তান্ত আমি সৰ্বিশেষ অবগত আছি । ইনি বাল্যকালে দূরন্ত খ্রীষ্টিয়ান তস্কর কতৃক অপহৃত হইয়া যানভঙ্গপ্রযুক্ত তাহাদিগের দ্বারা কালে এ সমুদ্র-তীরে ত্যক্ত হয়েন । সে সকল বৃত্তান্ত পশ্চাৎ ইঁহার নিকট আপনি সৰ্বিশেষ অবগত হইতে পারিবেন । কাপালিক ইঁহাকে প্রাপ্ত হইয়া আপন ষোগসিদ্ধিমানসে প্রতিপালন করিয়াছিলেন । অচিরাৎ আত্ম-প্রয়োজন সিদ্ধ করিতেন । ইনি এ পর্য্যন্ত অনুঢ়া ; ইঁহার চরিত্র পরম পবিত্র । আপনি ইঁহাকে বিবাহ করিয়া গৃহে লইয়া যান । কেহ কোন কথা বলিতে পারিবে না । আমি যথাশাস্ত্র বিবাহ দিব ।

নবকুমার শয্যা হইতে উঠিয়া দাঁড়াইলেন । অতি দ্রুতপাদবিক্ষেপে ইতস্ততঃ ভ্রমণ করিতে লাগিলেন । কোন উত্তর করিলেন না । অধিকারী কিয়ৎক্ষণ পরে কহিলেন,

“আপনি এক্ষণে নিদ্রা যান । কল্য প্রত্যুষে আপনাকে আমি জাগরিত করিব । ইচ্ছা হয়, একাকী যাইবেন । আপনাকে মেদিনীপুরের পথে রাখিয়া আসিব ।”

এই বলিয়া অধিকারী বিদায় লইলেন। গমনকালে মনে মনে
কহিলেন, “রাঢ়দেশের ঘটকালি কি ভুলিয়া গিয়াছি না কি?”

নবম পরিচ্ছেদ : দেবমিকেতনে

“কম্ব। অলং রুদিতেন ; শ্মিরা ভব, ইতঃ পস্থানমালোকয়।”

শকুন্তলা

প্রাতে অধিকারী নবকুমারের নিকট আসিলেন। দেখিলেন,
এখনও নবকুমার শয়ন করেন নাই। জিজ্ঞাসা করিলেন, “এখন কি
কর্তব্য?”

নবকুমার কহিলেন, “আজি হইতে কপালকুণ্ডলা আমার
ধর্মপত্নী। ইহার জন্য সংসার ত্যাগ করিতে হয়, তাহাও করিব। কে
কন্যা সম্প্রদান করিবে?”

ঘটকচূড়ামণির মুখ হর্ষোৎফুল্ল হইল। মনে মনে ভাবিলেন,
“এত দিনে জগদম্বার কৃপায় আমার কপালিনীর বন্ধি গতি হইল।”
প্রকাশ্যে বলিলেন, “আমি সম্প্রদান করিব।” অধিকারী নিজ
শয়নকক্ষমধ্যে পুনঃপ্রবেশ করিলেন। একটি খুঙ্গীর মধ্যে কয়েক
খণ্ড অতি জীর্ণ তালপত্র ছিল। তাহাতে তাঁহার তিথি নক্ষত্রাদি
নির্দিষ্ট থাকিত। তৎসমুদায় সর্বশেষ সমালোচনা করিয়া আসিয়া
কহিলেন, “আজি যদিও বৈবাহিক দিন নহে—তথাচ বিবাহে কোন
বিঘ্ন নাই। গোধূলিলগ্নে কন্যা সম্প্রদান করিব। তুমি অদ্য উপবাস
করিয়া থাকিবে মাত্র। কৌলিক আচরণ সকল বাটী গিয়া করাইও।
এক দিনের জন্য তোমাদিগকে লুকাইয়া রাখিতে পারি, এমন স্থান
আছে। আজি যদি তিনি আসেন, তবে তোমাদিগের স্থান
পাইবেন না। পরে বিবাহান্তে কালি প্রাতে সপত্নীক বাটী
যাইও।”

নবকুমার ইহাতে সম্মত হইলেন। এ অবস্থায় ষতদূর সম্ভবে,
তত দূর যথাশাস্ত্র কার্য হইল। গোধূলিলগ্নে নবকুমারের সহিত

কাপালিকপালিতা সম্ম্যাসিনীর বিবাহ হইল ।

কাপালিকের কোন সংবাদ নাই । পরদিন প্রত্যুষে তিন জনে যাত্রার উদ্যোগ করিতে লাগিলেন । অধিকারী মেদিনীপুরের পথ পর্য্যন্ত তাঁহাদিগকে রাখিয়া আসিবেন ।

যাত্রাকালে কপালকুণ্ডলা কালীপ্রণামার্থ গেলেন । ভক্তিভাবে প্রণাম করিয়া পুষ্পপাত্র হইতে একাটি অভিন্ন বিশ্বপত্র প্রতিমার পাদোপরি স্থাপিত করিয়া তৎপ্রতি নিরীক্ষণ করিয়া রহিলেন । পত্রটি পাড়িয়া গেল ।

কপালকুণ্ডলা নিতান্ত ভক্তিপরায়ণা । বিশ্বদল প্রতিমাচরণচ্যুত হইল দেখিয়া ভীত হইলেন ;—এবং অধিকারীকে সংবাদ দিলেন । অধিকারীও বিষম হইলেন । কহিলেন,

“এখন নিরুপায় । এখন পতিমাত্র তোমার ধর্ম্ম । পতি শ্মশানে গেলে তোমাকে সঙ্গে সঙ্গে যাইতে হইবে । অতএব নিঃশব্দে চল ।”

সকলে নিঃশব্দে চলিলেন । অনেক বেলা হইলে মেদিনীপুরের পথে আসিয়া উপস্থিত হইলেন । তখন অধিকারী বিদায় হইলেন । কপালকুণ্ডলা কাঁদিতে লাগিলেন । পৃথিবীতে যে জন তাঁহার একমাত্র সুহৃদ, সে বিদায় হইতেছে ।

অধিকারীও কাঁদিতে লাগিলেন । চক্ষের জল মুছাইয়া কপালকুণ্ডলার কাণে কাণে কহিলেন, “মা । তুই জানিস্, পরমেশ্বরীর প্রসাদে তোর সন্তানের অর্থের অভাব নাই । হিজলীর ছোট বড় সকলেই তাঁহার পূজা দেয় । তোর কাপড়ে যাহা বাঁধিয়া দিয়াছি, তাহা তোর স্বামীর নিকট দিয়া তোকে পাশ্চকী করিয়া দিতে বলিস্ । —সন্তান বলিয়া মনে করিস্ ।”

অধিকারী এই বলিয়া কাঁদিতে কাঁদিতে গেলেন । কপালকুণ্ডলাও কাঁদিতে কাঁদিতে চলিলেন ।

দ্বিতীয় খণ্ড

প্রথম পরিচ্ছেদ : রাজপথে

“—There—now lean on me :

Place your foot here—”

Manfred

নবকুমার মেদিনীপুরে আসিয়া অধিকারীর প্রদত্ত ধনবলে কপালকুণ্ডলার জন্য একজন দাসী, একজন রক্ষক ও শিবিকাবাহক নিযুক্ত করিয়া তাঁহাকে শিবিকারোহণে পাঠাইলেন। অর্থের অপ্রাচুর্য্য হেতু স্বয়ং পদব্রজে চলিলেন। নবকুমার পূর্ব্বদিনের পরিশ্রমে ক্লান্ত ছিলেন, মধ্যাহ্নভোজনের পর বাহকেরা তাঁহাকে অনেক পশ্চাৎ করিয়া গেল। ক্রমে সন্ধ্যা হইল। শীতকালের অনিবিড় মেঘে আকাশ আচ্ছন্ন হইয়াছে। সন্ধ্যাও অতীত হইল। পৃথিবী অন্ধকারময়ী হইল। অল্প অল্প বৃষ্টিও পড়িতে লাগিল। নবকুমার কপালকুণ্ডলার সহিত একত্র হইবার জন্য ব্যস্ত হইলেন। মনে স্থির জ্ঞান ছিল যে, প্রথম সরাইতে তাঁহার সাক্ষাৎ পাইবেন, কিন্তু সরাইও আপাততঃ দেখা যায় না। প্রায় রাত্রি চারি ছয় দণ্ড হইল। নবকুমার দ্রুতপাদবিক্ষেপ করিতে করিতে চলিলেন। অকস্মাৎ কোন কঠিন দ্রব্যে তাঁহার চরণস্পর্শ হইল। পদভরে সে বস্তু খড়্ খড়্ মড়্ মড়্ শব্দে ভাঙ্গিয়া গেল। নবকুমার দাঁড়াইলেন; পদনব্বার পদচালনা করিলেন; পদনব্বার ঐরূপ হইল। পদস্পর্শে বস্তু হস্তে করিয়া তুলিয়া লইলেন। দেখিলেন, ঐ বস্তু তত্ত্বাভঙ্গার মত।

আকাশ মেঘাচ্ছন্ন হইলেও সচরাচর এমত অন্ধকার হয় না যে, অনাবৃত স্থানে স্থূল বস্তুর অবয়ব লক্ষ্য হয় না। সম্মুখে একটা বৃহৎ বস্তু পড়িয়াছিল; নবকুমার অনুভব করিয়া দেখিলেন যে, সে ভগ্ন শিবিকা, অর্থাৎ তাঁহার হৃদয়ে কপালকুণ্ডলার বিপদ আশংকা

হইল। শিবিকার দিকে যাইতে আবার ভিন্নপ্রকার পদার্থে তাঁহার পাদস্পর্শ হইল। এ স্পর্শ কোমল মনুষ্যশরীরস্পর্শের ন্যায় বোধ হইল। বসিয়া হাত বুলাইয়া দেখিলেন মনুষ্যশরীর বটে। স্পর্শ অত্যন্ত শীতল; তৎসঙ্গে দ্রব্যপদার্থের স্পর্শ অনদ্ভূত হইল। নাড়ীতে হাত দিয়া দেখিলেন, স্পন্দ নাই, প্রাণবিয়োগ হইয়াছে। বিশেষ মনঃসংযোগ করিয়া দেখিলেন, যেন নিশ্বাস-প্রশ্বাসের শব্দ শুনা যাইতেছে। নিশ্বাস আছে, তবে নাড়ী নাই কেন? এ কি রোগী? নাসিকার নিকট হাত দিয়া দেখিলেন, নিশ্বাস বহিতেছে না। তবে শব্দ কেন? হয়ত কোন জীবিত ব্যক্তিও এখানে আছে, এই ভাবিয়া জিজ্ঞাসা করিলেন, “এখানে কেহ জীবিত ব্যক্তি আছে?”

মৃদুস্বরে এক উত্তর হইল, আছি।”

নবকুমার কহিলেন, কে তুমি?”

উত্তর হইল, “তুমি কে?” নবকুমারের কণ্ঠে স্বর স্ত্রীকণ্ঠজাত বোধ হইল। ব্যগ্র হইয়া জিজ্ঞাসা করিলেন। কপালকুণ্ডলা না কি?”

স্ত্রীলোক কহিল, “কপালকুণ্ডলা কে তা জানি না—আমি পথিক, আপাততঃ দস্যুহস্তে নিষ্কুণ্ডলা হইয়াছি।”

ব্যঙ্গ শুনিয়া নবকুমার ঈষৎ প্রসন্ন হইলেন। জিজ্ঞাসিলেন, “কি হইয়াছে?”

উত্তরকারিণী কহিলেন, “দস্যুতে আমার পাঙ্কী ভাঙ্গিয়া দিয়াছে, আমার একজন বাহককে মারিয়া ফেলিয়াছে : আর সকলে পলাইয়া গিয়াছে। দস্যুরা আমার অঙ্গের অলংকার সকল লইয়া আমাকে পাঙ্কীতে বাঁধিয়া রাখিয়া গিয়াছে।”

নবকুমার অশ্বকারে অনুধাবন করিয়া দেখিলেন, যথার্থই একটি স্ত্রীলোক শিবিকাতে বস্ত্রদ্বারা দৃঢ় বন্ধনযুক্ত আছে। নবকুমার শীঘ্রহস্তে তাহার বন্ধন মোচন করিয়া কহিলেন, “তুমি উঠিতে পারিবে কি?” স্ত্রীলোক কহিল, “আমারও এক ঘা লাঠি লাগিয়াছিল; এজন্য পায়ে বেদনা আছে; কিন্তু বোধ হয়, অল্প সাহায্য করিলে

উঠিতে পারিব ।”

নবকুমার হাত বাড়াইয়া দিলেন । রমণী তৎসাহায্যে গাত্রোত্থান করিলেন । নবকুমার জিজ্ঞাসা করিলেন, চলিতে পারিবে কি ?”

স্ত্রীলোক উত্তর না করিয়া জিজ্ঞাসা করিলেন, “আপনার পশ্চাতে কেহ পৃথক আসিতেছে দেখিয়াছেন ?”

নবকুমার কহিলেন, “না ।”

স্ত্রীলোক পুনরাপি জিজ্ঞাসা করিলেন, “চটি কত দূর ?”

নবকুমার কহিলেন, “কতদূর বলিতে পারি না—কিস্তি বোধ হয় নিকট ।”

স্ত্রীলোক কহিল, অন্ধকারে একাকিনী মাঠে বসিয়া কি করিব, আপনার সঙ্গে চটি পর্য্যন্ত যাওয়া উচিত । বোধ হয়, কোন কিছুর উপর ভর করিতে পারিলে, চলিতে পারিব ।”

নবকুমার কহিলেন, “বিপৎকালে সংকোচ মূঢ়ের কাজ । আমার কাঁধে ভর করিয়া চল ।”

স্ত্রীলোকটি মূঢ়ের কাৰ্য্য করিল না । নবকুমারের স্কন্ধেই ভর করিয়া চলিল ।

যথার্থই চটি নিকটে ছিল । এ সকল কালে চটির নিকটেও দৃষ্টিয়া করিতে দস্যুরা সংকোচ করিত না । অনধিক বিলম্বে নবকুমার সমাভিব্যাহারিণীকে লইয়া তথায় উপনীত হইলেন ।

নবকুমার দেখিলেন যে, ঐ চটিতেই কপালকুণ্ডলা অবস্থিতি করিতেছিলেন । তাহার দাসদাসী তন্মুখ্য একখানা ঘর নিযুক্ত করিয়াছিল । নবকুমার স্বীয় সঙ্গিনীর জন্য তৎপার্ব্বর্ত্তী একখানা ঘর নিযুক্ত করিয়া তাঁহাকে তন্মধ্যে প্রবেশ করাইলেন । তাঁহার আজ্ঞামত গৃহস্বামীর বনিতা প্রদীপ জ্বালিয়া আনিল । যখন দীপ-রশ্মিস্রোতঃ তাহার সঙ্গিনীর শরীরে পড়িল, তখন নবকুমার দেখিলেন যে, ইনি অসামান্য সুন্দরী রূপরাশিতরঙ্গে, তাহার যৌবনশোভা শ্রাবণের নদীর ন্যায় উছলিয়া পড়িতেছিল ।

দ্বিতীয় পরিচ্ছেদ : পাশ্চনিবাসে

“কৈষা যোষিৎ প্রকৃতিচপলা”

উদ্ভবদত্ত

যদি এই রমণী নিন্দোষ সৌন্দর্য্যবিশিষ্টা হইতেন, তবে বলিতাম, “পদ্রুম পাঠক! ইনি আপনার গৃহিণীর ন্যায় সুন্দরী। আর সুন্দরী পাঠকারিণি! ইনি আপনার দর্পণস্থ ছায়ার ন্যায় রূপবতী।” তাহা হইলে রূপবর্ণনার একশেষ হইত। দুর্ভাগ্যবশতঃ ইনি সর্বাঙ্গসুন্দরী নহেন, সুতরাং নিরন্ত হইতে হইল।

ইনি যে নিন্দোষসুন্দরী নহেন, তাহা বলিবার কারণ এই যে, প্রথমতঃ ইঁহার শরীর মধ্যমাকৃতির অপেক্ষা কিঞ্চৎ দীর্ঘ ; দ্বিতীয়তঃ অধরৌষ্ঠ কিছু চাপা ; তৃতীয়তঃ প্রকৃতপক্ষে ইনি গৌরাজী নহেন।

শরীর ঈষদ্দীর্ঘ বটে, কিন্তু হস্তপদ হৃদয়াদি সর্বাঙ্গ সুগোল, সম্পূর্ণভূত। বর্ষাকালে বিটপীলতা যেমন আপন পত্ররাশির বাহুল্যে দলমল করে, ইঁহার শরীর তেমনি আপন পূর্ণতায় দলমল করিতোছিল ; সুতরাং ঈষদ্দীর্ঘ দেহও পূর্ণতাতেই অধিকতর শোভার কারণ হইয়াছিল। যাঁহাদিগকে প্রকৃতপক্ষে গৌরাজী বলি, তাঁহাদিগের মধ্যে কাহারও বর্ণ পূর্ণচন্দ্রকৌমুদীর ন্যায়, কাহারও কাহারও ঈষদারক্ত-বদনা উষার ন্যায়। ইঁহার বর্ণ এতদুভয়বিশ্জিত, সুতরাং ইঁহাকে প্রকৃত গৌরাজী বলিলাম না বটে, কিন্তু মুগ্ধকরী শক্তিতে ইঁহার বর্ণও ন্যূন নহে। ইনি শ্যামবর্ণা। “শ্যামা মা” বা “শ্যামসুন্দর” যে শ্যামবর্ণের উদাহরণ এ সে শ্যামবর্ণ নহে। তপ্ত কাণ্ডনের যে শ্যামবর্ণ, এ সেই শ্যাম পূর্ণচন্দ্রকরলেখা, অথবা হেমাম্বুদিকিরীটিনী উষা, যদি গৌরাজী-দিগের বর্ণপ্রতিমা হয়, তবে বসন্তপ্রসূত নবচুতদলরাজির শোভা এই শ্যামার বর্ণের অনুরূপ বলা যাইতে পারে। পাঠক মহাশয়দিগের মধ্যে অনেকে গৌরাজীর বর্ণের প্রতিষ্ঠা করিতে পারেন, কিন্তু যদি

কেহ এরূপ শ্যামার মস্ত্রে মগ্ন হইলেন, তবে তাঁহাকে বর্ণজ্ঞানশূন্য বলিতে পারিব না। এ কথায় যাঁহার বিরক্তি জন্মে, তিনি একবার নবচতুপল্লববিরাজী ভ্রমরশ্রেণীর তুল্য, সেই উজ্জ্বলশ্যামললার্টাবলম্বী অলকাবলী মনে করুন ; সেই সপ্তমীচন্দ্রাকৃতিললার্টতলস্ব অলকস্পর্শী প্রদীপ মনে করুন ; সেই পকবচুতোজ্জ্বল কপোলদেশ মনে করুন ; তন্মধ্যবর্তী ঘোরারক্ত ক্ষুদ্র ওষ্ঠাধর মনে করুন, তাহা হইলে এই অপরিচিতা রমণীকে সুন্দরীপ্রধানা বলিয়া অনুভব হইবে। চক্ষু দুইটি অতি বিশাল নহে, কিন্তু সুবাক্ষ্ম পল্লবরেখাবিশিষ্ট—আর অতিশয় উজ্জ্বল। তাহার কটাক্ষ স্থির, অথচ মম্মভেদী ! তোমার উপর দৃষ্টি পড়িলে তুমি তৎক্ষণাৎ অনুভূত কর যে, এ স্ত্রীলোক তোমার মন পর্য্যন্ত দেখিতেছে। দেখিতে দেখিতে সে মম্মভেদী দৃষ্টির ভাবান্তর হয় ; চক্ষু সুকোমল স্নেহময় রসে গলিয়া যায়। আবার কখনও বা তাহাতে কেবল সুখাবেশজনিত ক্রান্তিপ্ৰকাশ মাত্র, যেন সে নয়ন মস্তকের স্বপ্নশয্যা। কখনও বা লালসাবিস্ফারিত, মদনরসে টলটলায়মান। আবার কখনও লোলাপাঙ্গে ক্রুর কটাক্ষ—যেন মেঘমধ্যে বিদ্যুদ্দাম। মুখকান্তিমধ্যে দুইটি অনির্বচনীয় শোভা ; প্রথম সর্বত্রগামিনী বৃষ্টির প্রভাব, দ্বিতীয় আত্মগরিমা। তৎকারণে যখন তিনি মরালগ্রীবা বাক্ষ্ম করিয়া দাঁড়াইতেন, তখন সহজে বোধ হইত, তিনি রমণীকুলরাজ্ঞী।

সুন্দরীর বয়স্ক্রম সপ্তবিংশতি বৎসর—ভাদ্র মাসের ভরা নদী। ভাদ্র মাসের নদীজলের ন্যায়, ইঁহার রূপরাশি টলটল করিতেছিল—উছলিয়া পড়িতেছিল। বর্ণাপেক্ষা, নয়নাপেক্ষা, সর্বাপেক্ষা সেই সৌন্দর্য্যের পরিপ্লব মগ্নকর। পূর্ণাষোবনভরে সর্বশরীর সতত ঈষচ্চঞ্চল ; বিনা বায়ুতে শরতের নদী যেমন ঈষচ্চঞ্চল, তেমনি চঞ্চল ; সে চাঞ্চল্য মুহূর্ম্মুহুঃ নূতন নূতন শোভাবিকাশের কারণ। নবকুমার নিমেষশূন্যচক্ষে সেই নূতন নূতন শোভা দেখিতেছিলেন।

সুন্দরী, নবকুমারের চক্ষু নিমেষশূন্য দেখিয়া কহিলেন, “আপনি কি দেখিতেছেন, আমার রূপ ?”

নবকুমার ভদ্রলোক ; অপ্রতিভ হইয়া মৃথাবনত করিলেন ।
নবকুমারকে নিরন্তর দেখিয়া অপরিচিতা পুনরাপি হাসিয়া কহিলেন,

“আপনি কখনও কি স্ত্রীলোক দেখেন নাই, না আপনি আমাকে
বড় সুন্দরী মনে করিতেছেন ?”

সহজে এ কথা কহিলে, তিরস্কারস্বরূপ বোধ হইত, কিন্তু রমণী
যে হাসির সহিত বলিলেন । তাহাতে ব্যঙ্গ ব্যতীত আর কিছুই বোধ
হইল না । নবকুমার দেখিলেন, এ অতি মৃথরা ; মৃথরার কথায় কেন
না উত্তর করিবেন ? কহিলেন,

“আমি স্ত্রীলোক দেখিয়াছি ; কিন্তু এরূপ সুন্দরী দেখি নাই ।”

রমণী সগৰ্বে জিজ্ঞাসা করিলেন, “একটিও না ?”

নবকুমারের হৃদয়ে কপালকুণ্ডলার রূপ জাগিতেছিল ; তিনিও
সগৰ্বে উত্তর করিলেন, “একটিও না এমত বলিতে পারি না ।”

উত্তরকারিণী কহিলেন, “তবুও ভাল । সেটি কি আপনার
গৃহিণী”

নবকুমার । কেন ? গৃহিণী কেন মনে ভাবিতেছেন ?

স্ত্রী । বাঙ্গালীরা আপন গৃহিণীকে সৰ্ব্বাপেক্ষা সুন্দরী দেখে ।

নবকুমার । আমি বাঙ্গালী ; আপনিও ত বাঙ্গালীর ন্যায়
কথা কহিতেছেন, আপনি তবে কোন্ দেশীয় ?

যুবতী আপন পরিচ্ছদের প্রতি দৃষ্টি করিয়া কহিলেন, “অভাগিনী
বাঙ্গালী নহে ; পশ্চিমপ্রদেশীয়া মুসলমানী ।” নবকুমার পর্যবেক্ষণ
করিয়া দেখিলেন পরিচ্ছদ পশ্চিমপ্রদেশীয়া মুসলমানীর ন্যায় বটে ।
কিন্তু বাঙ্গালা ত ঠিক বাঙ্গালীর মতই বলিতেছি । ক্ষণপরে তরুণী
বলিতে লাগিলেন,

“মহাশয় বাগ্‌বৈদগ্ধ্য আমার পরিচয় লইলেন ;—আপন পরিচয়
দিয়া চরিতার্থ করুন । যে গৃহে সেই অদ্বিতীয়া রূপসী গৃহিণী, সে
গৃহ কোথায় ?”

নবকুমার কহিলেন, “আমার নিবাস সপ্তগ্রাম ।”

বিদেশিনী কোন উত্তর করিলেন না । সহসা তিনি মৃথাবনত

করিয়া, প্রদীপ উজ্জ্বল করিতে লাগিলেন ।

ক্ষণেক পরে মৃদু না তুলিয়া বলিলেন, “দাসীর নাম মতি ।
মহাশয়ের নাম কি শুনিতে পাই না ?”

নবকুমার বলিলেন, “নবকুমার শর্মা ।”

প্রদীপ নিবিয়া গেল ।

তৃতীয় পরিচ্ছেদ : সুন্দরী সন্দর্শনে

“—ধর দেবী মোহন মুরতি
দেহ আঞ্জা, সাজাই ও বরবন্দু আনি
নানা আভরণ !”

মেঘনাদবধ

নবকুমার গৃহস্বামীকে ডাকিয়া অন্য প্রদীপ আনিতে বলিলেন ।
অন্য প্রদীপ আনিবার পূর্বে একটি দীর্ঘনিশ্বাসশব্দ শুনিতে
পাইলেন । প্রদীপ আনিবার ক্ষণেক পরে ভৃত্যবেশী একজন মুসলমান
আসিয়া উপস্থিত হইল । বিদেশিনী তাহাকে দেখিয়া কহিলেন,

“সে কি, তোমাদিগের এত বিলম্ব হইল কেন ? আর সকলে
কোথায় ?”

ভৃত্য কহিল, “বহেকেরা সকলে মাতোয়ারা হইয়াছিল, তাহাদের
গৃহছাইয়া আনিতে আমরা পাক্কীর পশ্চাতে পড়িয়াছিলাম । পরে
ভগ্ন শিবিকা দেখিয়া এবং আপনাকে না দেখিয়া আমরা একেবারে
অজ্ঞান হইয়াছিলাম । কেহ কেহ সেই স্থানে আছে ; কেহ কেহ
অন্যান্য দিকে আপনার সম্মুখে গিয়াছে । আমি এদিকে সম্মুখে
আসিয়াছি ।”

মতি কহিলেন, “তাহাদিগকে লইয়া আইস ।”

নফর সেলাম করিয়া চলিয়া গেল, বিদেশিনী কিয়ৎকাল
করলগ্নকপোলা হইয়া বসিয়া রহিলেন ।

নবকুমার বিদায় চাহিলেন । তখন মতি স্বপ্নোথিতার ন্যায়

গাট্রোথান করিয়া পূর্ববৎভাবে জিজ্ঞাসা করিলেন, “আপনি কোথায় অবস্থিতি করিবেন?”

নবকুমার । ইহার পরের ঘরে ।

মতি । আপনার সে ঘরের কাছে একখানি পাশ্কাই দেখিলাম, আপনার কি কেহ সঙ্গী আছেন ?

“আমার স্ত্রী সঙ্গে ।”

মতিবিবি আবার ব্যঙ্গের অবকাশ পাইলেন । কহিলেন, “র্তিনই কি অদ্বিতীয়া রূপসী?”

নবকুমার । দেখিলে বদ্বিতে পারিবেন ।

মতি । দেখা কি পাওয়া যায় ?

নবকুমার । (চিন্তা করিয়া) ক্ষতি কি ?

“তবে একটু অনুগ্রহ করুন । অদ্বিতীয়া রূপসীকে দেখিতে বড় কৌতূহল হইতেছে । আগ্রা গিয়া বলিতে চাহি, কিন্তু এখনই নহে—আপনি এখন যান । ক্ষণেক পরে আমি আপনাকে সংবাদ দিব ।”

নবকুমার চলিয়া গেলেন । ক্ষণেক পরে অনেক লোকজন, দাসদাসী ও বাহক সিদ্দুক ইত্যাদি লইয়া উপস্থিত হইল । একখানি শিবিকাও আসিল ; তাহাতে একজন দাসী । পরে নরকুমারের নিকট সংবাদ আসিল, “বিবি স্মরণ করিয়াছেন ।”

নবকুমার মতিবিবির নিকট পুনরাগমন করিলেন । দেখিলেন, এবার আমার রূপান্তর । মতিবিবি, পূর্বপরিচ্ছদ ত্যাগ করিয়া, সুবর্ণমুক্তাদিশোভিত কারুকাৰ্য্যযুক্ত বেশভূষা ধারণ করিয়াছেন ; নিরলংকার দেহ অলংকারে খচিত করিয়াছেন । যেখানে যাহা ধরে—কুন্তলে, কবরীতে, কপালে, নয়নপাশে, কণ্ঠে, কণ্ঠে, হৃদয়ে, বাহুধুগে, সর্বত্র সুবর্ণমধ্য হইতে হীরকাদী রত্ন ঝলসিতেছে । নবকুমারের চক্ষু অস্থির হইল । প্রভূতনক্ষত্রমালাভূষিত আকাশের ন্যায়—মধুরায়ত শরীর সহিত অলংকারবাহুল্য সুসঙ্গত বোধ হইল, এবং তাহাতে আরও সৌন্দর্য্যপ্রভা বর্ধিত হইল । মতিবিবি নবকুমারকে কহিলেন,

“মহাশয় চলুন, আপনার পত্নীর নিকট পরিচিত হইয়া আসি ।”

নবকুমার বলিলেন, “সে জন্য অলঙ্কার পরিবার প্রয়োজন ছিল না ।
আমার পরিবারের কোন গহনাই নাই ।”

মতিবিবি । গহনাগুলি না হয় দেখাইবার জন্য পরিয়াছি ।
স্ত্রীলোকের গহনা থাকিলে সে না দেখাইলে বাঁচে না । এখন,
চলুন ।

নবকুমার মতিবিবিকে সঙ্গে করিয়া লইয়া চলিলেন । যে দাসী
শিবিকারোহণে আসিয়াছিল, সেও সঙ্গে চলিল । ইহার নাম
পেষমন্ ।

কপালকুণ্ডলা দোকানঘরের আদ্র মৃত্তিকায় একাকিনী বসিয়া
ছিলেন । একটি ক্ষীণালোক প্রদীপ জ্বলিতেছে মাত্র—অবশ্য নিবিড়
কেশরাশি পশ্চাৎভাগ অন্ধকার করিয়া রহিয়াছিল । মতিবিবি প্রথম
যখন তাঁহাকে দেখিলেন, তখন অধরপার্শ্বে ও নয়নপ্রান্তে ঈষৎ হাসি
ব্যক্ত হইল । ভাল করিয়া দেখিবার জন্য প্রদীপটি তুলিয়া
কপালকুণ্ডলার মুখের নিকট আনিলেন । তখন সে হাসি-হাসি ভাব
দূর হইল ; মতির মুখ গম্ভীর হইল ;—অনিমেঘলোচনে দেখিতে
লাগিলেন । কেহ কোন কথা কহেন না ;—মতি মুগ্ধা, কপালকুণ্ডলা
কিছু বিস্মিতা ।

ক্ষণেক পরে মতি আপন অঙ্গ হইতে অলঙ্কাররাশি মোচন করিতে
লাগিলেন । মতি আশ্রয়হীন হইতে অলঙ্কাররাশি মস্ত করিয়া একে
একে কপালকুণ্ডলাকে পরাইতে লাগিলেন । কপালকুণ্ডলা কিছু
বলিলেন না । নবকুমার কাঁহিতে লাগিলেন, “ও কি হইতেছে ?”
মতি তাহার কোন উত্তর করিলেন না ।

অলঙ্কারসমাবেশ সমাপ্ত হইলে, মতি নবকুমারকে কাঁহিলেন,
“আপনি সত্যিই বলিয়াছিলেন । এ ফুল রাজোদ্যানেও ফুটে না ।
পরিতাপ এই যে, রাজধানীতে এ রূপরাশি দেখাইতে পারিলাম না ।
এ সকল অলঙ্কার এই অঙ্গেরই উপযুক্ত—এই জন্য পরাইলাম ।
আপনিও কখন কখন পরাইয়া মদুখরা বিদেশিনীকে মনে করিবেন ।”

নবকুমার চমৎকৃত হইয়া কাঁহিলেন, “সে কি ! এ যে বহুমূল্য

অলঙ্কার ; আমি এ সব লইব কেন ?”

মতি কহিলেন, “ঈশ্বরপ্রসাদাৎ আমার আর আছে । আমি নিরাভরণা হইব না । ইহাকে পরাইয়া আমার যদি সুখবোধ হয়, আপনি কেন ব্যাঘাত করেন ?”

মতিবিবি ইহা কহিয়া দাসিসঙ্গে চলিয়া গেলেন । বিবলে আসিলে পেশমন্ মতিবিবিকে জিজ্ঞাসা করিল,

“বিবিজান ! এ ব্যক্তি কে ?”

যবনবালা উত্তর করিলেন, “মেরা শোহর ।”

চতুর্থ পরিচ্ছেদ : শিবিকারোহণে

“—খুলিন্দু সত্বরে,

কঙ্কণ, বলয়, হার, সঁখি, কণ্ঠমালা,

কুণ্ডল, নুপুর, কাণ্ঠ ।”

মেঘনাদবধ

গহনার দশা কি হইল, বলি শুন । মতিবিবি গহনা রাখিবার জন্য একটি রৌপ্যজড়িত হস্তদন্তের কোটা পাঠাইয়া দিলেন । দস্দারা তাঁহার অল্প সামগ্রীই লইয়াছিল—নিকটে যাহা ছিল, তদ্ব্যতীত কিছুই পায় নাই ।

নবকুমার দুই একখানি গহনা কপালকুণ্ডলার সঙ্গে রাখিয়া অধিকাংশ কোটায় তুলিয়া রাখিলেন । পরদিন প্রভাতে মতিবিবি বস্ত্রমানাভিমুখে, নবকুমার সপত্নীক সপ্তগ্রামাভিমুখে যাত্রা করিলেন । নবকুমার কপালকুণ্ডলাকে শিবিকাতে তুলিয়া দিয়া তাঁহার সঙ্গে গহনার কোটা দিলেন । বাহকেরা সহজেই নবকুমারকে পশ্চাৎ করিয়া চলিল । কপালকুণ্ডলা শিবিকাদ্বার খুলিয়া চারিদিক্ দেখিতে দেখিতে বাইতেছিলেন । একজন ভিক্ষুক তাঁহাকে দেখিতে পাইয়া ভিক্ষা চাইতে চাইতে পাশ্চকীর সঙ্গে সঙ্গে চলিল ।

কপালকুণ্ডলা কহিলেন, “আমার ত কিছু নাই, তোমাকে

কি দিব ?”

ভিক্ষুক কপালকুণ্ডলার অঙ্গে যে দুই একখানা অলংকার ছিল, তৎপ্রতি অঙ্গুলিনির্দেশ করিয়া কহিল, “সে কি মা ! তোমার গায়ে হীরা মস্তা—তোমার কিছই নাই ?”

কপালকুণ্ডলা জিজ্ঞাসা করিলেন, “গহনা পাইলে তুমি সন্তুষ্ট হও ?”

ভিক্ষুক কিছু বিস্মিত হইল। ভিক্ষুকের আশা অপরিমিত। ক্ষণমাত্র পরে কহিল, “হই বই কি ?”

কপালকুণ্ডলা অকপটহৃদয়ে কোটাসমেত সকল গহনাগুলি ভিক্ষুকের হস্তে দিলেন। অঙ্গের অলংকারগুলিও খুলিয়া দিলেন।

ভিক্ষুক ক্ষণেক বিহ্বল হইয়া রহিল। দাসদাসী কিছুমাত্র জানিতে পারিল না। ভিক্ষুকের বিহ্বলভাব ক্ষণিকমাত্র। তখনই এদিক ওদিক চাহিয়া গহনা লইয়া উদ্দিশ্বাসে পলায়ন করিল। কপালকুণ্ডলা ভাবিলেন, “ভিক্ষুক দৌড়িল কেন ?”

পঞ্চম পরিচ্ছেদ : স্বদেশে

“শব্দাখ্যেয়ং যদিপি কিল তে যঃ সখীনাং পূরস্তাৎ ।

কর্ণে লোলঃ কথ্যিতুমভূদাননস্পর্শলোভাৎ ॥”

মেঘদূত

নবকুমার কপালকুণ্ডলাকে লইয়া উপনীত হইলেন। নবকুমার পিতৃহীন, তাঁহার বিধবা মাতা গৃহে ছিলেন, আর দুই ভগিনী ছিল। জ্যেষ্ঠা বিধবা ; তাঁহার সহিত পাঠক মহাশয়ের পরিচয় হইবে না। দ্বিতীয়া শ্যামাসুন্দরী সধবা হইয়াও বিধবা ; কেন না তিনি কদলীনপত্নী। তিনি দুই একবার আমাদের দেখা দিবেন।

অবস্থান্তরে নবকুমার অজ্ঞাতকদলশীলা তপস্বিনীকে বিবাহ করিয়া গৃহে আনায়, তাঁহার আত্মীয়-স্বজন কতদূর সন্তুষ্টিপ্রকাশ করিতেন, তাহা আমরা বলিয়া উঠিতে পারিলাম না। প্রকৃতপক্ষে এ বিষয়ে তাঁহাকে কোন ক্লেশ পাইতে হয় নাই। সকলেই তাঁহার

প্রত্যাগমনপক্ষে নিরাশ্বাস হইয়াছিল। সহযাত্রীরা প্রত্যাগমন করিয়া রটনা করিয়াছিলেন যে, নবকুমারকে ব্যাঘ্রে হত্যা করিয়াছে। পাঠক মহাশয় মনে করিবেন যে, এই সত্যবাদীরা আত্মপ্রতীতি মতই কহিয়াছিলেন ;—কিন্তু ইহা স্বীকার করিলে তাঁহাদিগের কল্পনাশক্তির অবমাননা করা হয়। প্রত্যাগত যাত্রীর মধ্যে অনেকে নিশ্চিত করিয়া কহিয়াছিলেন যে, নবকুমারকে ব্যাঘ্রমুখে পড়িতে তাঁহারা প্রত্যক্ষই দৃষ্টি করিয়াছিলেন। কখনও কখনও ব্যাঘ্রটার পরিমাণ লইয়া তর্কবিতর্ক হইল ; কেহ বলিলেন ; “ব্যাঘ্রটা আট হাত হইবেক—” ; কেহ বলিলেন, “না, প্রায় চৌদ্দ হাত।” পদ্ব্যপরিচিত প্রাচীন যাত্রী কহিলেন, “যাহা হউক, আমি বড় রক্ষা পাইয়াছিলাম। ব্যাঘ্রটা আমাকে অগ্রে তাড়া করিয়াছিল, আমি পলাইলাম ; নবকুমার তত সাহসী পদ্রুপ নহে ; পলাইতে পারিল না।”

যখন এই সকল রটনা নবকুমারের মাতা প্রভূতির কর্ণগোচর হইল, তখন পদ্রুপে এমত ক্রন্দনধ্বনি উঠিল যে, কয়দিন তাহার ক্ষান্তি হইল না। একমাত্র পদ্রুপের মৃত্যুসংবাদে নবকুমারের মাতা একেবারে মৃতপ্রায় হইলেন। এমত সময়ে যখন নবকুমার সম্ভ্রমিক হইয়া বাটী আগমন করিলেন, তখন তাঁহাকে কে জিজ্ঞাসা করে যে, তোমার বধু কোন্ জাতীয়া বা কাহার কন্যা ? সকলেই আহ্লাদে অন্ধ হইল। নবকুমারের মাতা মহাসমাদরে বধু বরণ করিয়া গৃহে লইলেন।

যখন নবকুমার দেখিলেন যে, কপালকুণ্ডলা তাঁহার গৃহমধ্যে সাদরে গৃহীতা হইলেন, তখন তাঁহার আনন্দ-সাগর উছলিয়া উঠিল। অনাদরের ভয়ে তিনি কপালকুণ্ডলাকে লাভ করিয়াও কিছুমাত্র আহ্লাদ বা প্রণয়লক্ষণ প্রকাশ করেন নাই ;—অথচ তাঁহার হৃদয়াকাশ কপালকুণ্ডলার মূর্তিতেই ব্যাপ্ত হইয়া রহিয়াছিল। এই আশঙ্কাতেই তিনি কপালকুণ্ডলার পাণিগ্রহণ প্রস্তাবে অকস্মাৎ সম্মত হইবেন নাই, এই আশঙ্কাতেই পাণিগ্রহণ করিয়াও গৃহাগমন পর্যন্তও বারেকমাত্র কপালকুণ্ডলার সহিত প্রণয়সম্ভাষণ করেন নাই ; পরিপূর্বোক্ত

অনুরাগসিদ্ধিতে বীচিমাত্র বিক্ষিপ্ত হইতে দেন নাই। কিন্তু সে আশঙ্কা দূর হইল ; জলরাশির গতিমুখ হইতে বেগনিরোধকারী উপলমোচনে যেমন দৃন্দম স্রোতাবেগ জন্মে, সেইরূপ বেগে নবকুমারের প্রণয়সিদ্ধ উছলিয়া উঠিল।

এই প্রেমাবির্ভাব সর্বদা কথায় ব্যস্ত হইত না, কিন্তু নবকুমার কপালকুণ্ডলাকে দেখিলেই ষেরূপ সজললোচনে তাঁহার প্রতি অনিমেষ চাহিয়া থাকিতেন, তাহাতেই প্রকাশ পাইত ; ষেরূপ নিঃপ্রয়োজনে, প্রয়োজন কম্পনা করিয়া কপালকুণ্ডলার কাছে আসিতেন, তাহাতে প্রকাশ পাইত ; ষেরূপ বিনাপ্রসঙ্গে কপালকুণ্ডলার কাছে আসিতেন, তাহাতে প্রকাশ পাইত ; ষেরূপ বিনাপ্রসঙ্গে কপালকুণ্ডলার প্রসঙ্গ উত্থাপনের চেষ্টা পাইতেন, তাহাতে প্রকাশ পাইত ; ষেরূপ দিবানিশি কপালকুণ্ডলার স্নেহস্বচ্ছন্দতার অবেষণ করিতেন, তাহাতে প্রকাশ পাইত ; সর্বদা অন্যমনস্কতাসূচক পদবিক্ষেপেও প্রকাশ পাইত। তাঁহার প্রকৃতি পর্য্যন্ত পরিবর্তিত হইতে লাগিল। যেখানে চাপল্য ছিল, সেখানে গাভীৰ্য্য জন্মিল ; যেখানে অপ্রসাদ ছিল, সেখানে প্রসন্নতা জন্মিল ; নবকুমারের মুখ সর্বদাই প্রফুল্ল। হৃদয় স্নেহের আধার হওয়াতে অপর সকলের প্রতি স্নেহের আধিক্য জন্মিল ; বিরক্তিজনের প্রতি বিরাগের লাঘব হইল ; মনুষ্যমাত্র প্রেমের পাত্র হইল ; পৃথিবী সংকল্পের জন্য মাত্র সৃষ্টা বোধ হইতে লাগিল ; সকল সংসার সুন্দর বোধ হইতে লাগিল ; প্রণয় এইরূপ ! প্রণয় ককর্ষকে মধুর করে, অসংকে সং করে, অপদ্রব্যকে পদ্রব্যবান্ করে অন্ধকারকে আলোকময় করে !

আর কপালকুণ্ডলা ? তাহার কি ভাব ! চল পাঠক, তাহাকে দর্শন করি।

ষষ্ঠ পরিচ্ছেদ : অবরোধে

“কিমিত্যপাস্যাভরণানি যৌবনে
ধৃতং ত্বয়া বান্ধকশোভি বন্ধকলম্ ।
বদ প্রদোষে স্কটচন্দ্রতারকা
বিভাবরী যদ্যরুণায় কল্পতে ॥

কুমারসম্ভব

সকলেই অবগত আছেন যে, পূর্ব্বকালে সপ্তগ্রাম মহাসমৃদ্ধিশালী নগর ছিল। এককালে যবদ্বীপ হইতে রোমক পর্য্যন্ত সর্ব্বদেশের বাণিকেরা বাণিজ্যার্থ এই মহানগরে মিলিত হইত। কিন্তু বঙ্গীয় দশম একাদশ শতাব্দীতে সপ্তগ্রামে প্রাচীন সমৃদ্ধির লাঘব জন্মিয়াছিল। ইহার প্রধান কারণ এই যে, তন্নগরের প্রান্তভাগ প্রক্ষালিত করিয়া যে স্রোতস্বতী বাহিত হইত, এক্ষণে তাহা সংকীর্ণশরীরী হইয়া আসিতেছিল; সুতরাং বৃহদাকার জলযান সকল আর নগর পর্য্যন্ত আসিতে পারিত না। এ কারণে বাণিজ্যবাহুল্য ক্রমে লুপ্ত হইতে লাগিল। বাণিজ্যগোরব নগরের বাণিজ্যনাশ হইলে সকলেই যায়। সপ্তগ্রামের সকলই গেল। বঙ্গীয় একাদশ শতাব্দীতে হুগলী নতুন সৌষ্ঠবে তাহার প্রতিযোগী হইয়া উঠিতেছিল। তথায় পত্তঙ্গীসেরা বাণিজ্য আরম্ভ করিয়া সপ্তগ্রামের ধনলক্ষ্মীকে আকর্ষিতা করিতেছিলেন কিন্তু তখনও সপ্তগ্রাম একেবারে হতশ্রী হয় নাই। তথায় এ পর্য্যন্ত ফৌজদার প্রভৃতি প্রধান রাজপদ্রুষদিগের বাস ছিল; কিন্তু তখনও অনেকাংশ শ্রীভ্রষ্ট এবং বসতিহীন হইয়া পল্লীগ্রামের আকার ধারণ করিয়াছিল।

সপ্তগ্রামের এক নিষ্কর্জন উপনগরি ভাগে নবকুমারের বাস। এক্ষণে সপ্তগ্রামের ভগ্নদশায় তথায় প্রায় মনুষ্যসমাগম ছিল না; রাজপথ সকল লতাগুন্মাদিত পরিপূরিত হইয়াছিল। নবকুমারের

বাটীর পশ্চাৎভাগেই এক বিস্তৃত নিবিড় বন। বাটীর সম্মুখে প্রায় ক্রোশার্ধ দূরে একটি ক্ষুদ্র খাল বিহিত ; সেই খাল একটা ক্ষুদ্র প্রান্তর বেষ্টিত করিয়া গৃহের পশ্চাৎভাগস্থ বনমধ্যে প্রবেশ করিয়াছিল। গৃহটি ইষ্টকরিচিত ; দেশকাল বিবেচনা করিলে তাহাকে নিতান্ত সামান্য গৃহ বলা যাইতে পারিত না। দোতালা বটে, কিন্তু ভয়ানক উচ্চ নহে ; এখন একতলায় সেরূপ উচ্চতা অনেক দেখা যায়।

এই গৃহের ছাদের উপরে দুইটি নবীনবয়সী স্ত্রীলোক দাঁড়াইয়া চতুর্দিক্ অবলোকন করিতেছিলেন। সন্ধ্যাকাল উপস্থিত। চতুর্দিকে যাহা দেখা যাইতেছিল, তাহা লোচনরঞ্জন বটে। নিকটে, একদিকে নিবিড় বন ; তন্মধ্যে অসংখ্য পক্ষী কলরব করিতেছে। অন্যদিকে ক্ষুদ্র খাল, রূপার সূতার ন্যায় পড়িয়া রহিয়াছে। দূরে মহানগরের অসংখ্য মৌধমালা, নববসন্তপবন স্পর্শলোলরূপ নাগরিকগণে পরিপূরিত হইয়া শোভা করিতেছে। অন্যদিকে, অনেক দূরে নৌকাভরণা ভাগীরথীর বিশাল বক্ষে সন্ধ্যার্তিমির ক্ষণে ক্ষণে গাঢ়তর হইতেছে।

যে নবীনাবয় প্রাসাদোপরি দাঁড়াইয়া ছিলেন, তন্মধ্যে একজন চন্দ্ররশ্মিবর্ণাভা ; অবিদ্যাস্ত কেশভারমধ্যে প্রায় অর্ধলুপ্তকায়িতা। অপরা কৃষ্ণাঙ্গী ; তিনি সন্মুখী ঘোড়শী তাঁহার ক্ষুদ্র দেহ, মূখখানি ক্ষুদ্র, তাহার উপরাম্বে চারি দিক্ দিয়া ক্ষুদ্র কদৃপ্তত কদৃশ্যদাম বেড়িয়া পড়িয়াছে ; যেন নীলোৎপলদলরাজি উৎপলমধ্যকে ঘেরিয়া রহিয়াছে। নয়নযুগল বিস্ফারিত, কোমল-শ্বেতবর্ণ, সফরীসদৃশ ; অঙ্গুলিগর্দল ক্ষুদ্র ক্ষুদ্র, সঙ্গিনীর কেশতরঙ্গমধ্যে ন্যস্ত হইয়াছে। পাঠক মহাশয় বদ্বিষ্মাছেন যে, চন্দ্ররশ্মিবর্ণশোভিনী কপালকন্ডলা ; তাহাকে বলিয়া দিই, কৃষ্ণাঙ্গী, তাঁহার ননন্দা শ্যামাসুন্দরী।

শ্যামাসুন্দরী দ্রাতৃজ্ঞায়াকে কখনও “বউ,” কখনও আদর করিয়া “বন,” কখনও “মুনো” সম্বোধন করিতেছিলেন। কপালকন্ডলা নামটি বিকট বলিয়া, গৃহস্থেরা তাঁহার নাম মৃন্ময়ী রাখিয়াছিলেন ; এই জন্যই “মুনো” সম্বোধন। আমরাও এখন কখন কখন ইহাকে মৃন্ময়ী বলিব।

শ্যামসুন্দরী একটি শৈশবাভ্যাস্ত কবিতা বলিতেছেন, যথা—

“বলে—পঙ্করানি, বদনখানি, রেতে রাখে ঢেকে ।

ফুটায় কলি, ছুটায় অলি, প্রাণপতিকে দেখে ॥

আবার—বনের লতা, ছাড়িয়ে পাতা, গাছের দিকে যায় ।

নদীর জল, নামলে ঢল, সাগরেতে যায় ॥

ছি ছি—সরম টুটে, কুমুদ ফুটে, চাঁদের আলো পেলে ।

বিয়ের কনে রাখতে নারি ফুলশয্যা গেলে ॥

মরি—এ কি জনলা, বিধির খেলা, হরিষে বিষাদ ।

পরপরশে, সবাই রসে, ভাঙ্গে লাজের বাঁধ ॥”

“তুই কি লো একা তপস্বিনী থাকিবি ?”

মৃন্ময়ী উত্তর করিল, “কেন, কি তপস্যা করিতেছি ?”

শ্যামসুন্দরী দুই করে মৃন্ময়ীর কেশতরঙ্গমালা তুলিয়া কহিল,
তোমার এ চুলের রাশি কি বাঁধিবে না ?”

মৃন্ময়ী কেবল ঈষৎ হাসিয়া শ্যামসুন্দরীর হাত হইতে কেশগুদ্রলি
টানিয়া লইলেন ।

শ্যামসুন্দরী আবার কহিলেন, “ভাল, আমার সাধটি পূরাও ।
একবার আমাদের গৃহস্থের মেয়ের মত সাজ । কতদিন যোগিনী
থাকিবে ?

মৃন্ময়ী । যখন এই ব্রাহ্মণসন্তানের সহিত সাক্ষাৎ হয় নাই তখন
ত আমি যোগিনীই ছিলাম ।

শ্যামা । এখন থাকিতে পারিবে না ।

মৃন্ময়ী । কেন থাকিব না ?

শ্যামা । কেন ? দেখিবি ? যোগ ভাঙ্গিব । পরশপাতর কাহাকে
বলে জান ?

মৃন্ময়ী কহিলেন, “না ।”

শ্যামা । পরশপাতরের স্পর্শে রাস্তাও সোনা হয় ।

মৃন্ময়ী । তাতে কি ?

শ্যামা । মেয়েমানুষেরও পরশপাতর আছে ।

মৃন্ময়ী । সে কি ?

শ্যামা । পদ্রুশ । পদ্রুশের বাতাসে যোগিনীও গৃহিণী হইয়া
ষায় । তুই সে পাতর ছুঁয়েছিস্ । দেখাবি,

“বাঁধাব চুলের রাশ, পরাব চিকন বাস,

খোঁপায় দোলাব তোর ফুল ।

কপালে সঁীথির ধার কাঁকালেতে চন্দ্রহার,

কানে তোর দিব ষোড়া দুল ॥

কদুঙ্কদুম চন্দন চুয়া, বাটা ভরে পান গদুয়া,

রাঙ্গামুখ রাঙ্গা হবে রাগে ।

সোণার পদুত্তলি ছেলে, কোলে তোর দিব ফেলে

দেখি ভাল লাগে কি না লাগে ॥”

মৃন্ময়ী কহিলেন, “ভাল বদ্বিলাম । পরশপাতর যেন ছুঁয়েছি,
সোনা হলেম । চুল বাঁধিলাম ; ভাল কাপড় পরিলাম ; খোঁপায়
ফুল দিলাম ; কাঁকালে চন্দ্রহার পরিলাম ; কাণে দুল দুলিল ; চন্দন,
কদুঙ্কদুম, চুয়া, পান, গদুয়া, সোনার পদুত্তলি পর্য্যন্ত হইল । মনে কর
সকলই । তাহা হইলেই বা কি সুখ ?”

শ্যামা । বল দেখি ফুলটি ফুটিলে কি সুখ ?

মৃন্ময়ী । লোকের দেখে সুখ, ফুলের কি ?

শ্যামাসুন্দরীর মৃদুকাণ্ঠ গভীর হইল ; প্রভাতবাতাহত নীলোৎ-
পলবৎ বিস্ফারিত চক্ষু ঈষৎ দুলিল ; বলিলেন, ফুলের কি ? তাহা ত
বলিতে পারি না । কখনও ফুল হইয়া ফুটি নাই । কিন্তু যদি
তোমার মত কলি হইতাম, তবে ফুটিয়া সুখ হইত ।”

শ্যামাসুন্দরী তাঁহাকে নীরব দেখিয়া কহিলেন,—“আচ্ছা—তাই
যদি না হইল ;—তবে শুন দেখি, তোমার সুখ কি ?”

মৃন্ময়ী কিস্তিক্ষণ ভাবিয়া বলিলেন, “বলিতে পারি না । বোধ
করি, সমুদ্রতীরে সেই বনে বনে বেড়াইতে পারিলে আমার সুখ
জন্মে ।”

শ্যামাসুন্দরী কিছু বিস্মিতা হইলেন । তাঁহাদিগের যত্নে যে মৃন্ময়ী

উপকৃত হইলেন নাই, ইহাতে কিঞ্চিৎ ক্ষুধা হইলেন, কিছু রুগ্নতা হইলেন। কহিলেন, ‘এখন ফিরিয়া যাইবার উপায়?’

মৃন্ময়ী। উপায় নাই।

শ্যামা। তবে করিবে কি?

মৃন্ময়ী। অধিকারী কহিতেন, “যথা নিষদ্ব্যুৎপত্তি তথা করামি।”

শ্যামাসুন্দরী মূখে কাপড় দিয়া হাসিয়া বলিলেন, “শেষ আঞ্জা, ভট্টাচার্য্য মহাশয়! কি হইল?”

মৃন্ময়ী নিশ্বাস ত্যাগ করিয়া কহিলেন, “যাহা বিধাতা করাইবেন, তাহাই করিব। যাহা কপালে আছে, তাহাই ঘটিবে।”

শ্যামা। কেন, কপালে আর কি আছে? কপালে সুখ আছে। তুমি দীর্ঘনিশ্বাস ফেল কেন?

মৃন্ময়ী কহিলেন, “শুন। যে দিন স্বামীর সহিত যাত্রা করি, যাত্রাকালে আমি ভবানীর পায়ে ত্রিপত্র দিতে গেলাম। আমি মার পাদপদ্মে ত্রিপত্র না দিয়া কোন কৰ্ম করিতাম না। যদি কৰ্মে শূন্য হইবার হইত, তবে মা ত্রিপত্র ধারণ করিতেন; যদি অমঙ্গল ঘটিবার সম্ভাবনা থাকিত, তবে ত্রিপত্র পড়িয়া যাইত। অপরিচিত ব্যক্তির সহিত অজ্ঞাত দেশে আসিতে শঙ্কা হইতে লাগিল; ভাল মন্দ জানিতে মার কাছে গেলাম। ত্রিপত্র মা ধারণ করিলেন না—অতএব কপালে কি আছে জানি না।”

মৃন্ময়ী নীরব হইলেন। শ্যামাসুন্দরী শিহরিয়া উঠিলেন।

তৃতীয় খণ্ড

প্রথম পরিচ্ছেদ : ভূতপূর্বক

“কষ্টোহয়ং খলু ভূতাবাঃ ।”

রজাবলী

যখন নবকুমার কপালকুণ্ডলাকে লইয়া চটি হইতে যাত্রা করেন, তখন মতিবিবি পথান্তরে বর্ধমানাভিমুখে যাত্রা করিলেন। যতক্ষণ মতিবিবি পথবাহন করেন, ততক্ষণ আমরা তাঁহার পূর্ববৃত্তান্ত কিছু বলি। মতির চরিত্র মহাদোষে কলুষিত, মহদগুণেও শোভিত। এরূপ চরিত্রের বিস্তারিত বৃত্তান্তে পাঠক মহাশয় অসন্তুষ্ট হইবেন না।

যখন ইঁহার পিতা মহম্মদীয় ধর্মাবলম্বন করিলেন, তখন ইঁহার হিন্দু নাম পরিবর্তিত হইয়া লুৎফ-উম্মিসা নাম হইল। মতিবিবি কোন কালেও ইঁহার নাম নহে। তবে কখনও কখনও ছদ্মবেশে দেশবিদেশে ভ্রমণকালে ঐ নাম গ্রহণ করিতেন। ইঁহার পিতা ঢাকায় আসিয়া রাজকার্য্যে নিযুক্ত হইলেন। কিন্তু তথায় অনেক নিজদেশীয় লোকের সমাগম। দেশীয় সমাজে সমাজচ্যুত হইয়া সকলের থাকিতে ভাল লাগে না। অতএব তিনি কিছু দিনে সুবাদারের নিকট প্রতিপত্তি লাভ করিয়া তাঁহার সুহৃদ্ অনেকানেক ওমরাহের নিকট পত্রসংগ্রহপূর্বক সপরিবারে আগ্রায় আসিলেন। আকবর শাহের নিকট কাহারও গুণ অবিদিত থাকিত না; শীঘ্রই তিনি ইঁহার গুণগ্রহণ করিলেন। লুৎফ-উম্মিসার পিতা শীঘ্রই উচ্চপদস্থ হইয়া আগ্রার প্রধান ওমরাহ মধ্যে গণ্য হইলেন। এদিকে লুৎফ-উম্মিসা ক্রমে বয়ঃপ্রাপ্ত হইতে লাগিলেন। আগ্রাতে আসিয়া তিনি পারসীক, সংস্কৃত, নৃত্য, গীত, রসবাদ ইত্যাদিতে সুশিক্ষিতা হইলেন।

রাজধানীর অসংখ্য রূপবতী গৃণবতীদিগের মধ্যে অগ্রগণ্য হইতে লাগিলেন। দূর্ভাগ্যবশতঃ বিদ্যাসম্বন্ধে তাঁহার যাদৃশ শিক্ষা হইয়াছিল, ধর্মসম্বন্ধে তাঁহার কিছুই হয় নাই। লুৎফ-উল্লিসার বয়স পূর্ণ হইলে প্রকাশ পাইতে লাগিল যে, তাঁহার মনোবৃত্তি সকল দূর্দ্দমবেগবতী। ইন্দ্রিয়দমনে কিছুমাত্র ক্ষমতাও নাই, ইচ্ছাও নাই। সদসতে সমান প্রবৃত্তি। এ কার্য্য সৎ, এ কার্য্য অসৎ, এমত বিচার করিয়া তিনি কোন কস্মে প্রবৃত্ত হইতেন না; যাহা ভাণ লাগিত, তাহাই করিতেন যখন সৎকস্মে অন্তঃকরণ স্খলী হইত, তখন সৎকস্ম করিতেন; যখন অসৎকস্মে অন্তঃকরণ স্খলী হইত, তখন অসৎকস্ম করিতেন; যৌবনকালে মনোবৃত্তি দূর্দ্দম হইলে যে সকল দোষ জন্মে, তাহা লুৎফ-উল্লিসা সম্বন্ধে জন্মিল। তাঁহার পুর্বস্বামী বর্ত্তমান—ওমরাহের কেহ তাঁহাকে বিবাহ করিতে সম্মত হইলেন না। তিনও বড় বিবাহের অনুরাগিণী হইলেন না। মনে মনে ভাবিলেন, কুসুম্মে কুসুম্মে বিহারিণী ভ্রমরীর পক্ষচ্ছেদ কেন করাইব? প্রথমে কাণাকাণি, শেষে কালিমাময় কলঙ্ক রটিল। তাঁহার পিতা বিরক্ত হইয়া তাঁহাকে আপন গৃহ হইতে বহিস্কৃত করিয়া দিলেন।

লুৎফ-উল্লিসা গোপনে ষাহাদিগকে কৃপা বিতরণ করিতেন, তন্মধ্যে যুবরাজ সৈলিম একজন। একজন ওমরাহের কুলকলঙ্ক জন্মাইলে, পাছে আপন অপক্ষপাতী পিতার কোপানলে পড়িতে হয়, সেই আশঙ্কায় সৈলিম এ পর্য্যন্ত লুৎফ-উল্লিসাকে আপন অবরোধবাসিনী করিতে পারেন নাই। এক্ষণে সুযোগ পাইলেন। রাজপুত্রপতি মানসিংহের ভগিনী, যুবরাজের প্রধানা মহিষী ছিলেন। যুবরাজ লুৎফ-উল্লিসাকে তাঁহার প্রধানা সহচরী করিলেন। লুৎফ-উল্লিসা প্রকাশ্যে বেগমের সখী, পরোক্ষে যুবরাজের অনুগ্রহভাগিনী হইলেন।

লুৎফ-উল্লিসার ন্যায় বদ্বিশ্মিত মহিলা যে অল্প দিনেই রাজকুমারের হৃদয়াধিকার করিবেন, ইহা সহজেই উপলব্ধি হইতে পারে। সৈলিমের চিন্তে তাঁহার প্রভু এরূপ প্রতিযোগিতাশূন্য হইয়া উঠিল যে, লুৎফ-উল্লিসা উপযুক্ত সময়ে তাঁহার পাটরাণী হইবেন, ইহা তাঁহার স্থির

প্রতিজ্ঞা হইল। কেবল লুৎফ-উল্লিসার স্থির প্রতিজ্ঞা হইল, এমত নহে; রাজপদরবাসী সকলেরই উহা সম্ভব বোধ হইল। এইরূপ আশার স্বপ্নে লুৎফ-উল্লিসা জীবন বাহিত করিতেছিলেন এমত সময়ে নিদ্রাভঙ্গ হইল। আকবর শাহের কোষাধ্যক্ষ (আকতিমাদ-উদ্দৌলা) খাজা আয়াসের কন্যা মেহের-উল্লিসা যখনকূলে প্রধানা সুন্দরী। একদিন কোষাধ্যক্ষ রাজকুমার সেলিম ও অন্যান্য প্রধান ব্যক্তিকে নিমন্ত্রণ করিয়া গৃহে আনিলেন। সেই দিন মেহের-উল্লিসার সহিত সেলিমের সাক্ষাৎ হইল এবং সেই দিন সেলিম মেহের-উল্লিসার নিকট চিত্ত রাখিয়া গেলেন। তাহার পর ষাঠি ঘটিয়াছিল, তাহা ইতিহাস-পাঠকমাত্রেরই অবগত আছেন। শের আফগান নামক একজন মহাবিক্রমশালী ওমরাহের সহিত কোষাধ্যক্ষের কন্যার সম্বন্ধ পূর্বেই হইয়াছিল। সেলিম অনুরাগান্বিত হইয়া সে সম্বন্ধ রহিত করিবার জন্য পিতার নিকট যাচমান হইলেন। কিন্তু নিরপেক্ষ পিতার নিকট কেবল তিরস্কৃত হইলেন মাত্র। সুতরাং সেলিমকে আপাততঃ নিরস্ত হইতে হইল। আপাততঃ নিরস্ত হইলেন বটে, কিন্তু আশা ছাড়িলেন না। শের আফগানের সহিত মেহের-উল্লিসার বিবাহ হইল। কিন্তু সেলিমের চিত্তবৃত্তি সকল লুৎফ-উল্লিসার নখদর্পণে ছিল; তিনি নিশ্চিত বুঝিয়াছিলেন যে, শের আফগানের সহস্র প্রাণ থাকিলেও তাহার নিস্তার নাই, আকবরশাহের মৃত্যু হইলেই তাহার প্রাণান্ত হইবে—মেহের-উল্লিসা সেলিমের মহিষী হইবেন। লুৎফ-উল্লিসা সিংহাসনের আশা তাগ করিলেন।

মহম্মদীয় সম্রাট্ কুলগোরব আকবরের পরমায়ু শেষ হইয়া আসিল। যে প্রচণ্ড সূর্য্যের প্রভায় তুরকী হইতে ব্রহ্মপুত্র পর্য্যন্ত প্রদীপ্ত হইয়াছিল, সে সূর্য্য অস্তগামী হইল। এ সময়ে লুৎফ-উল্লিসা আত্মপ্রাধান্য রক্ষার জন্য এক দুঃসাহসিক সংকল্প করিলেন।

রাজপদতপতি রাজা মানসিংহের ভগিনী সেলিমের প্রাধান্য মহিষী। খন্দ তাহার পুত্র। এক দিন তাহার সহিত আকবর শাহের পীড়িত শরীর সম্বন্ধে লুৎফ-উল্লিসার কথোপকথন হইতেছিল; রাজপদতকন্যা

এক্ষণে বাদশাহপত্নী হইবেন, এই কথার প্রসঙ্গ করিয়া লুৎফ-উল্লিস সা তাঁহাকে অভিনন্দন করিতেছিলেন, প্রত্যুত্তরে খন্দুর জননী কহিলেন, “বাদশাহের মহিষী হইলে মনুষ্যজন্ম সাধক বটে, কিন্তু যে বাদশাহ-জননী, সেই সর্বোপরি।” উত্তর শূন্যবামাত্র এক অপদূর্ব্বাচিস্থিত অভিশপ্ত লুৎফ-উল্লিসার হৃদয়ে উদয় হইল। তিনি প্রত্যুত্তর করিলেন, “তাহাই হউক না কেন? সেও ত আপনার ইচ্ছাধীন।” বেগম কহিলেন, “সে কি?” চতুরা উত্তর করিলেন, “যুবরাজপুত্র খন্দুরকে সিংহাসন দান করুন।”

বেগম কোন উত্তর করিলেন না। সে দিন এ প্রসঙ্গ পুনরুত্থাপিত হইল না, কিন্তু কেহই এ কথা ভুলিলেন না। স্বামীর পরিবর্তে পুত্র যে সিংহাসনারোহণ করেন, ইহা বেগমের অনভিমত নহে; মেহের-উল্লিসার প্রতি সেলিমের অনুরাগ লুৎফ-উল্লিসার ঘেরূপ হৃদয়শেল, বেগমেরও সেইরূপ। মানসিংহের ভগিনী আধুনিক তুর্কমান কন্যার যে আজ্ঞানুবর্তিনী হইয়া থাকিবেন, তাহা ভাল লাগিবে কেন? লুৎফ-উল্লিসারও এ সঙ্কপে উদ্যোগিনী হইবার গাঢ় তাৎপর্য ছিল। অন্য দিন পুনর্ব্বার এ প্রসঙ্গ উত্থাপিত হইল। উভয়ের মত স্থির হইল।

সেলিমকে ত্যাগ করিয়া খন্দুরকে আকবরের সিংহাসনে স্থাপিত করা অসম্ভাবনীয় বোধ হইবার কোন কারণ ছিল না। এ কথা লুৎফ-উল্লিসা বেগমের বিলক্ষণ হৃদয়ঙ্গম করাইলেন। তিনি কহিলেন “মোগলের সাম্রাজ্য রাজপুত্রের বাহুবলে স্থাপিত রহিয়াছে; সেই রাজপুত্রজাতির চুড়া রাজা মানসিংহ, তিনি খন্দুর মাতুল; আর মুসলমানদিগের প্রধান খাঁ আজিম, তিনি প্রধান রাজমন্ত্রী, তিনি খন্দুর শ্বশুর; ইংহারা দুইজনে উদ্যোগী হইলে, কে ইংহাদিগের অনুবর্তী না হইবে? আর কাহার বলেই বা যুবরাজ সিংহাসন গ্রহণ করিবেন? রাজা মানসিংহকে এ কার্যে রতী করা, আপনার ভার। খাঁ আজিম ও অন্যান্য মহম্মদীয় ওমরাহগণকে লিপ্ত করা আমার ভার। আপনার আশীর্ব্বাদে কৃতকার্য হইব, কিন্তু এক আশঙ্কা পাছে সিংহাসন আরোহণ করিয়া খন্দুর এ দৃশ্চারিণীকে পূর্ব্ববিহঙ্কৃত করিয়া দেন।”

বেগম সহচরীর অভিপ্ৰায় বদ্বিলেন। হাসিয়া কহিলেন, “তুমি আগ্রার যে ওমরাহের গৃহিণী হইতে চাও, সেই তোমার পাণিগ্রহণ করিবে। তোমার স্বামী পঞ্চ হাজারি মসবদার হইবেন।”

লুৎফ-উন্নিসা সম্মুখ হইলেন। ইহাই তাঁহার উদ্দেশ্য ছিল। যদি রাজপদুমীমধ্যে সামান্য পদুমস্বতী হইয়া থাকিতে হইল, তবে প্রতিপদুমবিহারিণী মধুকরীর পক্ষচ্ছেদন করিয়া কি সুখ হইল? যদি স্বাধীনতা ত্যাগ করিতে হইল, তবে বাল্যসখী মেহের-উন্নিসার দাসীত্বে কি সুখ? তাহার অপেক্ষা কোন প্রধান রাজপদুমের সর্বময়ী ঘরণী হওয়া গৌরবের বিষয়।

শুধু এই লোভে লুৎফ-উন্নিসা এ কস্মে প্রবৃত্ত হইলেন না। সেলিম যে তাঁহাকে উপেক্ষা করিয়া মেহের-উন্নিসার জন্য এত ব্যস্ত, ইহার প্রতিশোধও তাঁহার উদ্দেশ্য।

খাঁ আজিম প্রভৃতি আগ্রা-দিল্লীর ওমরাহেবা লুৎফ-উন্নিসার বিলক্ষণ বাধ্য ছিলেন। খাঁ আজিম যে জামাতার ইষ্টসাধনে উদ্বুদ্ধ হইবেন, ইহা বিচিহ্ন নহে। তিনি এবং আর আর ওমরাহগণ সম্মত হইলেন। খাঁ আজিম লুৎফ-উন্নিসাকে কহিলেন, “মনে কর, যদি কোন অনুযোগে আমরা কৃতকাব্য না হই, তবে তোমার আমার রক্ষা নাই। অতএব প্রাণ বাঁচাইবার একটা পথ রাখা ভাল।”

লুৎফ-উন্নিসা কহিলেন, “আপনার কি পরামর্শ?” খাঁ আজিম কহিলেন, “উড়িয়া ভিন্ন অন্য আশ্রয় নাই। কেবল সেই স্থানে মোগলের শাসন তত প্রখর নহে। উড়িয়ায় সৈন্য আমাদিগের হস্তগত থাকা আবশ্যক। তোমার ভ্রাতা উড়িয়ায় মসবদার আছেন; আমি কল্যাণ প্রচার করিব, তিনি যুদ্ধে আহত হইয়াছেন। তুমি তাঁহাকে দেখিবার ছলে কল্যাই উড়িয়ায় যাত্রা কর। তথায় যৎকর্তব্য তাহা সাধন করিয়া শীঘ্র প্রত্যাগমন কর।”

লুৎফ-উন্নিসা এ পরামর্শে সম্মত হইলেন। তিনি উড়িয়ায় আসিয়া যখন প্রত্যাগমন করিতেছিলেন, তখন তাঁহার সহিত পাঠক মহাশয়ের সাক্ষাৎ হইয়াছে।

দ্বিতীয় পরিচ্ছেদ : পথান্তরে

“যে মাটিতে পড়ে লোকে উঠে তাই ধ’রে ।

বারেক নিরাশ হয়ে কে কোথায় মরে ॥

তুফানে পতিত কিস্তু ছাড়িব না হাল ।

আজিকে বিফলা হলো, হতে পারে কাল ॥”

নবীন তপস্বিনী

যে দিন নবকুমারকে বিদায় করিয়া মতিবিবি বা লুৎফ-উল্লিসা বর্ধমানাভিমুখে যাত্রা করিলেন, সে দিন তিনি বর্ধমান পর্য্যন্ত যাইতে পারিলেন না। অন্য চটিতে রহিলেন। সন্ধ্যার সময়ে পেশমনের সহিত একত্র বসিয়া কথোপকথন হইতেছিল, এমন কালে মতি সহসা পেশমনকে জিজ্ঞাসা করিলেন,

“পেশমন্ ! আমার স্বামীকে কেমন দেখিলে ?”

পেশমন্ কিছু বিস্মিত হইয়া কহিল, “কেমন আর দেখিব ?”
মতি কহিলেন, “সুন্দর পুরুষ বটে কি না ?”

নবকুমারের প্রতি পেশমনের বিশেষ বিরাগ জন্মিয়াছিল। যে অলংকারগুলি মতি কপালকুণ্ডলাকে দিয়াছিলেন, তৎপ্রতি পেশমনের বিশেষ লোভ ছিল ; মনে মনে ভরসা ছিল, একদিন চাহিয়া লইবেন। সেই আশা নিস্কর্মল হইয়াছিল, সুতরাং কপালকুণ্ডলা এবং তাঁহার স্বামী, উভয়ের প্রতি তাঁহার দারুণ বিরক্তি। অতএব স্বামিনীর প্রশ্নে উত্তর করিলেন,

“দরিদ্র ব্রাহ্মণ আবার সুন্দর কুৎসিত কি ?”

সহচরীর মনের ভাব বদ্বিগ্না মতি হাস্য করিয়া কহিলেন, “দরিদ্র ব্রাহ্মণ যদি ওমরাহ হয়, তবে সুন্দর পুরুষ হইবে কি না ?”

পেশমন্ । সে আবার কি ?

মতি । কেন, তুমি জ্ঞান না যে, বেগম স্বীকার করিয়াছেন যে

খন্দ্র বাদশাহ হইলে আমার স্বামী ওমরাহ হইবে ?

পেঘমন্ । তা ত জানি । কিন্তু তোমার পদ্বর্ষস্বামী ওমরাহ হইবেন কেন ?

মতি । তবে আমার আর কোন্ স্বামী আছে ?

পেঘমন্ । যিনি নূতন হইবেন ।

মতি ঈষৎ হাসিয়া কহিলেন, “আমার ন্যায় সতীর দুই স্বামী, বড় অন্যায্য কথা—ও কে যাইতেছে ?”

যাহাকে দেখিয়া মতি কহিলেন, “ও কে যাইতেছে ?” পেঘমন্ তাহাকে চিনিল ; সে আগ্রানিবাসী, খাঁ আজিমের আশ্রিত ব্যক্তি । উভয়ে বাস্ত হইলেন । পেঘমন্ তাহাকে ডাকিলেন । সে ব্যক্তি আসিয়া লুৎফ-উল্লিসাকে আভিবাদনপদ্বর্ষক একখানি পত্র দান করিল ; কহিল,

“পত্র লইয়া উড়িয়া যাইতেছিলাম । পত্র জরদুরি ।”

পত্র পড়িয়া মতিবারির আশা ভরসা সকল অন্তর্হিত হইল । পত্রের মর্ম এই,

“আমাদিগের যত্ন বিফল হইয়াছে । মৃত্যুকালেও আকবর শাহ আপন বৃন্দ্বিবলে আমাদিগকে পরাভূত করিয়াছেন । তাঁহার পরলোকে গতি হইয়াছে । তাঁহার আজ্ঞাবলে, কদুমার সেলিম এক্ষণে জাহাঙ্গীর শাহ হইয়াছেন । তুমি খন্দ্রর জন্য বাস্ত হইবে না । এই উপলক্ষে কেহ তোমার শত্রুতা সাধিতে না পারে, এমনত চেষ্টার জন্য তুমি শীঘ্র আগ্রায় ফিরিয়া আসিবে ।”

আকবরশাহ যে প্রকারে এ ষড়্‌যন্ত্র নিষ্ফল করেন, তাহা ইতিহাসে বর্ণিত আছে ; এ স্থলে সে বিবরণের আবশ্যকতা নাই ।

পদ্রস্কারপদ্বর্ষক দূতকে বিদায় করিয়া, মতি পেঘমন্কে পত্র শুনাইলেন । পেঘমন্ কহিল,

“এক্ষণে উপায় ?”

মতি । এখন আর উপায় নাই ।

পেঘমন্ । (এক্ষণে চিন্তা করিয়া) ভাল, ক্ষতিই বা কি ? যেমন

ছিলে, তেমনই থাকিবে মোগল বাদশাহের পদ্রুস্ত্রীমাত্রেই অন্য রাজ্যের পাটরাণী অপেক্ষাও বড়।

মতি। (ঈষৎ হাসিয়া) তাহা আর হয় না। আর সে রাজপদ্রে থাকিতে পারিব না। শীঘ্রই মেহের-উল্লিসার সহিত জাহাঙ্গীরের বিবাহ হইবে। মেহের-উল্লিসাকে আমি কিশোর বয়োবর্ধি ভাল জানি; একবার সে পদ্রবাসিনী হইলে সেই বাদশাহ হইবে; জাহাঙ্গীর বাদশাহ নামমাত্র থাকিবে। আমি যে তাহার সিংহাসনারোহণের পথরোধের চেষ্টা পাইয়াছিলাম, ইহা তাহার অবিদিত থাকিবে না। তখন আমার দশা কি হইবে?

পেশমন্ প্রায় রোদনোন্মুখী হইয়া কহিল, “তবে কি হইবে?”

মতি কহিলেন, “এক ভরসা আছে। মেহের-উল্লিসার চিত্ত জাহাঙ্গীরের প্রতি কিরূপ? তাহার ঘেরূপ দার্ঢ্য, তাহাতে যদি সে জাহাঙ্গীরের প্রতি অনুরাগিণী না হইয়া স্বামীর প্রতি যথার্থ স্নেহ-শালিনী হইয়া থাকে, তবে জাহাঙ্গীর শত শের আফগান বধ করিলেও মেহের-উল্লিসাকে পাইবেন না। আর যদি মেহের-উল্লিসা জাহাঙ্গীরের যথার্থ অভিলাষিণী হয়, তবে আর কোন ভরসা নাই।”

পেশমন্। মেহের-উল্লিসার মন কি প্রকারে জানিবে?

মতি হাসিয়া কহিলেন, “লুৎফ-উল্লিসার অসাধ্য কি? মেহের-উল্লিসা আমার বাল্যসখী—কালি বন্ধুত্বমানে গিয়া তাহার নিকট দুই দিন অবস্থিতি করিব।”

পেশমন্। যদি মেহের-উল্লিসা বাদশাহের অনুরাগিণী হন, তাহা হইলে কি করিবে?

মতি। পিতা কহিয়া থাকেন, “ক্ষেত্রে কৰ্ম বিধীয়তে।”

উভয়ে ক্ষণেক নীরব হইয়া রহিলেন। ঈষৎ হাসিতে মতির ওষ্ঠাধর কুণ্ঠিত হইতে লাগিল। পেশমন্ জিজ্ঞাসা করিল, “হাসিতেছ কেন?”

মতি কহিলেন, “কোন নূতন ভাব উদয় হইতেছে।”

পেশমন্। কি নূতন ভাব?

মতি তাহা পেঘমন্কে বলিলেন না । আমরাও তাহা পাঠকে বলিব না । পশ্চাৎ প্রকাশ পাইবে ।

তৃতীয় পরিচ্ছেদ : প্রতিযোগিনী-গৃহে

“শ্যামাদন্যো নহি নহি প্রাণনাথে মমাস্তি ।”

উদ্ধবদত্ত

এ সময়ে শের আফগান বঙ্গদেশের সুবাদারের অধীন বন্দমানের কস্মাধক্ষ হইয়া অবস্থিতি করিতেছিলেন ।

মতিবিবি বন্দমানের আসিয়া শের আফগানের আশ্রয়ে উপনীত হইলেন । শের আফগান সপরিবারে তাঁহাকে অত্যন্ত সমাদরে তথায় অবস্থিতি করাইলেন । যখন শের আফগান এবং তাঁহার স্ত্রী মেহের-উন্নিসা আগ্রায় অবস্থিতি করিতেন, তখন মতি তাঁহাদিগের নিকট বিশেষ পরিচিতি ছিলেন । মেহের-উন্নিসার সহিত তাঁহার বিশেষ প্রণয় ছিল । পরে উভয়েই দিল্লীর সাম্রাজ্যভাঙের জন্য প্রতিযোগিনী হইয়াছিলেন । এক্ষণে একত্র হওয়ায় মেহের-উন্নিসা মনে ভাবিতেছেন, “ভারতবর্ষের কর্তৃত্ব কাহার অদৃষ্টে বিধাতা লিখিয়াছেন ? বিধাতাই জানেন, আর সেলিম জানেন, আর কেহ যদি জানে ত সে এই লুৎফ-উন্নিসা ; দেখি, লুৎফ-উন্নিসা কি কিছুর প্রকাশ পরিবে না ?” মতিবিবিরও মেহের-উন্নিসার মন জানিবার চেষ্টা ।

মেহের-উন্নিসা তৎকালে ভারতবর্ষের মধ্যে প্রধানা গুণবতী বলিয়া খ্যাতি লাভ করিয়াছিলেন । বস্তুতঃ তাদৃশ রমণী ভূমণ্ডলে অতি অল্পই জন্মগ্রহণ করিয়াছে । সৌন্দর্য্য ইতিহাসকীর্তিতা স্ত্রীলোকদিগের মধ্যে তাঁহার প্রাধান্য ঐতিহাসিকমাত্রই স্বীকার করিয়া থাকেন । কোন প্রকার বিদ্যায় তাৎকালিক পুরুষদিগের মধ্যে বড় অনেকে তাঁহার অপেক্ষা শ্রেষ্ঠ ছিলেন না । নৃত্য-গীতে মেহের-উন্নিসা অদ্বিতীয়া ; কবিতা-রচনায় বা চিত্রলিখনেও তিনি সকলের মন মুগ্ধ করিতেন । তাঁহার সরস কথা তাঁহার সৌন্দর্য্য অপেক্ষাও মোহময়ী ছিল । মতিও

এ সকল গদ্যে হীনা ছিলেন না। অন্য এই দুই চমৎকারিণী
মন জানিতে উৎসুক হইলেন।

মেহের-উল্লিন্সা খাস কামরায় বসিয়া তসবীর লিখিতেছিলেন।
মতি মেহের-উল্লিন্সার পৃষ্ঠের নিকট বসিয়া চিত্রলিখন দেখিতেছিলেন,
এবং তাম্বদুল চর্চণ করিতেছিলেন। মেহের-উল্লিন্সা জিজ্ঞাসা
করিলেন, “চিত্র কেমন হইতেছে?” মতিবাঁবি উত্তর করিলেন,
“তোমার চিত্র যেরূপ হইয়া থাকে, তাহাই হইতেছে। অন্য কেহ যে
তোমার ন্যায় চিত্রনিপুণ নহে, ইহাই দৃষ্টের বিষয়।”

মেহের। তাই যদি সত্য হয় ত দৃষ্টের বিষয় কেন?

মতি। অন্যের তোমার মত চিত্র-নিপুণ্য থাকিলে তোমার এ
দৃষ্টের আদর্শ রাখিতে পারিত।

মেহের। কবরের মাটিতে দৃষ্টের আদর্শ থাকিবে।

মেহের-উল্লিন্সা এই কথা কিছদ গাভীষ্যের সহিত কহিলেন।

মতি। ভগিনি! আজ মনের স্ফুর্তির এত অল্পতা কেন?

মেহের। স্ফুর্তির অল্পতা কই? তবে যে তুমি আমাকে কাল
প্রাতে ত্যাগ করিয়া যাইবে, তাহাই বা কি প্রকারে ভুলিব? আর
দুই দিন থাকিয়া তুমি কেনই বা চরিতার্থ না করিবে?

মতি। সূত্রে কার অসাধ? সাধা হইলে আমি কেন যাইব?
কিন্তু আমি পরের অধীন; কি প্রকারে থাকিব?

মেহের। আমার প্রতি তোমার ত ভালবাসা আর নাই, থাকিলে
তুমি কোন মতে রহিয়া যাইতে। আসিয়াছ ত রহিতে পার না কেন?

মতি। আমি ত সকল কথাই বলিয়াছি। আমার সহোদর
মোগলসৈন্য মঙ্গবদার—তিনি উড়িষ্যার পাঠানদিগের সহিত যুদ্ধে
আহত হইয়া সঙ্কটাপন্ন হইয়াছিলেন। আমি তাঁহারই বিপদসংবাদ
পাইয়া বেগমের অনুমতি লইয়া তাঁহাকে দেখিতে আসিয়াছিলাম।
উড়িষ্যায় অনেক বিলম্ব করিয়াছি, এক্ষণে আর বিলম্ব করা উচিত
নহে। তোমার সহিত অনেক দিন দেখা হয় নাই, এই জন্য দুই দিন
রহিয়া গেলাম।

মেহের। বেগমের নিকট কোন্ দিন পৌঁছবার কথা স্বীকার করিয়া আসিয়াছ ?

মতি বদ্বিলেন, মেহের-উল্লিসা ব্যঙ্গ করিতেছেন। মাজ্জিত অথচ মস্মভেদী ব্যঙ্গে মেহের-উল্লিসা যেরূপ নিপদ্বণ, মতি সেরূপ নহেন। কিন্তু অপ্রতিভ হইবার লোকও নহেন। তিনি উত্তর করিলেন, “দিন নিশ্চিত করিয়া তিন মাসের পথ যাতায়াত করা কি সম্ভব ? কিন্তু অনেক কাল বিলম্ব করিয়াছি ; আরও বিলম্বে অসন্তোষের কারণ জন্মিতে পারে।”

মেহের-উল্লিসা নিজ ভুবনমোহন হাসি হাসিয়া কহিলেন, “কাহার অসন্তোষের আশঙ্কা করিতেছ ? যুবরাজের, না তাঁহার মহিষীর ?”

মতি কিঞ্চিৎ অপ্রতিভ হইয়া কহিলেন, “এ লজ্জাহীনাকে কেন লজ্জা দিতে চাও ? উভয়েরই অসন্তোষ হইতে পারে।”

মেহের। কিন্তু জিজ্ঞাসা করি, তুমি স্বয়ং বেগম নাম ধারণ করিতেছ না কেন ? শূনিয়াছিলাম, কুমার সেলিম তোমাকে বিবাহ করিয়া খাসবেগম করিবেন ; তাহার কত দূর ?

মতি। আমি ত সহজেই পরাধীন। যে কিছু স্বাধীনতা আছে, তাহা কেন নষ্ট করিব ? বেগমের সহচারণী বলিয়া অনায়াসে উড়িয়ায় আসিতে পারিলাম, সেলিমের বেগম হইলে কি উড়িয়ায় আসিতে পারিতাম ?

মেহের। যে দিল্লীশ্বরের প্রধানা মহিষী হইবে, তাহার উড়িয়ায় আসিবার প্রয়োজন ?

মতি। সেলিমের প্রধানা মহিষী হইব, এমন স্পন্দা কখনও করি না। এ হিন্দুস্থান দেশে কেবল মেহের-উল্লিসাই দিল্লীশ্বরের প্রাণেশ্বরী হইবার উপযুক্ত।

মেহের-উল্লিসা মদ্ব নত করিলেন। ক্ষণেক নিরন্তর থাকিয়া কহিলেন, “ভগিনি ! আমি এমত মনে করি না যে, তুমি আমাকে পীড়া দিবার জন্য এ কথা বলিলে, কি আমার মন জানিবার জন্য বলিলে। কিন্তু তোমার নিকট আমার এই ভিক্ষা, আমি যে শের

আফগানের বিনতা, আমি যে কায়মনোবাক্যে শের আফগানের দাসী, তাহা তুমি বিস্মৃত হইয়া কথা কহিও না ।”

লজ্জাহীনা মতি এ তিরস্কারে অপ্রতিভ হইলেন না ; বরং আরও সন্যোগ পাইলেন । কহিলেন, “তুমি যে পতিগতপ্রাণা, তাহা আমি বিলক্ষণ জানি । সেই জন্যই ছলক্ৰমে এ কথা তোমার সম্মুখে পাড়িতে সাহস করিয়াছি । সেলিম যে এ পর্য্যন্ত তোমার সৌন্দর্য্যের মোহ ভুলিতে পারেন নাই, এই কথা বলা আমার উদ্দেশ্যে । সাবধান থাকিও ।”

মেহের । এখন বুঝিলাম । কিন্তু কিসের আশঙ্কা ?

মতি কিঞ্চিৎ ইতস্ততঃ করিয়া কহিলেন, “বৈধবোর আশঙ্কা ।”

এই কথা বলিয়া মতি মেহের-উল্লিসার মূখ পানে তীক্ষ্ণদৃষ্টি করিয়া রহিলেন, কিন্তু ভয় বা আহ্লাদের কোন চিহ্ন তথায় দোঁখিতে পাইলেন না । মেহের-উল্লিসা সদর্পে কহিলেন,

“বৈধবোর আশঙ্কা ! শের আফগান আত্মরক্ষায় অক্ষম নহে । বিশেষ আকবর বাদশাহের রাজ্যমধ্যে তাঁহার পুত্রও বিনা দোষে পরপ্রাণ নষ্ট করিয়া নিস্তার পাইবেন না ।”

মতি । সত্য কথা, কিন্তু সম্প্রতিকার আগ্রার সংবাদ এই যে, আকবরশাহ গত হইয়াছেন । সেলিম সিংহাসনারূঢ় হইয়াছেন । দিল্লীশ্বরকে কে দমন করিবে ?

মেহের-উল্লিসা আর কিছু শুনিলেন না । তাঁহার সর্ব্বাঙ্গ শিহরিয়া কাঁপিতে লাগিল । আবার মূখ-নত করিলেন, লোচনযুগলে অশ্রুধারা বহিতে লাগিল । মতি জিজ্ঞাসা করিলেন, “কাঁদ কেন ?”

মেহের-উল্লিসা নিশ্বাস ত্যাগ করিয়া কহিলেন, “সেলিম ভারত-বর্ষের সিংহাসনে, আমি কোথায় ?”

মতির মনস্কাম সিদ্ধ হইল । তিনি কহিলেন, “তুমি আজিও যুবরাজকে একেবারে বিস্মৃত হইতে পার নাই ?

মেহের-উল্লিসা গদগদস্বরে কহিলেন, “কাহাকে বিস্মৃত হইব ? আত্মজীবন বিস্মৃত হইব, তথাপি যুবরাজকে বিস্মৃত হইতে পারিব

না। কিন্তু শুন, ভার্গনি ! অকস্মাৎ মনের কবাট খুলিল ; তুমি এ কথা শুনিলে ; কিন্তু আমার শপথ, এ কথা যেন কণাস্তরে না যায় ।”

মতি কহিল, “ভাল, তাহাই হইবে। কিন্তু যখন সের্গিলম শুনবেন যে, আমি বন্দুমানের আসিয়াছিলাম, তখন তিনি অবশ্য জিজ্ঞাসা করিবেন যে, মেহের-উম্মিসা আমার কথা কি বলিল ? তখন আমি কি উত্তর করিব ?”

মেহের-উম্মিসা কিছুক্ষণ ভাবিয়া কহিলেন, “এই কহিও যে, মেহের-উম্মিসা হৃদয়মধ্যে তাহার ধ্যান করিবে। প্রয়োজন হইলে তাহার জন্য আত্মপ্রাণ পর্যন্ত সমর্পণ করিবে। কিন্তু কখনও আপন কুলমান সমর্পণ করিবে না। দাসীর স্বামী জীবিত থাকিতে সে কখনও দিল্লীশ্বরকে মদ্য দেখাইবে না। আর যদি দিল্লীশ্বর কতৃক তাহার স্বামীর প্রাণান্ত হয়, তবে স্বামিহন্তার সহিত ইহজন্মে তাহার মিলন হইবেক না।”

ইহা কহিয়া মেহের-উম্মিসা সে স্থান হইতে উঠিয়া গেলেন। মতিবিবি চমৎকৃত হইয়া রহিলেন। কিন্তু মতিবিবিরই জয় হইল। মেহের-উম্মিসার চিন্তের ভাব মতিবিবি জানিলেন ; মতিবিবির আশা ভরসা মেহের-উম্মিসা কিছুই জানিতে পারিলেন না। যিনি পরে আত্মবুদ্ধিপ্রভাবে দিল্লীশ্বরেও ঈশ্বরী হইয়াছিলেন, তিনিও মতির নিকট পরাজিতা হইলেন। ইহার কারণ, মেহের-উম্মিসা প্রণয়শালিনী ; মতিবিবি এ স্থলে কেবলমাত্র স্বার্থপরায়ণা।

মনুষ্যহৃদয়ের বিচিত্র গতি মতিবিবির বিলক্ষণ বৃদ্ধিতে। মেহের-উম্মিসার কথা আলোচনা করিয়া তিনি যাহা সিদ্ধান্ত করিলেন, কালে তাহাই ষথার্থীভূত হইল। তিনি বৃদ্ধিলেন যে, মেহের-উম্মিসা জাহাঙ্গীরের ষথার্থ অনুরাগিনী ; অতএব নারীদর্পে এখন যাহাই বলুন, পথ মদ্য হইলে মনের গতি রোধ করিতে পারিবেন না। বাদশাহের মনস্কামনা অবশ্য সিদ্ধ করিবেন।

এ সিদ্ধান্তে মতির আশা ভরসা সকলই নিম্নলিখিত হইল। কিন্তু তাহাতে কি মতি নিতান্তই দুঃখিত হইলেন ? তাহা নহে। বরং ঈষৎ সুখানুভবও হইল। কেন যে এমন অসম্ভব চিন্তাপ্রসাদ জন্মিল,

তাহা মতি প্রথমে বদ্বিধিতে পারিলেন না । তিনি আগ্রার পথে যাত্রা করিলেন । পথে কয়েক দিন গেল । সেই কয়েক দিনে আপন চিত্তভাব বদ্বিধিলেন ।

চতুর্থ পরিচ্ছেদ : রাজনিকেতনে

“পত্নীভাবে আর তুমি ভেবো না আমারে ।”

বীরঙ্গনা কাব্য

মতি আগ্রায় উপনীতা হইলেন । আর তাঁহাকে মতি বলিবার আবশ্যক করে না । কয়দিনে তাঁহার চিত্তবৃন্তসকল একেবারে পরিবর্তিত হইয়াছিল ।

জাহাঙ্গীরের সহিত তাঁহার সাক্ষাৎ হইল । জাহাঙ্গীর তাঁহাকে পদ্বিবৎ সমাদর করিয়া, তাঁহার সহোদরের সংবাদ ও পথের কুশল জিজ্ঞাসা করিলেন । লুৎফ উম্মিসা যাহা মেহের-উম্মিসাকে বলিয়াছিলেন, তাহা সত্য হইল । অন্যান্য প্রসঙ্গের পর বন্দুমানের কথা শুনিয়া, জাহাঙ্গীর জিজ্ঞাসা করিলেন,

“মেহের-উম্মিসার নিকট দুই দিন ছিলে বলিতেছ, মেহের-উম্মিসা আমার কথা কি বলিল ?” লুৎফ-উম্মিসা অকপটহৃদয়ে মেহের-উম্মিসার অনুরাগের পরিচয় দিলেন । বাদশাহ শুনিয়া নীরবে রহিলেন ; তাঁহার বিস্ফারিত লোচনে দুই এক বিন্দু অশ্রু বহিল ।

লুৎফ-উম্মিসা কহিলেন, “জাহাঙ্গীনা ! দাসী শ্রুত সংবাদ দিয়াছে । দাসীর এখনও কোন পদরস্কারের আদেশ হয় নাই ।”

বাদশাহ হাসিয়া কহিলেন, “বিবি ! তোমার আকাঙ্ক্ষা অপরিমিত ।”

লুৎফ । জাহাঙ্গীনা ! দাসীর কি দোষ ?

বাদশাহ । দিল্লীর বাদশাহকে তোমার গোলাম করিয়া দিয়াছি ; আরও পদরস্কার চাহিতেছ ?

লুৎফ-উম্মিসা হাসিয়া কহিলেন, “স্ত্রীলোকের অনেক সাধ ।”

বাদশাহ । আবার কি সাধ হইয়াছে ?

লুৎফ । আগে রাজাজ্ঞা হউক, দাসীর আবেদন গ্রাহ্য হইবে ।

বাদশাহ । যদি রাজকার্য্যের বিষয় না হয় ।

লুৎফ । (হাসিয়া) একের জন্য দিল্লীশ্বরের কার্য্যের বিষয় হয় না ।

বাদশাহ । তবে স্বীকৃত হইলাম ;—সাধটি কি শুন ।

লুৎফ । সাধ হইয়াছে একটি বিবাহ করিব ।

জাহাঙ্গীর উচ্চ হাস্য করিয়া উঠিলেন । কহিলেন, “এ নতুনতর সাধ বটে । কোথাও সম্বন্ধের স্থিরতা হইয়াছে ?”

লুৎফ । তা হইয়াছে । কেবল রাজাজ্ঞার অপেক্ষা । রাজার সম্মতি প্রকাশ না হইলে কোন সম্বন্ধ স্থির নহে ।

বাদশাহ । আমার সম্মতির প্রয়োজন কি ? কাহাকে এ সুখের সাগরে ভাসাইবে অভিপ্রায় করিয়াছ ?

লুৎফ । দাসী দিল্লীশ্বরের সেবা করিয়াছে বলিয়া দ্বিচারিণী নহে । দাসী আপন স্বামীকেই বিবাহ করিবার অনুমতি চাহিতেছে ।

বাদশাহ । বটে ! এ পুরাতন নফরের দশা কি করিবে ?

লুৎফ । দিল্লীশ্বরী মেহের-উল্লিসাকে দিয়া যাইব ।

বাদশাহ । দিল্লীশ্বরী মেহের-উল্লিসা কে ?

লুৎফ । যিনি হইবেন ।

জাহাঙ্গীর মনে ভাবিলেন যে, মেহের-উল্লিসা যে দিল্লীশ্বরী হইবেন, তাহা লুৎফ-উল্লিসা ধ্রুব জানিয়েছেন । তৎকারণে নিজ মনোভিলাষ বিফল হইল বলিয়া রাজাবরোধ হইতে বিরাগে অবসর হইতে চাহিতেছেন ।

এইরূপ বুদ্ধিয়া জাহাঙ্গীর দর্শিত হইয়া নীরবে রহিলেন । লুৎফ-উল্লিসা কহিলেন, “মহারাজের কি এ সম্বন্ধে সম্মতি নাই ?”

বাদশাহ । আমার অসম্মতি নাই । কিন্তু স্বামীর সহিত আবার বিবাহের আবশ্যকতা কি ?

লুৎফ । কপালক্রমে প্রথম বিবাহে স্বামী পত্নী বলিয়া গ্রহণ করিলেন না । এক্ষণে জাহাপনার দাসীকে ত্যাগ করিতে পারিবেন না ।

বাদশাহ রহস্যে হাস্য করিয়া পরে গম্ভীর হইলেন। কহিলেন, “প্রেমসী। তোমাকে আমার অদেয় কিছ্‌দ্র নাই। তোমার যদি সেই প্রবৃত্তি হয়, তবে তদ্রূপই কর। কিন্তু আমাকে কেন ত্যাগ করিয়া যাইবে? এই আকাশে কি চন্দ্র সূর্য উভয়েই বিরাজ করেন না? এক বৃক্ষে কি দুইটি ফুল ফুটে না।”

লুৎফ উন্নিসা বিস্ফারিতচক্ষে বাদশাহের প্রতি দৃষ্টি করিয়া কহিলেন, “ক্ষুদ্র ফুল ফুটিয়া থাকে, কিন্তু এক মৃণালে দুইটি কমল ফুটে না। আপনার রক্তসিংহাসনতলে কেন কণ্টক হইয়া থাকিব?”

লুৎফ-উন্নিসা আত্মমন্দিরে প্রস্থান করিলেন। তাঁহার এইরূপ মনোবাঞ্ছা যে কেন জন্মিল, তাহা তিনি জাহাঙ্গীরের নিকট ব্যক্ত করেন নাই। অননুভবে ষেরূপ বন্ধা যাইতে পারে, জাহাঙ্গীর সেইরূপ বন্ধিয়া ক্ষান্ত হইলেন। নিগূঢ় তত্ত্ব কিছ্‌দ্রই জানিলেন না। লুৎফ-উন্নিসার হৃদয় পাষণ। সেলিমের রমণীহৃদয়জিৎ রাজকান্তিও কখন তাঁর মনঃমুগ্ধ করে নাই। কিন্তু এইবার পাষণমধ্যে কীট প্রবেশ করিয়াছিল।

পঞ্চম পরিচ্ছেদ : আত্মমন্দিরে

“জনম অবধি হম রূপ নেহারনু নয়ন না তিরপিপত ভেল।
সোই মধুর বোল শ্রবণহি শুননু শ্রুতিপথে পরশ না গেল ॥
কত মধুসামিনী রভসে গোঁয়ায়নু না বন্ধনু কৈছন কেল।
লাখ লাখ যুগ হিয়ে হিয়ে রাখনু তবু হিয়া জুড়ান না গেল ॥
ষত ষত রসিক জন রসে অনুগমন অননুভব কাহনু না পেথ।
বিদ্যাপতি কহে প্রাণ জুড়াইতে লাখে না মিলল এক ॥”

বিদ্যাপতি

লুৎফ-উন্নিসা আলায়ে আসিয়া প্রফুল্লবদনে পেষমন্কে ডাকিয়া বেশভূষা পরিত্যাগ করিলেন। সুবর্ণ মস্তকাদিখচিত বসন পরিত্যাগ করিয়া পেষমন্কে কহিলেন যে, “এই পোষাকটি তুমি লও।”

শুনিয়া পেষমন্ কিছ্‌দ্র বিস্ময়াপন্ন হইলেন। পোষাকটি বহুদূর্য্যে

সম্প্রতিমাত্র প্রস্তুত হইয়াছিল। কহিলেন, “পোষাক আমায় কেন ? আজিকার কি সংবাদ ?”

লুৎফ-উন্নিসা কহিলেন, “শুভ সংবাদ বটে।”

পেষমন্। তা ত বদ্বিতে পারিতেছি। মেহের-উন্নিসার ভয় কি ঘুচিয়াছে ?

লুৎফ। ঘুচিয়াছে। এক্ষণে সে বিষয়ের কোন চিন্তা নাই।

পেষমন্। অত্যন্ত আহ্লাদ প্রকাশ করিয়া কহিলেন, “তবে এক্ষণে বেগমের দাসী হইলাম।”

লুৎফ। যদি তুমি বেগমের দাসী হইতে চাও, তবে আমি মেহের-উন্নিসাকে বলিয়া দিব।

পেষমন্। সে কি ? আপনি কহিতেছেন যে, মেহের-উন্নিসার বাদশাহের বেগম হইবার কোন সম্ভাবনা নাই।

লুৎফ। আমি এমত কথা বলি নাই। আমি বলিয়াছি, সে বিষয়ে আমার কোন চিন্তা নাই।

পেষমন্। চিন্তা নাই কেন ? আপনি আগ্রায় একমাত্র অধীশ্বর না হইলে যে, সকলই বৃথা হইল।

লুৎফ। আগ্রার সহিত সম্পর্ক রাখিব না।

পেষমন্। সে কি ? আমি যে কিহুই বদ্বিতে পারিতেছি না। আজিকার শুভ সংবাদটা তবে কি, বদ্বাইয়া বলুন।

লুৎফ। শুভ সংবাদ এই যে, আমি এ জীবনের মত আগ্রা ত্যাগ করিয়া চলিলাম।

পেষমন্। কোথায় যাইবেন ?

লুৎফ। বাঙ্গালায় গিয়া বাস করিব। পারি যদি, কোন ভদ্র-লোকের গৃহিণী হইব।

পেষমন্। এরূপ ব্যঙ্গ নূতন বটে, কিন্তু শূন্যে প্রাণ শিহরিয়া উঠে।

লুৎফ। ব্যঙ্গ করিতেছি না। আমি সত্য সত্যই আগ্রা ত্যাগ করিয়া চলিলাম। বাদশাহের নিকট বিদায় লইয়া আসিয়াছি।

পেষমন্। এমন কুপ্রবৃত্তি আপনার জন্মিল।

লুৎফ । কুপ্রবৃত্তি নহে । অনেক দিন আগায় বেড়াইলাম কি ফললাভ হইল ? সুখের তৃষা বাল্যাবধি বড়ই প্রবল ছিল । সেই তৃষার পরিতৃপ্তির জন্য বঙ্গদেশ ছাড়িয়া এ পর্য্যন্ত আসিলাম । এ রত্ন কিনিবার জন্য কি ধন দিলাম ? কোন দুষ্কৰ্ম্ম না করিয়াছি ? আর যে যে উদ্দেশ্যে এতদূর করিলাম, তাহার কোনটাই বা হস্তগত হয় নাই ? ঐশ্বর্য, সম্পদ, ধন, গৌরব, প্রতিষ্ঠা সকলই ত প্রচুর পরিমাণে ভোগ করিলাম । এত করিয়াও কি হইল ? আজ এইখানে বসিয়া সকল দিন মনে মনে গণিয়া বলিতে পারি যে, এক দিনের তরেও সুখী হই নাই, এক মৃদুহৃৎজন্যও কখনও সুখভোগ করি নাই । কখন পরিতৃপ্ত হই নাই । কেবল তৃষা বাড়ে মাত্র । চেষ্টা করিলে আরও সম্পদ, আরও ঐশ্বর্য লাভ করিতে পারি, কিন্তু কি জন্য ? এ সকলে যদি সুখ থাকিত তবে এত দিন এক দিনের তরেও সুখী হইতাম । এই সুখাকাঙ্ক্ষা পার্ব্বতী নির্ঝরিলে ন্যায়—প্রথমে নিম্নাল, ক্ষীণ ধারা বিজন প্রদেশ হইতে বাহির হয়, আপন গর্ভে আপনি লুকাইয়া রহে, কেহ জানে না ; আপনা আপনি কল কল করে, কেহ শুনে না ; ক্রমে যত যায়, তত দেহ বাড়ে, তত পঙ্কিল হয় । শূন্য তাহা নয় ; কখনও আবার বায়ু বহে, তরঙ্গ হয়, মকর কুন্তীরাদি বাস করে । আরও শরীর বাড়ে জল আরও কন্দময় হয়, লবণময় হয়, অগণ্য সৈকত চর—মরুভূমি নদীস্রদয়ে বিরাজ করে, বেগ মন্দীভূত হইয়া যায়, তখন সেই সন্দর্ভ নদীশরীর অনন্ত সাগরে কোথায় লুকায়ে, কে বলিবে ?

পেষমন্ । আমি ইহার ত কিছুই বুঝিতে পারিলাম না । এ সবে তোমার সুখ হয় না কেন ?

লুৎফ । কেন হয় না, তা এত দিনে বুঝিয়াছি । তিন বৎসর রাজপ্রাসাদের ছায়ায় বসিয়া যে সুখ না হইয়াছে, উড়িয়া হইতে প্রত্যাগমনের পথে এক রাত্রে সে সুখ হইয়াছে । ইহাতে বুঝিয়াছি ।

পেষমন্ । কি বুঝিয়াছ ?

লুৎফ । আমি এত কাল হিন্দুদিগের দেবমূর্তির মত ছিলাম ।

বাহিরে সুবর্ণ রত্নাদিতে খচিত ; ভিতরে পাষণ । ইন্দ্রিয়সুখান্বেষণে
আগুনের মধ্যে বেড়াইয়াছি, কখনও আগুন স্পর্শ করি নাই । এখন
একবার দেখি, যদি পাষণमध्ये খুঁজিয়া একটা রক্তশিরাবিশিষ্ট
অন্তঃকরণ পাই ।

পেষমন্ । এও ত কিছু বদ্বিতে পারিলাম না ।

লুৎফ । আমি এই আগ্নেয় কখনও কাহাকে ভালবাসিয়াছি ?

পেষমন্ । (চুপি চুপি) কাহাকেও না ।

লুৎফ । তবে পাষণী নই ত কি ?

পেষমন্ । তা এখন যদি ভালবাসিতে ইচ্ছা হয়, তবে ভালবাস
না কেন ?

লুৎফ । মানস ত বটে । সেই জন্য আগ্নেয় ত্যাগ করিয়া যাইতেছি ।

পেষমন্ । তারই বা প্রয়োজন কি ? আগ্নেয় কি মানুষ নাই যে,
চুয়াড়ের দেশে যাইবে ? এখন যিনি তোমাকে ভালবাসেন, তাঁহাকেই
কেন ভালবাস না ? রূপে বল, ধনে বল, ঐশ্বর্যে বল, সাহায্যে বল,
দিল্লীর বাদশাহের বড় পৃথিবীতে কে আছে ?

লুৎফ । আকাশে চন্দ্রসূর্য্য থাকিতে অধোগামী কেন ?

পেষমন্ । কেন ?

লুৎফ । ললার্টলিখন ।

লুৎফ-উম্মিসা সকল কথা খুলিয়া বলিলেন না । পাষণमध्ये
অগ্নি প্রবেশ করিয়াছিল । পাষণ দ্রব হইতেছিল ।

ষষ্ঠ পরিচ্ছেদ : চরণভলে

“কায় মনঃ প্রাণ আমি সঁপিব তোমারে ।

ভুঞ্জ আসি রাজভোগ দাসীর আলয়ে ॥”

বীরাজনা কাব্য

ক্ষেত্রে বীজ রোপিত হইলে আপনিই অঙ্কুর হয় । যখন অঙ্কুর
হয়, তখন কেহ জানিতে পারে না—কেহ দেখিতে পায় না । কিন্তু
একবার বীজ রোপিত হইলে, রোপনকারী যথায় থাকুন না কেন,

ক্রমে অঙ্কুর হইতে বৃক্ষ মস্তক উন্নত করিতে থাকে । অদ্য বৃক্ষটি অঙ্গুলিপরিময়ে মাত্র, কেহ দেখিয়াও দেখিতে পায় না । ক্রমে তিল তিল বৃদ্ধি । ক্রমে বৃক্ষটি অর্ধ হস্ত, এক হস্ত দুই হস্ত পরিমিত হইল ; তথাপি, যদি তাহাতে কাহারও স্বার্থসিদ্ধির সম্ভাবনা না রহিল, তবে কেহ দেখে না, দেখিয়াও দেখে না । দিন যায়, মাস যায়, বৎসর যায়, ক্রমে তাহার উপর চক্ষু পড়ে । আর অমনোযোগের কথা নাই,—ক্রমে বৃক্ষ বড় হয়, তাহার ছায়ায় অন্য বৃক্ষ নষ্ট করে,—চারি কি, ক্ষেত্র অনন্যপাদপ হয় ।

লুৎফ-উল্লিসার প্রণয় এইরূপ বাড়িয়াছিল । প্রথম একদিন অকস্মাৎ প্রণয়ভাজনের সাহিত সাক্ষাৎ হইল, তখন প্রণয়সম্ভার বিশেষ জানিতে পারিলেন না । কিন্তু তখনই অঙ্কুর হইয়া রহিল । তাহার পর আর সাক্ষাৎ হইল না । কিন্তু অসাক্ষাতে পুনঃ পুনঃ সেই মধুমণ্ডল মনে পড়িতে লাগিল, স্মৃতিপটে সে মধুমণ্ডল চিত্রিত করা কতক কতক সুখকর বলিয়া বোধ হইতে লাগিল । বীজে অঙ্কুর জন্মিল । মূর্ত্তিপ্ৰতি অনুরাগ জন্মিল । চিত্তের ধর্ম্ম এই যে, যে মানসিক কর্ম্ম যত অধিক বার করা যায়, সে কর্ম্ম তত অধিক প্রবৃত্তি হয় ; সে কর্ম্ম ক্রমে স্বভাবসিদ্ধ হয় । লুৎফ-উল্লিসা সেই মূর্ত্তি অহরহঃ মনে ভাবিতে লাগিলেন । দারুণ দর্শনাভিলাষ জন্মিল ; সঙ্গে সঙ্গে তাঁহার সহজস্পৃহাপ্রবাহও দুনিবার্য্য হইয়া উঠিল । দিল্লীর সিংহাসনলালসাও তাঁহার নিকট লঘু হইল । সিংহাসন যেন মস্তক-শরসম্মত অগ্নিরাশিবেষ্টিত বোধ হইতে লাগিল । রাজ্য, রাজধানী, রাজসিংহাসন, সকল বিসর্জন দিয়া প্রিয়জন-সন্দর্শনে ধাবিত হইলেন, সে প্রিয়জন নবকুমার ।

এই জন্যই লুৎফ-উল্লিসা মেহের-উল্লিসার আশানাশিনী কথা শুনিয়াও অসুখী হয়েন নাই ; এই জন্যই আগ্রায় আসিয়া সম্পদ্রক্ষায় কোন ষড়্ধ পাইলেন না ; এই জন্যই জন্মের মত বাদশাহের নিকট বিদায় লইলেন ।

লুৎফ-উল্লিসা সপ্তগ্রামে আসিলেন । রাজপথের অনতিদূরে

নগরীর মধ্যে এক অট্টালিকায় আপন বাসস্থান করিলেন। রাজপথের পথিকেরা দেখিলেন, অকস্মাৎ এই অট্টালিকা সুবর্ণখচিতবসনভূষিত দাসদাসীতে পরিপূর্ণ হইয়াছে। ঘরে ঘরে হুসুসজ্জা অতি মনোহর। গন্ধদ্রব্য, গন্ধবারি, কুসুমদাম সর্বত্র আমোদ করিতেছে। স্বর্ণ, রৌপ্য, গজদস্তাদিখচিত গৃহশোভার্থ নানা দ্রব্য সকল স্থানেই আলো করিতেছে। এরূপ সজ্জীভূত এক কক্ষে লুৎফ-উন্নিসা অধোবদনে বসিয়া আছেন; পৃথগাসনে নবকুমার বসিয়া আছেন। সপ্তগ্রামে নবকুমারের সহিত লুৎফ-উন্নিসার আর দুই একবার সাক্ষাৎ হইয়াছিল; তাহাতে লুৎফ-উন্নিসার মনোরথ কত দূর সিদ্ধ হইয়াছিল, তাহা অদ্যকার কথায় প্রকাশ হইবে।

নবকুমার কিছুক্ষণ নীরবে থাকিয়া কহিলেন, “তবে আমি এক্ষণে চলিলাম। তুমি আর আমাকে ডাকিও না।”

লুৎফ-উন্নিসা কহিলেন, “যাইও না। আর একটু থাক! আমার ষাধা বক্তব্য, তাহা সমাপ্ত করি নাই।”

নবকুমার আরও ক্ষণেক প্রতীক্ষা করিলেন, কিন্তু লুৎফ-উন্নিসা কিছু বলিলেন না। ক্ষণেক পরে নবকুমার জিজ্ঞাসা করিলেন, “আর কি বলিবে?” লুৎফ-উন্নিসা কোন উত্তর করিলেন না—তিনি নীরবে রোদন করিতেছিলেন।

নবকুমার ইহা দেখিয়া গাগোথান করিলেন; লুৎফ-উন্নিসা তাহার বস্ত্রাগ্র ধৃত করিলেন। নবকুমার ঈষৎ বিরক্ত হইয়া কহিলেন, “কি, বল না?”

লুৎফ-উন্নিসা কহিলেন, “তুমি কি চাও? পৃথিবীতে কিছু কি প্রার্থনীয় নাই? ধন, সম্পদ, মান, প্রণয়, রঙ্গ, রহস্য পৃথিবীতে ষাহাকে ষাহাকে সুখ বলে, সকলই দিব; কিছুই তাহার প্রতিদান চাহি না; কেবল তোমার দাসী হইতে চাহি। তোমার যে পত্নী হইব এ গৌরব চাহি না, কেবল দাসী!”

নবকুমার কহিলেন, “আমি দরিদ্র ব্রাহ্মণ, ইহজন্মে দরিদ্র ব্রাহ্মণই থাকিব। তোমার দত্ত ধনসম্পদ লইয়া যবনীজার হইতে পারিব না।”

ষবনীজার ! নবকুমার এ পর্য্যন্ত জানিতে পারেন নাই যে, এই রমণী তাঁহার পত্নী । লুৎফ-উন্নিসা অধোবদনে রহিলেন । নবকুমার তাঁহার হস্ত হইতে বস্ত্রাগ্রভাগ ম্ভুত করিলেন । লুৎফ-উন্নিসা আবার তাঁহার বস্ত্রাগ্র ধরিয়া কহিলেন,

“ভাল, সে ষাউক । বিধাতার যদি সেই ইচ্ছা, তবে চিত্তবৃতিসকল অতল জলে ডুবাইব । আর কিছ্ চাহি না, এক একবার তুমি এই পথে যাইও ; দাসী ভাবিয়া এক একবার দেখা দিও কেবল চক্ষুঃপরিভূষি করিব ।”

নবকুমার । তুমি ষবনী পরস্পরী—তোমার সহিত এরূপ আলাপেও দোষ । তোমার সহিত আর আমার সাক্ষাৎ হইবে না ।

ক্ষণেক নীরব । লুৎফ-উন্নিসার হৃদয়ে ঝটিকা বহিতোছিল । প্রস্তরময়ী মূর্ত্তিবৎ নিম্পন্দ রহিলেন । নবকুমারের বস্ত্রাগ্রভাগ ত্যাগ করিলেন । কহিলেন, “যাও ।”

নবকুমার চলিলেন । দুই চারি পদ চলিয়াছেন মাত্র, সহসা লুৎফ-উন্নিসা বাতোন্মূলিত পাদপের ন্যায় তাঁহার পদতলে পড়িলেন । বাহুল্যায় চরণযুগল বন্ধ করিয়া কাতরস্বরে কহিলেন,

“নিন্দয় ! আমি তোমার জন্য আগ্রার সিংহাসন ত্যাগ করিয়া আসিয়াছি । তুমি আমায় ত্যাগ করিও না ।”

নবকুমার কহিলেন, “তুমি আবার আগ্রাতে ফিরিয়া যাও, আমার আশা ত্যাগ কর ।”

“এ জন্মে নহে ।” লুৎফ-উন্নিসা তীরবৎ দাঁড়াইয়া উঠিয়া সদপেঁ কহিলেন, “এ জন্মে তোমার আশা ছাড়িব না ।” মস্তক উন্নত করিয়া, ঈষৎ বঙ্কিম গ্রীবাভঙ্গি করিয়া, নবকুমারের মধুখপ্তি অনিমিষ আয়ত চক্ষু স্থাপিত করিয়া, রাজরাজমোহিনী দাঁড়াইলেন । যে অনবনমনীয় গর্ব হৃদয়ান্নিতে গলিয়া গিয়াছিল, আবার তাহার জ্যোতিঃ স্ফুরিল ; যে অজেয় মানসিক শক্তি ভারতরাজ্য-শাসনকম্পনায় ভীত হয় নাই, সেই শক্তি আবার প্রণয়দুর্বল দেহে সঞ্চারিত হইল । ললাটদেশে ধমনী সকল স্ফীত হইয়া রমণীয় রেখা দেখা দিল ; জ্যোতির্ময় চক্ষুঃ

রবিবরমুখরিত সমুদ্রবারিবাৎ ঝলসিতে লাগিল ; নাসারম্ভ কাঁপিতে লাগিল । স্রোতোবিহারিণী রাজহংসী যেমন গতিবিরোধীর প্রতি গ্রীবাভঙ্গি করিয়া দাঁড়ায়, দলিতফণা ফণিনী যেমন ফণা তুলিয়া দাঁড়ায়, তেমনি উন্মাদিনী যবনী মস্তক তুলিয়া দাঁড়াইলেন । কহিলেন, “এ জন্মে না । তুমি আমারই হইবে ।”

সেই কর্ণপতফণিনীমূর্তি প্রতি নিরীক্ষণ করিতে করিতে নবকুমার ভীত হইলেন । লুৎফ-উন্নিসার অনির্বচনীয় দেহমহিমা এখন সেরূপ দেখিতে পাইলেন, সেরূপ আর কখনও দেখেন নাই । কিন্তু সে শ্রী বজ্রসূচক বিদ্রুতের ন্যায় মনোমোহিনী ; দেখিয়া ভয় হইল । নবকুমার চলিয়া যান, তখন সহসা তাঁহার আর এক তেজময়ী মূর্তি মনে পড়িল । এক দিন নবকুমার তাঁহার প্রথমা পত্নী পদ্মাবতীর প্রতি বিরক্ত হইয়া তাঁহাকে শয়নাগার হইতে বহিষ্কৃত করিতে উদ্যত হইয়াছিলেন । দ্বাদশবর্ষীয়া বালিকা তখন সদর্পে তাঁহার দিকে ফিরিয়া দাঁড়াইয়াছিল ; এমনই তাহার চক্ষুঃ প্রদীপ্ত হইয়াছিল ; এমনই ললাটে রেখাবিকাশ হইয়াছিল ; এমনই নাসারম্ভ কাঁপিয়াছিল ; এমনই মস্তক হেলিয়াছিল । বহুকাল সে মূর্তি মনে পড়ে নাই, এখন মনে পড়িল । এমনই সাদৃশ্য অনুভূত হইল । সংশয়াধীন হইয়া নবকুমার সঙ্কর্ষিত স্বরে, ধীরে ধীরে কহিলেন, “তুমি কে ?”

যবনীর নয়নতারা আরও বিস্ফারিত হইল । কহিলেন, “আমি পদ্মাবতী ।”

উত্তর প্রতীক্ষা না করিয়া লুৎফ-উন্নিসা স্থানান্তরে চলিয়া গেলেন । নবকুমারও অন্যমনে কিছু শঙ্কান্বিত হইয়া, আপন আলয়ে গেলেন ।

সপ্তম পরিচ্ছেদ : উপনয়নপ্রাপ্তে

“—————I am settled, and bend up
Each Corporal agent to this terrible feat.”

macbeth

কক্ষান্তরে গিয়া লুৎফ-উন্নিসা দ্বার রুদ্ধ করিলেন । দুই দিন

পর্যন্ত সেই কক্ষ হইতে নিগত হইলেন না। এই দুই দিনে তিনি নিজ কতব্যাকতব্য স্থির করিলেন। স্থির করিয়া দৃঢ়প্রতিজ্ঞ হইলেন। সূর্য্য অস্তাচলগামী। তখন লুৎফ-উন্নিসা পেশমনের সাহায্যে বেশভূষা করিতেছিলেন। আশ্চর্য্য বেশভূষা! রমণীবেশের কিছুমাত্র চিহ্ন নাই। যে বেশভূষা করিলেন, তাহা মৃদু করে দেখিয়া পেশমনকে কহিলেন, “কেমন ; পেশমন্, আর আমাকে চেনা যায় ?”

পেশমন্ কহিলেন, “কার সাধ্য ?”

লুৎফ। তবে আমি চলিলাম। আমার সঙ্গে যেন কোন দাসী না যায়।

পেশমন্ কিছু সংকুচিতচিত্তে কহিল, “যদি দাসীর অপরাধ ক্ষমা করেন, তবে একটি কথা জিজ্ঞাসা করি।” লুৎফ-উন্নিসা কহিলেন, “কি ?” পেশমন্ কহিল, “আপনার উদ্দেশ্য কি ?”

লুৎফ-উন্নিসা কহিলেন, “আপাততঃ কপালকুণ্ডলার সহিত স্বামীর চিরবিচ্ছেদ। পরে তিনি আমার হইবেন।”

পেশমন্। বিবি! ভাল করিয়া বিবেচনা করুন ; সে নিবিড় বন, রাত্রি আগত ; আপনি একাকিনী।

লুৎফ-উন্নিসা এ কথার কোন উত্তর না করিয়া গৃহ হইতে বিহগতা হইলেন। সপ্তগ্রামের যে জনহীন বনময় উপনগরপ্রান্তে নবকুমারের বসতি, সেই দিকে চলিলেন। তৎপ্রদেশে উপনীত হইতে রাত্রি হইয়া আসিল। নবকুমারের বাটীর অনতিদূরে এক নিবিড় বন আছে, পাঠক মহাশয়ের স্মরণ হইতে পারে। তাহারই প্রান্তভাগে উপনীত হইয়া এক বৃক্ষতলে উপবেশন করিলেন। কিছুকাল বসিয়া যে দুঃসাহসিক কার্য্য প্রবৃত্ত হইয়াছিলেন, তদ্বিষয়ে চিন্তা করিতে লাগিলেন। ঘটনাক্রমে তাহার অনদ্ভূতপদার্থ সহায় উপস্থিত হইল।

লুৎফ-উন্নিসা ষথায় বসিয়াছিলেন, তথা হইতে এক অনবরত সমানোচ্চারিত মনুষ্যকণ্ঠে নিগত শব্দ শুনিতে পাইলেন। উঠিয়া দাঁড়াইয়া চারিদিক চাহিয়া দেখিলেন যে, বনমধ্যে একটি আলো দেখা

বাইতেছে । লুৎফ-উদ্দিনসা সাহসে পদ্রুঘের অধিক ; যথায় আলো জ্বলিতেছে, সেই স্থানে গেলেন । প্রথমে বৃক্ষান্তরাল হইতে দেখিলেন, ব্যাপার কি ? দেখিলেন যে, যে আলো জ্বলিতেছিল, সে হোমের আলো ; যে শব্দ শ্রুতিতে পাইয়াছিলেন, সে মন্ত্রপাঠের শব্দ । মন্ত্রমধ্যে একটি শব্দ বদ্বিতে পারিলেন, সে একটি নাম । নাম শ্রুতিবামাত্র লুৎফ-উদ্দিনসা হোমকারীর নিকট গিয়া বসিলেন ।

এক্ষণে তিনি তথায় বসিয়া থাকুন ; পাঠক মহাশয় বহুকাল কপালকুণ্ডলার কোন সংবাদ পান নাই, সুতরাং কপালকুণ্ডলার সংবাদ আবশ্যক হইয়াছে ।

চতুর্থ খণ্ড

প্রথম পরিচ্ছেদ : শয়লাগারে

“রাধিকার বেড়ী ভাঙ্গ, এ মম মিনতি ।”

ব্রজাপ্রনা কাব্য

লুৎফ-উন্নিসার আগ্রা গমন করিতে এবং তথা হইতে সপ্তগ্রাম আসিতে প্রায় এক বৎসর গত হইয়াছিল। কপালকন্ডলা এক বৎসরের অধিক কাল নবকুমারের গৃহিণী। যৌদিন প্রদোষকালে লুৎফ-উন্নিসা কাননে, সেদিন কপালকন্ডলা অন্যমনে শয়নকক্ষে বসিয়া আছেন। পাঠক মহাশয় সমুদ্রতীরে আলুলায়িতকন্ডলা ভূষণহীনা যে কপালকন্ডলা দেখিয়াছেন, এ সে কপালকন্ডলা নহে। শ্যামাসুন্দরীর ভবিষ্যদ্বাণী সত্য হইয়াছে; স্পর্শমণির স্পর্শে যোগিনী গৃহিণী হইয়াছেন, এই ক্ষণে সেই অসংখ্য কৃষ্ণোজ্জ্বল ভূজঙ্গের বাহুতুল্য, আগলুফলিম্বিত কেশরাশি পশ্চাৎভাগে স্থূলবেণীসম্বন্ধ হইয়াছে। বেণীরচনায়ও শিল্পপারিপাট্য লক্ষিত হইতেছে, কেশবিন্যাসে অনেক সুক্ষ্ম কারুকার্য শ্যামাসুন্দরীর বিন্যাস-কৌশলের পরিচয় দিতেছে। কদুমদামও পরিত্যক্ত হয় নাই, চতুষ্পাশ্বে কিরীটমণ্ডলস্বরূপ বেণী বেষ্টিত করিয়া রহিয়াছে। কেশের যে ভাগ বেণীমধ্যে ন্যস্ত হয় নাই, তাহা যে মাথার উপরে সর্বত্র সমানোচ্চ হইয়া রহিয়াছে, এমত নহে। আকৃষ্টন প্রযুক্ত ক্ষুদ্র ক্ষুদ্র কৃষ্ণতরঙ্গরেখায় শোভিত হইয়া রহিয়াছে। মূখমণ্ডল এখন আর কেশভারে অর্ধলুক্কায়িত নহে; জ্যোতির্ময় হইয়া শোভা পাইতেছে, কেবলমাত্র স্থানে স্থানে বন্ধনবিপ্রংসী ক্ষুদ্র ক্ষুদ্র অলকাগুচ্ছ তদুপরি স্বেদবিজড়িত হইয়া রহিয়াছে। বর্ণ সেই অর্ধপূর্ণশাঙ্করশ্মিরদ্রি। এখন দুই কর্ণে হেমকর্ণভূষা দুলিতেছে; কণ্ঠে হিরণ্ময় কণ্ঠমালা দুলিতেছে। বর্ণের নিকট সে সকল স্নান হয় নাই অর্ধচন্দ্রকৌমুদীবসনা ধরণীর অণেক নৈশ কদুমবৎ শোভা

পাইতেছে। তাঁহার পরিধানে শুক্লান্বর ; সে শুক্লান্বর অশ্বচন্দ্রদীপ্ত
আকাশমণ্ডলে অর্নিবিড় শুক্ল মেঘের ন্যায় শোভা পাইতেছে।

বর্ণ সেইরূপ চন্দ্রার্ধকোমুদীময় বটে, কিন্তু যেন পদ্ব্যপেক্ষা
ঈষৎ সমল, যেন আকাশপ্রান্তে কোথা কাল মেঘ দেখা দিয়াছে। কপাল-
কুণ্ডলা একাকিনী বসিয়া ছিলেন না ; সখী শ্যামাসুন্দরী নিকটে
বসিয়া ছিলেন। তাঁহাদের উভয়ের পরস্পরের কথোপকথন হইতেছিল।
তাহার কিয়দংশ পাঠক মহাশয়কে শ্রুতিতে হইবে।

কপালকুণ্ডলা কহিলেন, “ঠাকুরজামাই আর কত দিন এখানে
থাকিবেন?”

শ্যামা কহিলেন, “কাল বিকালে চলিয়া যাইবে। আহা! আজ
রাত্রে যদি ঔষধটি তুলিয়া রাখিতাম, তবে তাহা বশ করিয়া মনুষ্যজন্ম
সার্থক করিতে পারিতাম। কাল রাত্রে বাহির হইয়াছিলাম বলিয়া
নাথি ঝাঁটা খাইলাম, আর আজ বাহির হইব কি প্রকারে?”

কপালকুণ্ডলা। দিনে তুলিলে কেন হয় না?

শ্যামা। দিনে তুলিলে ফল্বে কেন? ঠিক দুই প্রহর রাত্রে
এলোচুলে তুলিতে হয়। তা ভাই, মনের সাধ মনেই রহিল ॥

কপালকুণ্ডলা। আচ্ছা, আমি ত আজ দিনে সে গাছ চিনে এসেছি,
আর যে বনে হয়, তাও দেখে এসেছি। তোমাকে আজ আর যেতে
হবে না, আমি একা গিয়ে ঔষধ তুলিয়া আনিব।

শ্যামা। এক দিন যা হইয়াছে তা হইয়াছে। রাত্রে তুমি আর
বাহির হইও না।

কপালকুণ্ডলা। সে জন্য তুমি কেন চিন্তা কর? শ্রুনেছ ত, রাত্রে
বেড়ান আমার ছেলেবেলা হইতে অভ্যাস। মনে মনে ভেবে দেখ, যদি
আমার সে অভ্যাস না থাকিত, তবে তোমার সঙ্গে আমার কখনও
চাক্ষুস হইত না।

শ্যামা। সে ভয়ে বলি না। কিন্তু একা রাত্রে বনে বনে বেড়ান
কি গৃহস্থের বউঝির ভাল। দুইজনে গিয়াও এত তিরস্কার খাইলাম,
তুমি একাকিনী গেলে কি রক্ষা থাকিবে?

কপালকুণ্ডলা। ক্ষতিই কি ? তুমিও মনে করিয়াছ যে, আমি
রাতে ঘরের বাহির হইলেই কুচরিয়া হইব ?

শ্যামা। আমি তা মনে করি না। কিন্তু মন্দিরলোকে মন্দ বলবে।

কপালকুণ্ডলা। বলুক, আমি তাতে মন্দ হব না।

শ্যামা। তা ত হবে না—কিন্তু তোমাকে কেহ কিছু মন্দ বলিলে
আমাদিগের অন্তঃকরণে ক্রেশ হবে।

কপালকুণ্ডলা। এমন অন্যায় ক্রেশ হইতে দিও না।

শ্যামা। তাও আমি পারিব। কিন্তু দাদাকে কেন অসুখী করিবে ?

কপালকুণ্ডলা শ্যামাসুন্দরীর প্রতি নিজ স্নিগ্ধোজ্জ্বল কটাক্ষ
নিষ্ক্ষেপ করিলেন। কহিলেন, “ইহাতে তিনি অসুখী হইবেন, আমি
কি করিব ? যদি জানিতাম যে, স্ত্রীলোকের বিবাহ দাসীত্ব, তবে
কদাপি বিবাহ করিতাম না।”

ইহার পর আর কথা শ্যামাসুন্দরী ভাল বুঝিলেন না। আত্মকন্মে
উঠিয়া গেলেন।

কপালকুণ্ডলা প্রয়োজনীয় গৃহকার্য্যে ব্যাপ্ত হইলেন। গৃহকার্য্য
সমাপ্ত করিয়া ওষধির অনুসন্ধানে গৃহ হইতে বহির্গতা হইলেন।
তখন রাত্রি প্রহরাতীত হইয়াছিল। নিশা সজ্যোৎস্না। নবকুমার
বহিঃপ্রকোষ্ঠে বসিয়াছিলেন, কপালকুণ্ডলা যে বাহির হইয়া যাইতেছেন,
তাহা গবাক্ষপথে দেখিতে পাইলেন। তিনিও গৃহত্যাগ করিয়া
আসিয়া মৃন্ময়ীর হাত ধরিলেন। কপালকুণ্ডলা কহিলেন, “কি ?”

নবকুমার কহিলেন, “কোথা যাইতেছ ?” নবকুমারের স্বরে
তিরস্কারের সূচনামাত্র ছিল না।

কপালকুণ্ডলা কহিলেন, “শ্যামাসুন্দরী স্বামীকে বশ করিবার
জন্য ঔষধ চাহে, আমি ঔষধের সন্ধানে যাইতেছি।”

নবকুমার পূর্বেই কোমল স্বরে কহিলেন, “ভাল, কালি ত এক-
বার গিয়েছিলে ? আজি আবার কেন ?”

কপালকুণ্ডলা। কালি খুঁজিয়া পাই নাই ; আজি আবার খুঁজিব।

নবকুমার অতি মৃদুভাবে কহিলেন, “ভাল, দিনে খুঁজিলেও ত

হয় ?” নবকুমারের স্বর স্নেহপরিপূর্ণ ।

কপালকুণ্ডলা কহিলেন, “দিবসে ও ঔষধ ফলে না ।”

নবকুমার । কাজই কি তোমার ঔষধ তল্লাসে ? আমাকে নাম বলিয়া দাও । আমি ওষধি তুলিয়া আনিয়া দিব ।

কপালকুণ্ডলা । আমি গাছ দেখিলে চিনিতে পারি, কিন্তু নাম জানি না । আর তুমি তুলিলে ফলিবে না । স্ত্রীলোকে এলোচুলে তুলিতে হয় । তুমি পরের উপকারে বিঘ্ন করিও না ।

কপালকুণ্ডলা এই কথা অপ্রসন্নতার সহিত বলিলেন । নবকুমার আর আপত্তি করিলেন না । বলিলেন, “চল, আমি তোমার সঙ্গে যাইব ।”

কপালকুণ্ডলা গর্বিষ্মতবচনে কহিলেন, “আইস, আমি অবিশ্বাসিনী কি না, স্বচক্ষে দেখিয়া যাও ।”

নবকুমার আর কিছু বলিতে পারিলেন না । নিশ্বাসসহকারে কপালকুণ্ডলার হাত ছাড়িয়া দিয়া গৃহে প্রত্যাগমন করিলেন । কপালকুণ্ডলা একাকিনী বনমধ্যে প্রবেশ করিলেন ।

দ্বিতীয় পরিচ্ছেদ : কাননতলে

“—Tender is the night.

And haply the Queen moon is on her throne,

Clustered around by all her starry fays :

But here there is no Light.”

Keats

সপ্তগ্রামের এই ভাগ যে বনময়, তাহা পৃথিবী কতক কতক উল্লিখিত হইয়াছে । গ্রামের কিছুর দূরে নিবিড় বন । কপালকুণ্ডলা একাকিনী এক সংকীর্ণ বন্য পথে ওষধির স্থানে চলিলেন । যামিনী মধুরা, একান্ত শব্দমাত্রবিহীনা । মাধবী যামিনীর আকাশে স্নিগ্ধরশ্মিময় চন্দ্র নীরবে শ্বেত মেঘখণ্ড-সকল উত্তীর্ণ হইতেছে ; পৃথিবীতলে বন্য বৃক্ষ, লতা-সকল তদ্রূপ নীরবে শীতল চন্দ্রকরে

বিশ্রাম করিতেছে, নীরবে বৃক্ষপত্র-সকল সে কিরণের প্রতিঘাত করিতেছে। নীরবে লতাগুচ্ছमध्ये শ্বেত কদম্বদল বিকশিত হইয়া রহিয়াছে। পশু পক্ষী নীরব। কেবল কদাচিৎ মাত্র ভ্রমবিশ্রাম কোন পক্ষীর পক্ষস্পন্দনশব্দ ; কোথাও ক্রীচৎ শৃঙ্গপত্রপাতশব্দ ; কোথাও তলস্থ শৃঙ্গপত্রमध्ये উরগজাতীয় জীবের ক্রীচৎ গতিজনিত শব্দ ; ক্রীচৎ অতি দূরস্থ কন্ধুররব। এমনত নহে যে, একেবারে বায়ু বহিতেছিল না ; মধুমাসের দেহস্নিগ্ধকর বায়ু অতি মৃদু ; একান্ত নিঃশব্দ বায়ু মাত্র ; তাহাতে কেবলমাত্র বৃক্ষের সর্বত্রাভাগারূঢ় পত্রগুলি হেলিতেছিল ; কেবলমাত্র আভূমিপ্রগত শ্যামা লতা দুলিতেছিল ; কেবলমাত্র নীলাম্বরসঞ্চারী ক্ষুদ্র শ্বেতাম্বুদখণ্ডগুলি ধীরে ধীরে চলিতেছিল। কেবলমাত্র তদ্রূপ বায়ুসংসর্গে সম্ভুক্ত পূর্বসুখের অস্পষ্ট স্মৃতি হৃদয়ে অঙ্গ জাগরিত হইতেছিল।

কপালকুণ্ডলার সেইরূপ পূর্বস্মৃতি জাগরিত হইতেছিল ; বালিয়াড়ির শিখরে যে সাগরবারিবিবৃদ্ধসংস্পৃষ্ট মলয়ানিল তাহার লম্বালকমণ্ডলमध्ये ক্রীড়া করিত, তাহা মনে পড়িল ; অমল নীলানন্ত গগনপ্রতি চাহিয়া দেখিলেন ; সেই অমল নীলানন্ত গগনরূপী সমুদ্র মনে পড়িল। কপালকুণ্ডলা পূর্বস্মৃতি সমালোচনায় অন্যমনা হইয়া চলিলেন।

অন্যমনে যাইতে যাইতে কোথায় কি উদ্দেশ্যে যাইতেছিলেন, কপালকুণ্ডলা তাহা ভাবিলেন না। যে পথে যাইতেছিলেন, তাহা ক্রমে অগম্য হইয়া আসিল ; বন নির্বিড়তর হইল ; মাথার উপর বৃক্ষশাখাবিন্যাসে চন্দ্রালোক প্রায় একেবারে রুদ্ধ হইয়া আসিল ; ক্রমে আর পথ দেখা যায় না। পথের অলক্ষ্যতায় প্রথমে কপালকুণ্ডলা চিন্তামগ্নতা হইতে উখিত হইলেন। ইতস্ততঃ দৃষ্টিপাত করিয়া দেখিলেন, এই নির্বিড় বনमध्ये আলো জ্বলিতেছে। লুৎফ-উল্লিন্সাও পূর্বে এই আলো দেখিয়াছিলেন। কপালকুণ্ডলা পূর্বাভ্যাসফলে এ সকল সময়ে ভয়হীনা, অথচ কৌতূহলময়ী। ধীরে ধীরে সেই দীপজ্যোতির অভিমুখে গেলেন। দেখিলেন, যথায় আলো জ্বলিতেছে, তথায় কেহ নাই। কিন্তু তাহার অনতিদূরে বননির্বিড়তা হেতু দূর

হইতে অদৃশ্য একটি ভগ্ন গৃহ আছে । গৃহটি ইষ্টকনির্মিত, কিন্তু অতি ক্ষুদ্র, অতি সামান্য, তাহাতে একটিমাত্র ঘর সেই ঘর, হইতে মনুষ্যকথোপকথনশব্দ নির্গত হইতেছিল । কপালকুণ্ডলা নিঃশব্দ-পদক্ষেপে গৃহসন্নিধানে গেলেন । গৃহের নিকটবর্তী হইবামাত্র বোধ হইল, দুই জন মনুষ্য সাবধানে কথোপকথন করিতেছে । প্রথমে কথোপকথন কিছুই বদ্বিধিতে পারিলেন না । পরে ক্রমে চেষ্টাজনিত কণ্ঠের তীক্ষ্ণতা জন্মিলে নিম্নলিখিত মত কথা শুনিতে পাইলেন ।

এক জন কহিতেছে, “আমার অভীষ্ট মৃত্যু, ইহাতে তোমার অভিমত না হয়, আমি তোমায় সাহায্য করিব না ; তুমিও আমার সহায়তা করিও না ।”

অপর ব্যক্তি কহিল, “আমিও মঙ্গলাকাঙ্ক্ষী নহি ; কিন্তু যাবজ্জীবন জন্য ইহার নিব্বাসন হয় তাহাতে আমি সন্মত আছি । কিন্তু হত্যার কোন উদ্যোগ আমি হইতে হইবে না ; বরং তাহার প্রতিকূলতচরণ করিব ।”

প্রথমালাপকারী কহিল, “তুমি অতি অবোধ, অজ্ঞান । তোমার কিছু জ্ঞানদান করিতেছি । মনঃসংযোগ করিয়া শ্রবণ কর । অতি গঢ় বৃত্তান্ত বলিব ; চতুর্দিক্ একবার দেখিয়া আইস, যেন মনুষ্যবাস শুনিতে পাইতেছি ।”

বাস্তবিক কপালকুণ্ডলা কথোপকথন উত্তমরূপে শুনিলার জন্য কক্ষপ্রাচীরের অতি নিকটে আসিয়া দাঁড়াইয়া ছিলেন এবং তাহার আগ্রহাতিশয় ও শঙ্কার কারণে ঘন ঘন গদ্রু শ্বাস বহিতোছিল ।

সমভিব্যাহারীর কথায় গৃহমধ্যস্থ এক ব্যক্তি বাহিরে আসিলেন এবং আসিয়াই কপালকুণ্ডলাকে দেখিতে পাইলেন । কপালকুণ্ডলাও পরিষ্কার চন্দ্রালোকে আগন্তুক পদ্রুপের অবয়ব সুস্পষ্ট দেখিলেন । দেখিয়া ভীতা হইবেন, কি প্রফুল্লিতা হইবেন, তাহা স্থির করিতে পারিলেন না । দেখিলেন আগন্তুক ব্রাহ্মণবেশী ; সামান্য ধূতি পরা ; গাত্র উত্তরীয়ে উত্তমরূপে আচ্ছাদিত । ব্রাহ্মণকুমার অতি কোমল-বয়স্ক ; মৃদুস্বভাবে বয়ঃশিচহু কিছুমাত্র নাই । মৃদুখানি পরম সুন্দর,

সুন্দরী রমণীমুখের ন্যায় সুন্দর, কিন্তু রমণীদুল্লভ তেজোগর্ব্ব-
 বিশিষ্ট। তাঁহার কেশগদুলি সচরাচর পুরুষদিগের কেশের ন্যায়
 ক্ষৌরকার্য্যবিশেষাত্মক মাত্র নহে, স্ত্রীলোকদিগের ন্যায় অচ্ছিন্নাবস্থায়
 উত্তরীয় প্রচ্ছন্ন করিয়া পৃষ্ঠদেশে, অংসে, বাহুদেশে, কদাচিৎ বক্ষে
 সংসর্পিত হইয়া পড়িয়াছে। ললাট প্রশস্ত, ঈষৎ স্ফীত, মধ্যস্থলে
 একমাত্র শিরাপ্রকাশশোভিত। চক্ষু দুটি বিদ্যুত্তেজঃপরিপূর্ণ।
 কোষশূন্য এক দীর্ঘ তরবারি হস্তে ছিল। কিন্তু এ রূপরাশিমধ্যে
 এক ভীষণ ভাব ব্যক্ত হইতেছিল। হেমকান্ত বর্ণে যেন কোন করাল
 কামনায় ছায়া পড়িয়াছিল। অন্তস্থল পর্য্যন্ত অবেষণক্ষম কটাক্ষ
 দেখিয়া কপালকুণ্ডলার ভীতিসঞ্চার হইল।

উভয়ে উভয়ের প্রতি ক্ষণকাল চাহিয়া রহিলেন। প্রথমে কপাল-
 কুণ্ডলা নয়নপল্লব নিষ্কিপ্ত করিলেন। কপালকুণ্ডলা নয়নপল্লব
 নিষ্কিপ্ত করাতে আগন্তুক তাঁহাকে জিজ্ঞাসা করিলেন, “তুমি কে?”

যদি এক বৎসর পূর্বে হিজলীর কিয়াবনে কপালকুণ্ডলার প্রতি
 এ প্রশ্ন হইত, তবে তিনি তৎক্ষণেই সঙ্গত উত্তর দিতেন। কিন্তু
 এখন কপালকুণ্ডলা কতক দূর গৃহরমণীর স্বভাবসম্পন্না হইয়া-
 ছিলেন, সুতরাং সহসা উত্তর করিতে পারিলেন না। ব্রাহ্মণবেশী
 কপালকুণ্ডলাকে নিরন্তর দেখিয়া গান্ধীয্যের সহিত কহিলেন,
 “কপালকুণ্ডলা! তুমি রাত্রে এ নিবিড় বনমধ্যে কি জন্য আসিয়াছ?”

অজ্ঞাত রাত্রির পুরুষের মুখে আপন নাম শুনিয়া কপালকুণ্ডলা
 অবাক হইলেন, কিছ্র ভীতাও হইলেন। সুতরাং সহসা কোন উত্তর
 তাঁহার মুখ হইতে বাহির হইল না।

ব্রাহ্মণবেশী পুনর্ব্বার জিজ্ঞাসা করিলেন, “তুমি আমাদিগের
 কথাবার্তা শুনিয়াছ?”

সহসা কপালকুণ্ডলা বাক্শক্তি পুনঃপ্রাপ্ত হইলেন। তিনি উত্তর
 না দিয়া কহিলেন, “আমিও তাহাই জিজ্ঞাসা করিতেছি। এ কানন-
 মধ্যে তোমরা দুই জনে এ নিশীথে কি কুপরাশি করিতেছিলে?”

ব্রাহ্মণবেশী কিছ্রকাল নিরন্তরে চিন্তামগ্ন হইয়া রহিলেন। যেন

কোন নূতন ইন্টারসিন্থর উপায় তাঁহার চিন্তামধ্যে আসিয়া উপস্থিত হইল। তিনি কপালকন্ডলার হস্তধারণ করিলেন এবং হস্ত ধরিয়া ভগ্ন গৃহ হইতে কিছু দূরে লইয়া যাইতে লাগিলেন। কপালকন্ডলা অতি ক্রোধে হস্ত মৃদু করিয়া লইলেন। ব্রাহ্মণবেশী অতি মৃদুস্বরে কপালকন্ডলার কাণের কাছে কহিলেন,

“চিন্তা কি? আমি পদ্রুপ নহি।”

কপালকন্ডলা আরও চমৎকৃত হইলেন এ কথায় তাঁহার কতক বিশ্বাস হইল, সম্পূর্ণ বিশ্বাসও হইল না। তিনি ব্রাহ্মণবেশধারণীর সঙ্গে সঙ্গে গেলেন। ভগ্ন গৃহ হইতে অদৃশ্য স্থানে গিয়া ব্রাহ্মণবেশী কপালকন্ডলাকে কণে কণে কহিলেন, ‘আমরা যে কপারামর্শ করিতে-ছিলাম, তাহা শুনিলে? সে তোমারই সম্বন্ধে।’

কপালকন্ডলার আগ্রহ অতিশয় বাড়িল। কহিলেন, “শুনিলে।”

ছদ্মবেশিনী বলিলেন, “তবে যতক্ষণ না প্রত্যাগমন করি, ততক্ষণ এই স্থানে প্রতীক্ষা কর।”

এই বলিয়া ছদ্মবেশিনী ভগ্ন গৃহে প্রত্যাগমন করিলেন; কপালকন্ডলা কিয়ৎক্ষণ তথায় বসিয়া রহিলেন। কিন্তু যাহা দেখিয়া-ছিলেন ও শুনিয়াছিলেন, তাহাতে তাঁহার কিছু ভয় জন্মিয়াছিল। এক্ষণে একাকিনী অন্ধকার বনমধ্যে বসিয়া থাকাতে উদ্বেগ বাড়িতে লাগিল। বিশেষ এই ছদ্মবেশী তাঁহাকে কি অভিপ্রায়ে তথায় বসাইয়া গেল, তাহা কে বলিতে পারে? হয়ত সুযোগ পাইয়া আপনার মন্দ অভিপ্রায় সিদ্ধ করিবার জন্যই বসাইয়া রাখিয়া গিয়াছে। এদিকে ব্রাহ্মণবেশীর প্রত্যাগমনে অনেক বিলম্ব হইতে লাগিল। কপালকন্ডলা আর বসিতে পারিলেন না। উঠিয়া দ্রুতপাদবিক্ষেপে গৃহাভিমুখে চলিলেন।

তখন আকাশমণ্ডল ঘনঘটায় মসীময় হইয়া আসিতে লাগিল; কাননতলে যে সামান্য আলো ছিল তাহাও অন্তর্হিত হইতে লাগিল। কপালকন্ডলা আর তিলাম্ব বিলম্ব করিতে পারিলেন না। শীঘ্রপদে কাননভাস্তুর হইতে বাহিরে আসিতে লাগিলেন। আসিবার সময়ে

যেন পশ্চাৎভাগে অপর ব্যক্তির পদক্ষেপধ্বনি শুনিতে পাইলেন। কিন্তু মুখ ফিরাইয়া অন্ধকারে কিছু দেখিতে পাইলেন না। কপালকুণ্ডলা মনে করিলেন, ব্রাহ্মণবেশী তাঁহার পশ্চাৎ আসিতেছেন। বনত্যাগ করিয়া পূর্বেবর্ণিত ক্ষুদ্র বনপথে আসিয়া বাহির হইলেন। তথায় তাদৃশ অন্ধকার নহে ; দৃষ্টিপথে মনুষ্য থাকিলে দেখা যায়। কিন্তু কিছুই দেখা গেল না। অতএব দ্রুতপদে চলিলেন। কিন্তু আবার স্পষ্ট মনুষ্যগতিশব্দ শুনিতে পাইলেন। আকাশ নীল কাদাম্বিনীতে ভীষণতর হইল। কপালকুণ্ডলা আরও দ্রুত চলিলেন। গৃহ অনতিদূরে, কিন্তু গৃহপ্রাপ্তি হইতে না হইতেই ঝটিকাবৃষ্টি ভীষণরবে প্রধোষিত হইল। কপালকুণ্ডলা দৌড়িলেন। পশ্চাতে যে আসিতেছিল, সেও যেন দৌড়িল, এমন শব্দ বোধ হইল। গৃহ দৃষ্টপথবর্ত্তী হইবার পূর্বেই প্রচণ্ড ঝটিকাবৃষ্টি কপালকুণ্ডলার মস্তকের উপর দিয়া প্রধাবিত হইল। ঘন ঘন গম্ভীর মেঘশব্দ এবং অশনিসম্পাতশব্দ হইতে লাগিল। ঘন ঘন বিদ্যুৎ চমকিতে লাগিল। মুষলধারে বৃষ্টি পড়িতে লাগিল। কপালকুণ্ডলা কোনক্রমে আত্মরক্ষা করিয়া গৃহে আসিলেন। প্রাঙ্গণভূমি পার হইয়া প্রকোষ্ঠমধ্যে উঠিলেন। দ্বার তাঁহার জন্য খোলা ছিল। দ্বার রুদ্ধ করিবার জন্য প্রাঙ্গণের দিকে সম্মুখ ফিরিলেন। বোধ হইল, যেন প্রাঙ্গণভূমিতে এক দীর্ঘকায় পুরুষ দাঁড়াইয়া আছে। এই সময়ে একবার বিদ্যুৎ চমকিল। একবার বিদ্যুতেই তাহাকে চিনিতে পারিলেন। সে সাগরতীরপ্রবাসী সেই কাপালিক।

তৃতীয় পরিচ্ছেদ : স্বপ্নে

“I had a dream, which was not all a dream.”

Byron

কপালকুণ্ডলা ধীরে ধীরে দ্বার রুদ্ধ করিলেন, ধীরে ধীরে শয়নাগারে আসিলেন, ধীরে ধীরে পালঙ্কে শয়ন করিলেন। মনুষ্য-হৃদয় অনন্ত সমুদ্র, যখন তদুপরি ক্ষিপ্ত বায়ুগণ সমর করিতে থাকে,

কে তাহার তরঙ্গমালা গণিতে পারে ? কপালকন্ডুলার হৃদয়সমুদ্রে যে তরঙ্গমালা উৎক্ষিপ্ত হইতেছিল, কে তাহা গণিবে ?

সে রাत्रে নবকুমার হৃদয়বেদনায় অশুঃপদরে আইসেন নাই । শয়নাগারে একাকিনী কপালকন্ডুলা শয়ন করিলেন, কিন্তু নিদ্রা আসিল না । প্রবলবায়ুতাড়িত বারিধারাপরিসিঞ্চিত জটাজুটবেষ্টিত সেই মৃদুমন্ডল অন্ধকার মধ্যেও চতুর্দিকে দেখিতে লাগিলেন । পূর্বা-বৃত্তান্ত সকল আলোচনা করিয়া দেখিতে লাগিলেন । কাপালিকের সহিত ষেরূপ আচরণ করিয়া তিনি চলিয়া আসিয়াছিলেন, তাহা স্মরণ হইতে লাগিল ; কাপালিক নিবিড় বনমধ্যে যে সকল পৈশাচিক কার্য্য করিতেন, তাহা স্মরণ হইতে লাগিল ; তৎকৃত ভৈরবীপূজা নবকুমারের বন্ধন, এ সকল মনে পড়িতে লাগিল । কপালকন্ডুলা শিহরিয়া উঠিলেন । অদ্যকার রাত্রের সকল ঘটনাও মনোমধ্যে আসিতে লাগিল । শ্যামার ওষধি-কামনা, নবকুমারের নিষেধ, তাহার প্রতি কপালকন্ডুলার তিরস্কার, তৎপরে অরণ্যের জ্যোৎস্নাময়ী শোভা কাননতলে অন্ধকার, সেই অরণ্যমধ্যে যে সহচর পাইয়াছিলেন, তাহার ভীমকাস্তগুণময় রূপ ; সকলই মনে পড়িতে লাগিল ।

পূর্বা দিকে উষার মৃদুকুটজ্যোতিঃ প্রকটিত হইল ; তখন কপালকন্ডুলার অঙ্গ তন্দ্রা আসিল । সেই অপ্রগাঢ় নিদ্রায় কপালকন্ডুলা স্বপ্ন দেখিতে লাগিলেন । তিনি যেন সেই পূর্বা-দৃষ্ট সাগরহৃদয়ে তরঙ্গী আরোহণ করিয়া যাইতেছিলেন । তরঙ্গী সুশোভিত ; তাহাতে বসন্ত রঙের পতাকা উড়িতেছে ; নাবিকেরা ফুলের মালা গলায় দিয়া বহিতেছে । রাধা-শ্যামের অনন্ত প্রণয়গীত করিতেছে । পশ্চিমগগন হইতে সূর্য্য স্বর্ণধারা বৃষ্টি করিতেছে । স্বর্ণধারা পাইয়া সমুদ্র হাসিতেছে ; আকাশমন্ডলে মেঘগণ সেই স্বর্ণবৃষ্টিতে ছুটাছুটি করিয়া স্নান করিতেছে । অকস্মাৎ রাত্রি হইল, সূর্য্য কোথায় গেল । স্বর্ণমেঘসকল কোথায় গেল । নিবিড়নীল কাদম্বিনী আসিয়া আকাশ ব্যাপিয়া ফেলিল । আর সমুদ্রে দিক্ নিরূপণ হয় না । নাবিকেরা তাঁর ফিরাইল । কোন্ দিকে বাহিবে, স্থিরতা পায় না । তাহারা

গীত বন্ধ করিল, গলার মালা সকল ছিঁড়িয়া ফেলিল ; বসন্ত রঙ্গের পতাকা আপনি খসিয়া জলে পড়িয়া গেল । বাতাস উঠিল ; বৃক্ষ-প্রমাণ তরঙ্গ উঠিতে লাগিল ; তরঙ্গমধ্য হইতে একজন জটাজুটধারী প্রকাণ্ডকায় পুরুষ আসিয়া কপালকুণ্ডলার নৌকা বাম হস্তে তুলিয়া সমুদ্রমধ্যে প্রেরণ করিতে উদ্যত হইল । এমন সময়ে সেই ভীমকান্ত-শ্রীময় ব্রাহ্মণবেশধারী আসিয়া তাঁর ধরিয়া রহিল । সে কপালকুণ্ডলাকে জিজ্ঞাসা করিল, “তোমায় রাখি কি নিমগ্ন করি ? অকস্মাৎ কপালকুণ্ডলার মৃত্যু হইতে বাহির হইল “নিমগ্ন কর ।” ব্রাহ্মণবেশী নৌকা ছাড়িয়া দিল । তখন নৌকাও শব্দময়ী হইল, কথা কহিয়া উঠিল । নৌকা কহিল, “আমি আর এ ভার বহিতে পারি না, আমি পাতালে প্রবেশ করি ।” ইহা কহিয়া নৌকা তাহাকে জলে নিক্ষিপ্ত করিয়া পাতালে প্রবেশ করিল ।

ঘন্মাস্তকলেবরা হইয়া কপালকুণ্ডলা স্বপ্নোখিতা হইলে চক্ষু-রুম্মীলন করিলেন ; দেখিলেন, প্রভাত হইয়াছে—গবাক্ষ মৃন্তু রহিয়াছে ; তন্মধ্য দিয়া বসন্তবায়ুস্রোতঃ প্রবেশ করিতেছে ; মন্দান্দোলিত বৃক্ষশাখায় পক্ষিগণ কুজন করিতেছে । সেই গবাক্ষের উপর কতকগুলি মনোহর বন্যলতা সুবাসিত কুসুমসহিত দুলিতেছে । কপালকুণ্ডলা নারীস্বভাববশতঃ লতাগুলি গৃহ্যইয়া লইতে লাগিলেন । তাহা সুশৃঙ্খল করিয়া বাঁধিতে বাঁধিতে তাহার মধ্য হইতে একখানি লিপি বাহির হইল । কপালকুণ্ডলা অধিকারীর ছাত্র ; পড়িতে পারিতেন । নিম্নোক্ত মত পাঠ করিলেন—

“অদ্য সন্ধ্যার পর কল্য রাত্রের ব্রাহ্মণকুমারের সহিত সাক্ষাৎ করিবা । তোমার নিজ সম্পর্কীয় নিতান্ত প্রয়োজনীয় যে কথা শুনিতে চাহিয়াছিলে, তাহা শুনিবে ।

অহং ব্রাহ্মণবেশী ।”

চতুর্থ পরিচ্ছেদ : কৃতজ্ঞতায়

“————— I will have grounds
More relative than this”.

Hamlet

কপালকুণ্ডলা সেদিন সন্ধ্যা পর্য্যন্ত অনন্যাসিত হইয়া কেবল ইহাই বিবেচনা করিতেছিলেন যে, ব্রাহ্মণবেশীর সহিত সাক্ষাৎ বিধেয় কি না । পতিব্রতা যুবতীর পক্ষে রাত্রিকালে নিজ্জনে অপরিচিত পুরুষের সহিত সাক্ষাৎ যে অবিধেয়, ইহা ভাবিয়া তাঁহার মনে সঙ্কোচ জন্মে নাই । তদ্বিষয়ে তাঁহার স্থির সিদ্ধান্তই ছিল যে, সাক্ষাতের উদ্দেশ্য দূষ্য না হইলে এমত সাক্ষাতে দোষ নাই—পুরুষে পুরুষে স্ত্রীলোকে স্ত্রীলোকে যেরূপ সাক্ষাতের অধিকার, স্ত্রী পুরুষে সাক্ষাতের উভয়েরই সেইরূপ অধিকার উচিত বলিয়া তাঁহার বোধ ছিল ; বিশেষ, ব্রাহ্মণবেশী পুরুষ কি না, তাহাতে সন্দেহ । সুতরাং সে সঙ্কোচ অনাবশ্যক, কিন্তু এ সাক্ষাতে মঙ্গল, কি অমঙ্গল জন্মিবে, তাহাই অনিশ্চিত বলিয়া কপালকুণ্ডলা এত দূর সঙ্কোচ করিতেছিলেন । প্রথমে ব্রাহ্মণবেশীর কথোপকথন, পরে কাপালিকের দর্শন, তৎপরে স্বপ্ন, এই সকল হেতুতে কপালকুণ্ডলার নিজ অমঙ্গল যে অদূরবর্তী, এমত সন্দেহ প্রবল হইয়াছিল । সেই অমঙ্গল যে কাপালিকের আগমনসহিত সম্বন্ধমিলিত, এমত সন্দেহও অমূলক বোধ হইল না । এই ব্রাহ্মণবেশীকে তাহারই সহচর বোধ হইতেছে—অতএব তাহার সহিত সাক্ষাতে এই আশঙ্কার বিষয়ীভূত অমঙ্গলে পতিতও হইতে পারেন । সে ত স্পষ্ট বলিয়াছে যে, কপালকুণ্ডলা সম্বন্ধেই পরামর্শ হইতেছিল । কিন্তু এমতও হইতে পারে যে, ইহা হইতে তন্নিরাকরণ-সূচনা হইবে । ব্রাহ্মণকুমার এক ব্যক্তির সহিত গোপনে পরামর্শ করিতেছিল, সে ব্যক্তিকে এই কাপালিক বলিয়া বোধ হয় । সেই কথোপকথনে কাহারও মৃত্যুর সংকল্প প্রকাশ পাইতেছিল ; নিতান্ত পক্ষে চিরনির্বাসন । সে

কাহার ? ব্রাহ্মণবেশী ত স্পষ্ট বলিয়াছেন যে, কপালকুণ্ডলা সম্বন্ধেই কদম্বরামর্শ হইতেছিল । তবে তাহারই মৃত্যু বা তাহারই চিরনিঃস্বাসন কল্পনা হইতেছিল । হইলই বা ! তার পর স্বপ্ন—সে স্বপ্নের তাৎপর্য কি ? স্বপ্নে ব্রাহ্মণবেশী মহাবিপত্তিকালে আসিয়া তাঁহাকে রক্ষা করিতে চাহিয়াছিলেন, কার্যেও তাহাই ফলিতেছে । ব্রাহ্মণবেশী সকল কথা ব্যক্ত করিতে চাহিতেছেন । তিনি স্বপ্নে বলিয়াছেন, “নিমগ্ন কর ।” কার্যেও কি সেইরূপ বলিবেন ? না—না—ভক্তবৎসলা ভবানী অনুরূপ করিয়া স্বপ্নে তাঁহার রক্ষাহেতু উপদেশ দিয়াছেন, ব্রাহ্মণবেশী আসিয়া তাঁহাকে উদ্ধার করিতে চাহিয়াছেন ; তাঁহার সাহায্য ত্যাগ করিলে নিমগ্ন হইবেন । অতএব কপালকুণ্ডলা তাঁহার সহিত সাক্ষাৎ করাই স্থির করিলেন । বিজ্ঞ ব্যক্তি এইরূপ সিদ্ধান্ত করিতেন কি না, তাহাতে সন্দেহ ; কিন্তু বিজ্ঞ ব্যক্তির সিদ্ধান্তের সহিত আমরাদিগের সংশ্রব নাই । কপালকুণ্ডলা বিশেষ বিজ্ঞ ছিলেন না—সদুত্তরাং বিজ্ঞের ন্যায় সিদ্ধান্ত করিলেন না । কোতুহলপরবশ রমণীর ন্যায় সিদ্ধান্ত করিলেন, ভীমকান্তরূপরীশ-দর্শনলোলূপ যুবতীর ন্যায় সিদ্ধান্ত করিলেন, নৈশবনভ্রমণবিলাসিনী সন্ন্যাসিপালিতার ন্যায় সিদ্ধান্ত করিলেন, ভবানীভক্তিভাববিমোহিতার ন্যায় সিদ্ধান্ত করিলেন, জ্বলন্ত বর্হিশিখায় পতনোন্মুখ পতঙ্গের ন্যায় সিদ্ধান্ত করিলেন ।

সন্ধ্যার পরে গৃহকর্ম কতক কতক সমাপন করিয়া কপালকুণ্ডলা পূর্ব্বমত বনাভিমুখে যাত্রা করিলেন । কপালকুণ্ডলা যাত্রাকালে শয়নাগারে প্রদীপটি উজ্জ্বল করিয়া গেলেন । তিনি যেমন কক্ষ হইতে বাহির হইলেন, অর্মানি গৃহের প্রদীপ নিবিয়া গেল ।

যাত্রাকালে কপালকুণ্ডলা এক কথা বিস্মৃত হইলেন । ব্রাহ্মণবেশী কোন স্থানে সাক্ষাৎ করিতে লিখিয়াছিলেন ? এই জন্য পুনর্ব্বার লিপিপাঠের আবশ্যক হইল । গৃহে প্রত্যাবর্তন করিয়া যে স্থানে প্রাতে লিপি রাখিয়াছিলেন, সে স্থান অব্বেষণ করিলেন, সে স্থানে লিপি পাইলেন না । স্মরণ হইল যে, কেশবন্দন সময়ে ঐ লিপি সঙ্গে

রাখিবার জন্য কবরীমধ্যে বিন্যস্ত করিয়াছিলেন । অতএব কবরীমধ্যে অঙ্গুলি দিয়া সম্বন্ধন করিলেন । অঙ্গুলিতে লিপি স্পর্শ না হওয়াতে কবরী আলুলায়িত করিলেন, তথাপি সে লিপি পাইলেন না । তখন গৃহের অন্যান্য স্থানে তত্ত্ব করিলেন । কোথাও না পাইয়া পরিশেষে পদ্ব্যবসায়স্থানেই সাক্ষাৎ সম্ভব সিদ্ধান্ত করিয়া পুনর্বার করিলেন । অনবকাশপ্রযুক্ত সে বিশাল কেশরাশি পুনর্বিব্যস্ত করিতে পারেন নাই, অতএব আজি কপালকুণ্ডলা অনুঢ়াকালের মত কেশমণ্ডলমধ্যবর্তিনী হইয়া চলিলেন ।

পঞ্চম পরিচ্ছেদ : গৃহদ্বারে

“Stand you awhile apart,

Confine yourself but in a patient list.”

Othello

যখন সন্ধ্যার প্রাক্কালে কপালকুণ্ডলা গৃহকাষ্যে ব্যাপ্তা ছিলেন, তখন লিপি কবরী-বন্ধনচ্যুত হইয়া ভূমিতলে পড়িয়া গিয়াছিল । কপালকুণ্ডলা তাহা জানিতে পারেন নাই । নবকুমার তাহা দেখিয়াছিলেন । কবরী হইতে পত্র খসিয়া পড়িল দেখিয়া নবকুমার বিস্মিত হইলেন । কপালকুণ্ডলা কাষ্যস্তরে গেলে লিপি তুলিয়া বাহিরে গিয়া পাঠ করিলেন । সে লিপি পাঠ করিয়া একই সিদ্ধান্ত সম্ভবে । “যে কথা কাল শুনিতে চাহিয়াছিল, সে কথা শুনিলে ।” সে কি ? প্রণয়-কথা ? ব্রাহ্মণবেশী মন্মথীর উপপতি ? যে ব্যক্তি পদ্ব্যবসায়ের বৃত্তান্ত অনবগত, তাহার পক্ষে দ্বিতীয় সিদ্ধান্ত সম্ভবে না ।

পতিব্রতা, স্বামীর সহগমনকালে, অথবা অন্য কারণে, যখন কেহ জীবিতে চিত্তারোহণ করিয়া চিতায় অগ্নি সংলগ্ন করে, তখন প্রথমে ধূমরাশি আসিয়া চতুর্দিক্ বেষ্টিত করে ; দৃষ্টিলোপ করে ; অন্ধকার করে ; পরে ক্রমে কাষ্ঠরাশি জ্বলিতে আরম্ভ হইলে, প্রথমে নিম্ন হইতে সর্পজিহবার ন্যায় দূরী একটি শিখা আসিয়া অঙ্গের স্থানে স্থানে দংশন

করে, পরে সশব্দে অগ্নিজ্বালা চতুর্দিক্ হইতে আসিয়া বেণ্টন করিয়া অঙ্গপ্রত্যঙ্গ ব্যাপিতে থাকে ; শেষে প্রচণ্ড রবে অগ্নিরাশি গগনমণ্ডল জ্বালাময় করিয়া মস্তক অতিক্রমপূর্ব্বক ভস্মরাশি করিয়া ফেলে ।

নবকুমারের লিপি পাঠ করিয়া সেইরূপ হইল । প্রথমে বদ্বীকিতে পারিলেন না ; পরে সংশয় পরে নিশ্চয়তা, শেষে জ্বালা । মনুষ্যহৃদয় ক্রেশাধিক্য বা সুখাধিক্য একবারে গ্রহণ করিতে পারে না, ক্রমে ক্রমে গ্রহণ করে । নবকুমারকে প্রথমে ধূমরাশি বেণ্টন করিল ; পরে বহির্হিখা হৃদয় তাপিত করিতে লাগিল ; শেষে বহির্হিরাশিতে হৃদয় ভস্মীভূত হইতে লাগিল । ইতিপূর্বেই নবকুমার দেখিয়াছিলেন যে, কপালকুণ্ডলা কোন কোন বিষয়ে তাঁহার অবাধ্য হইয়াছেন । বিশেষ কপালকুণ্ডলা তাঁহার নিষেধ সত্ত্বেও যখন যেখানে ইচ্ছা, সেখানে একাকিনী যাইতেন ; যাহার তাহার সহিত যথেষ্ট আচরণ করিতেন ; অধিকন্তু তাঁহার বাক্য হেলন করিয়া নিশীথে একাকিনী বনভ্রমণ করিতেন । আর কেহ ইহাতে সন্দেহান হইত, কিন্তু নবকুমারের হৃদয়ে কপালকুণ্ডলার প্রতি সন্দেহ উত্থাপিত হইলে চিরানিবাস্য বৃশ্চিকদংশনবৎ হইবে জানিয়া, তিনি একদিনের তরে সন্দেহকে স্থান করেন নাই । অদ্যও সন্দেহকে স্থান দিতেন না, কিন্তু অদ্য সন্দেহ নহে, প্রতীতি আসিয়া উপস্থিত হইয়াছে ।

যন্ত্রণার প্রথম বেগের শমতা হইলে নবকুমার নীরবে বসিয়া অনেকক্ষণ রোদন করিলেন । রোদন করিয়া কিছু সন্স্থির হইলেন । তখন তিনি কিংকর্তব্য সম্বন্ধে স্থিরপ্রতিজ্ঞ হইলেন । আজ তিনি কপালকুণ্ডলা যখন সম্ভ্যার সময় বনাভিমুখে যাত্রা করিবেন, তখন গোপনে তাঁহার অনুসরণ করিবেন, কপালকুণ্ডলার মহাপাপ প্রত্যক্ষীভূত করিবেন, তাহার পর এ জীবন বিসর্জন করিবেন । কপালকুণ্ডলাকে কিছু বলিবেন না, আপনার প্রাণসংহার করিবেন । না করিয়া কি কি করিবেন ?—এ জীবনের দুর্ভাগ্য ভার বহিতে তাঁহার শক্তি হইবে না ।

এই স্থির করিয়া কপালকুণ্ডলার বহির্গগমন প্রতীক্ষায় তিনি

খড়কীদ্বারের প্রতি দৃষ্টি করিয়া রহিলেন । কপালকন্ডলা বহির্গতা হইয়া কিছু দূর গেলে নবকুমারও বহির্গত হইতেছিলেন ; এমন সময়ে কপালকন্ডলা লিপির জন্য প্রত্যাবর্তন করিলেন, দেখিয়া নবকুমারও সরিয়া গেলেন । শেষে কপালকন্ডলা পুনর্বার বাহির হইয়া কিছু দূর গমন করিলে নবকুমার আবার তদনুগমনে বাহির হইতেছিলেন, এমন সময়ে দেখিলেন, দ্বারদেশ আবৃত করিয়া এক দীর্ঘাকায় পুরুষ দণ্ডায়মান রহিয়াছে ।

কে সে ব্যক্তি, কেন দাঁড়াইয়া, জানিতে নবকুমারের কিছুমাত্র ইচ্ছা হইল না । তাহার প্রতি চাহিয়াও দেখিলেন না । কেবল কপালকন্ডলার প্রতি দৃষ্টি রাখিবার জন্য ব্যস্ত । অতএব পথমুক্তির জন্য আগন্তুকের বক্ষে হস্ত দিয়া তাড়িত করিলেন ; কিন্তু তাহাকে সরাইতে পারিলেন না ।

নবকুমার কহিলেন, “কে তুমি ? দূর হও—আমার পথ ছাড় ।”

আগন্তুক কহিল, “কে আমি, তুমি কি চেন না ?”

শব্দ সমুদ্রনাদবৎ কর্ণে লাগিল । নবকুমার চাহিয়া দেখিলেন ; দেখিলেন, সে পূর্বপরিচিত জটাজুটধারী কাপালিক ।

নবকুমার চমকিয়া উঠিলেন ; কিন্তু ভীত হইলেন না । সহসা তাহার মুখ প্রফুল্ল হইল—কহিলেন,

“কপালকন্ডলা কি তোমার সহিত সাক্ষাতে যাইতেছে ?”

কাপালিক কহিল, “না ।”

জনালিতমাত্র আশার প্রদীপ তখনই নিশ্বাণ হওয়াতে নবকুমারের মুখ পূর্ববৎ মেঘময় অন্ধকারাবিষ্ট হইল । কহিলেন, “তবে তুমি পথ মুক্ত কর ।”

কাপালিক কহিল, “পথ মুক্ত করিতেছি, কিন্তু তোমার সহিত আমার কিছু কথা আছে—অগ্রে শ্রবণ কর ।”

নবকুমার কহিলেন, “তোমার সহিত আমার কি কথা ? তুমি আবার আমার প্রাণনাশের জন্য আসিয়াছ ? প্রাণ গ্রহণ কর, আমি এবার কোন ব্যাঘাত করিব না । তুমি এক্ষণে অপেক্ষা কর, আমি

আসিতেছি। কেন আমি দেবতুষ্টির জন্য শরীর না দিলাম? এক্ষণে তাহার ফলভোগ করিলাম। যে আমাকে রক্ষা করিয়াছিল, সে আমাকে নষ্ট করিল। কাপালিক! আমাকে এবার অবিশ্বাস করিও না। আমি এখনই আসিয়া তোমাকে আত্মসমর্পণ করিব।”

কাপালিক কহিল, “আমি তোমার প্রাণবধার্থ আসি নাই। ভবানীর তাহা ইচ্ছা নহে। আমি যাহা করিতে আসিয়াছি, তাহা তোমার অনুমোদিত হইবে। বাটীর ভিতরে চল, আমি যাহা বলি, তাহা শ্রবণ কর।”

নবকুমার কহিলেন, “এক্ষণে নহে। সময়ান্তরে তাহা শ্রবণ করিব, তুমি এখন অপেক্ষা কর; আমার বিশেষ প্রয়োজন—সাধন করিয়া আসিতেছি।”

কাপালিক কহিল, “বৎস! আমি সকলই অবগত আছি: তুমি সেই পাপিষ্ঠার অনুসরণ করিবে; সে যথায় যাইবে, আমি তাহা অবগত আছি। আমি তোমাকে সে স্থানে সমাভিব্যাহারে করিয়া লইয়া যাইব। যাহা দেখিতে চাহ, দেখাইব—এক্ষণে আমার কথা শ্রবণ কর। কোন ভয় করিও না।

নবকুমার কহিলেন, “আর তোমাকে আমার কোন ভয় নাই। আইস।”

এই বলিয়া নবকুমার কাপালিককে গৃহাভ্যন্তরে লইয়া গিয়া আসন দিলেন এবং স্বয়ং উপবেশন করিয়া বলিলেন, “বল।”

ষষ্ঠ পরিচ্ছেদ : পুনরালাপে

“তদচ্ছ সিদ্ধি কদরু দেবকার্যাম্।”

কুমারসম্ভব

কাপালিক আসন গ্রহণ করিয়া দূর বাহু নবকুমারকে দেখাইলেন। নবকুমার দেখিলেন, উভয় বাহু ভগ্ন।

পাঠক মহাশয়ের স্মরণ থাকিতে পারে যে, যে রাত্রি কপাল-

কুণ্ডলার সহিত নবকুমার সমুদ্রতীর হইতে পলায়ন করেন, সেই রাতে তাঁহাদিগকে অন্বেষণ করিতে করিতে কাপালিক বালিয়াড়ির শিখরচ্যুত হইয়া পড়িয়া যান। পতন কালে দুই হস্তে ভূমি ধারণ করিয়া শরীর রক্ষা করিতে চেষ্টা করিয়াছিলেন ; তাহাতে শরীর রক্ষা হইল বটে, কিন্তু দুইটি হস্ত ভাঙ্গিয়া গেল। কাপালিক এ সকল বৃত্তান্ত নবকুমারের নিকট বিবৰ্ণিত করিয়া কহিলেন, “বাহুদ্বারা নিত্যক্রিয়া সকল নিৰ্ব্বাহের কোন বিশেষ বিঘ্ন হয় না। কিন্তু ইহাতে আর কিছুমাত্র বল নাই। এমন কি, ইহার দ্বারা কাষ্ঠাহরণে কষ্ট হয়।”

পরে কহিতে লাগিলেন, “ভূপতিত হইয়াই যে আমি জানিতে পারিয়াছিলাম যে, আমার করণ্য ভগ্ন হইয়াছে, আর অঙ্গ অভগ্ন আছে এমত নহে, আমি পতনমাত্র মূর্ছিত হইয়াছিলাম। প্রথমে অবিচ্ছেদে অজ্ঞানাবস্থায় ছিলাম। পরে ক্ষণে সজ্ঞান, ক্ষণে অজ্ঞান রহিলাম। কয়দিন যে আমি এ অবস্থায় রহিলাম, তাহা বলিতে পারি না। বোধ হয়, দুই রাত্রি এক দিন হইবে। প্রভাতকালে আমার সংজ্ঞা সম্পূর্ণ-রূপে পুনরাবিভূত হইল। তাহার অব্যবহিত পূৰ্বেই আমি এক স্বপ্ন দেখিতেছিলাম। যেন ভবানী—” বলিতে বলিতে কাপালিক শরীর রোমাঞ্চিত হইল। যেন ভবানী আসিয়া আমার প্রত্যক্ষীভূত হইয়াছেন। দুইটি করিয়া আমায় তাড়না করিতেছেন ; কহিতেছেন, ‘রে দুরাচার, তোরই চিক্কাশদ্বন্দ্বি হেতু আমার পূজার এ বিঘ্ন জন্মাইয়াছে। তুই এ পর্য্যন্ত ইন্দ্রিয়লালসায় বদ্ধ হইয়া এই কুমারীর শোণিতে এত দিন আমার পূজা করিস্ নাই। অতএব এই কুমারী হইতেই তোর পূৰ্ব্বকৃত্যফল বিনষ্ট হইল। আমি তোর নিকট আর কখনও পূজা গ্রহণ করিব না।’ আমি তখন রোদন করিয়া জননীর চরণে অবলম্বিত হইলে তিনি প্রসন্ন হইয়া কহিলেন, ‘ভদ্র ! ইহার একমাত্র প্রায়শ্চিত্ত বিধান করিব। সেই কপালকুণ্ডলাকে আমার নিকট বলি দিবে। যতদিন না পার, আমার পূজা করিও না।’

“কত দিনে বা কি প্রকারে আমি আরোগ্য প্রাপ্ত হইলাম, তাহা

আমার বর্ণন করিবার প্রয়োজন নাই। কালে আরোগ্য পাইয়া দেবীর আজ্ঞা পালন করিবার চেষ্টা আরম্ভ করিলাম। দেখিলাম যে, এই বাহুবল শিশুর বলও নাই। বাহুবল ব্যতীত যত্ন সফল হইবার নহে। অতএব ইহাতে একজন সহকারী আবশ্যক হইল। কিন্তু মনুষ্যবর্গ ধর্ম্মে অপমতি—বিশেষ কলির প্রাবল্যে যখন রাজা, পাপাত্মক রাজশাসনের ভয়ে কেহই এমত কার্যে সহচর হয় না। বহু স্থানে আমি পাপীয়সীর আবাসস্থান জানিতে পারিয়াছি। কিন্তু বাহুবলের অভাব হেতু ভবানীর আজ্ঞা পালন করিতে পারি নাই। কেবল মানবসিদ্ধির জন্য তন্ত্রের বিধানানুসারে ক্রিয়াকলাপ করিয়া থাকি মাত্র। কল্য রাতে নিকটস্থ বনে হোম করিতেছিলাম, স্বচক্ষে দেখিলাম, কপালকুণ্ডলার সহিত এক ব্রাহ্মণকুমারের মিলন হইল। অদ্যও সে তাহার সাক্ষাতে যাইতেছে। দেখিতে চাও, আমার সহিত আইস, দেখাইব।

“বৎস! কপালকুণ্ডলা বধযোগ্যা—আমি ভবানীর আজ্ঞাক্রমে তাহাকে বধ করিব। সেও তোমার নিকট বিশ্বাসঘাতিনী—তোমরাও বধযোগ্যা; অতএব তুমি আমাকে সে সাহায্য প্রদান কর। এই অবিশ্বাসিনীকে ধৃত করিয়া আমার সহিত যজ্ঞস্থানে লইয়া চল। তথায় স্বহস্তে ইহাকে বলিদান কর। ইহাতে ঈশ্বরীর সমীপে যে অপরাধ করিয়াছ, তাহার মাঙ্গর্জনা হইবে; পবিত্র ক্রম অক্ষয় পুণ্য-সম্পন্ন হইবে, বিশ্বাসঘাতিনীর দণ্ড হইবে; প্রতিশোধের চরম হইবে।”

কাপালিক বাক্য সমাপ্ত করিলেন। নবকুমার কিছুই উত্তর করিলেন না। কাপালিক তাহাকে নীরব দেখিয়া কহিলেন, “বৎস! এক্ষণে যাহা দেখাইব বলিয়াছিলাম, তাহা দেখিবে চল।”

নবকুমার ঘস্মাক্তকলেবর হইয়া কাপালিকের সঙ্গে চলিলেন।

সপ্তম পরিচ্ছেদ : সপত্নীসন্তাবে

'Be at peace ; it is your sister that addresses you.

Requite Lucretia's love.'

Lucretia

কপালকন্ডলা গৃহ হইতে বহির্গতা হইয়া কাননাভ্যন্তরে প্রবেশ করিলেন। প্রথমে ভগ্নগৃহমধ্যে গেলেন। তথায় ব্রাহ্মণকে দেখিলেন। যদি দিনমান হইত, তবে দেখিতে পাইতেন যে, তাহার মুখকান্তি অত্যন্ত মলিন হইয়াছে। ব্রাহ্মণবেশী কপালকন্ডলাকে কহিলেন যে, “এখানে কাপালিক আসিতে পারে, এখানে কোন কথা অবিধি। স্থানান্তরে আইস।” বনমধ্যে একটি অল্পায়ত স্থান ছিল, তাহার চতুঃপার্শ্বে বৃক্ষরাজি ; মধ্যে পরিষ্কার ; তথা হইতে একটি পথ বাহির হইয়া গিয়াছে। ব্রাহ্মণবেশী কপালকন্ডলাকে তথায় লইয়া গেলেন। উভয়ে উপবেশন করিলে ব্রাহ্মণবেশী কহিলেন,

“প্রথমতঃ আত্মপরিচয় দিই। কত দূর আমার কথা বিশ্বাসযোগ্য, তাহা আপনি বিবেচনা করিয়া লইতে পারিবে। যখন তুমি স্বামীর সঙ্গে হিজলী প্রদেশ হইতে আসিতোছিলে, তখন পথিমধ্যে রজনীযোগে এক যবনকন্যার সহিত সাক্ষাৎ হয়। তোমার কি তাহা মনে পড়ে ?”

কপালকন্ডলা কহিলেন, “যিনি আমাকে অলংকার দিয়েছিলেন ?”

ব্রাহ্মণবেশধারিণী কহিলেন, “আমিই সেই।”

কপালকন্ডলা অত্যন্ত বিস্মিতা হইলেন। লুৎফ-উন্নিসা তাহার বিস্ময় দেখিয়া কহিলেন, “আরও বিস্ময়ের বিষয় আছে—আমি তোমার সপত্নী।”

কপালকন্ডলা চমৎকৃত হইয়া কহিলেন, “সে কি ?”

লুৎফ-উন্নিসা তখন আনন্দপূর্ব্বক আত্মপরিচয় দিতে লাগিলেন। বিবাহ, জাতিভ্রংশ স্বামী কতৃক ত্যাগ, ঢাকা, আগ্রা, জাহাঙ্গীর, মেহের-উন্নিসা, আগ্রাত্যাগ, সপ্তগ্রামে বাস, নবকুমারের সহিত সাক্ষাৎ,

নবকুমারের ব্যবহার, গত দিবস প্রদোষে ছদ্মবেশে কাননে আগমন, হেমকারীর সহিত সাক্ষাৎ, সকলই বলিলেন। এমন সময় কপাল-কুণ্ডলা জিজ্ঞাসা করিলেন,

“তুমি কি অভিপ্রায়ে আমাদিগের বাটীতে ছদ্মবেশে আসিতে বাসনা করিয়াছিলে?”

লুৎফ-উন্নিসা কহিলেন, “তোমার সহিত স্বামীর চিরবিচ্ছেদ জন্মাইবার অভিপ্রায়ে।”

কপালকুণ্ডলা চিন্তা করিতে লাগিলেন। কহিলেন, “তাহা কি প্রকারে সিদ্ধ করিতে?”

লুৎফ-উন্নিসা। আপাততঃ তোমার সতীত্বের প্রতি স্বামী সংশয় জন্মাইয়া দিতাম! কিন্তু সে কথায় আর কাজ কি, সে পথ ত্যাগ করিয়াছি। এক্ষণে তুমি যদি আমার পরামর্শমতে কাজ কর, তবে তোমা হইতে আমার কামনা সিদ্ধ হইবে—অথচ তোমার মঙ্গল সাধন হইবে।

কপালকুণ্ডলা। হোমকারীর মুখে তুমি কাহার নাম শুনিয়াছিলে?

লুৎফ। তোমারই নাম। তিনি তোমার মঙ্গল বা অমঙ্গল কামনায় হোম করেন, ইহা জানিবার জন্য প্রণাম করিয়া তাঁহার নিকট বসিলাম। বতক্ষণ না তাঁহার ক্রিয়া সম্পন্ন হইল, ততক্ষণ তথায় বসিয়া রহিলাম। হোমাস্তে তোমার নামসংযুক্ত হোমের অভিপ্রায় ছিলে জিজ্ঞাসা করিলাম। কিয়ৎক্ষণ তাঁহার সহিত কথোপকথন করিয়া জানিতে পারিলাম যে, তোমার অমঙ্গলসাধনই হোমের প্রয়োজন। আমারও সেই প্রয়োজন। ইহাও তাঁহাকে জানাইলাম। তৎক্ষণাৎ পরস্পরের সহায়তা করিতে বাধ্য হইলাম। বিশেষ পরামর্শ জন্য তিনি আমাকে ভগ্ন গৃহমধ্যে লইয়া গেলেন। তথায় আপন মনোগত ব্যক্ত করিলেন। তোমার মৃত্যুই তাঁহার অভীষ্ট। তাহাতে আমার কোন ইষ্ট নাই। আমি ইহজন্মে কেবল পাপই করিয়াছি, কিন্তু পাপের পথে আমার এত দূর অধঃপাত হয় নাই যে, আমি নিরপরাধে বালিকার মৃত্যুসাধন করি। আমি তাহাতে সম্মতি দিলাম না। এই

সময়ে তুমি তথায় উপস্থিত হইয়াছিলে। বোধ করি, কিছ্‌দ শূনিয়া থাকিবে।

কপালকুণ্ডলা। আমি ঐরূপ বিতর্কই শূনিয়াছিলাম।

লুৎফ। সে ব্যক্তি আমাকে অবোধ অজ্ঞান বিবেচনা করিয়া কিছ্‌দ উপদেশ দিতে চাহিল। শেষটা কি দাঁড়ায়, ইহা জানিয়া তোমায় উচিত সংবাদ দিব বলিয়া তোমাকে বনমধ্যে অন্তরালে রাখিয়া গেলাম।

কপালকুণ্ডলা। তারপর আর ফিরিয়া আসিলে না কেন ?

লুৎফ। তিনি অনেক কথা বলিলেন, বাহুল্যবৃত্তান্ত শূনিতে শূনিতে বিলম্ব হইল। তুমি সে ব্যক্তিকে বিশেষ জান। কে সে, অনুভব করিতে পারিতেছ ?

কপালকুণ্ডলা। আমার পূর্বপালক কাপালিক।

লুৎফ। সেই বটে। কাপালিক প্রথমে তোমাকে সমুদ্রতীরে প্রাপ্তি, তথায় প্রতিপালন, নবকুমারের আগমন, তৎসহিত তোমার পলায়ন, এ সমুদয় পরিচয় দিলেন। তোমাদের পলায়নের পর যাহা যাহা হইয়াছিল, তাহাও বিবৃত করিলেন। সে সকল বৃত্তান্ত তুমি জান না। তাহা তোমার গোচরার্থ বিস্তারিত বলিতেছি।

এই বলিয়া লুৎফ-উম্মিসা কাপালিকের শিখরচ্যুতি, হস্তভঙ্গ, স্বপ্ন, সকল বলিলেন। স্বপ্ন শূনিয়া কপালকুণ্ডলা চমকিয়া, শিহরিয়া উঠিলেন—চিন্তামধ্যে বিদ্যুচ্চঞ্চলা হইলেন। লুৎফ-উম্মিসা বলিতে লাগিলেন,

কাপালিকের দৃঢ়প্রতিজ্ঞা ভবানীর আজ্ঞা প্রতিপালন। বাহু বলহীন, এইজন্য পরের সাহায্য তাহার নিত্য প্রয়োজন। আমাকে ব্রাহ্মণতনয় বিবেচনা করিয়া সহায় করিবার প্রত্যাশায় সকল বৃত্তান্ত বলিল। আমি এ পর্য্যন্ত এ দৃষ্কর্মে স্বীকৃত হই নাই। এ দৃষ্টান্ত চিন্তের কথা বলিতে পারি না, কিন্তু ভয়সা করি যে, কখনই স্বীকৃত হইব না। বরং এ সংকল্পের প্রতিকূলতাচরণ করিব, এই অভিপ্রায় ; সেই অভিপ্রায়েই আমি তোমার সহিত সাক্ষাৎ করিলাম।

কিন্তু এ কার্য নিতান্ত অস্বাভাবিক হইয়া করি নাই। তোমার প্রাণদান দিতেছি। তুমি আমার জন্য কিছু কর।”

কপালকন্ডলা কহিলেন, “কি করিব?”

লক্ষ্মণ। আমারও প্রাণদান দাও—স্বামী ত্যাগ কর।

কপালকন্ডলা অনেকক্ষণ কথা কহিলেন না। অনেকক্ষণের পর কহিলেন, “স্বামী ত্যাগ করিয়া কোথায় যাইব?”

লক্ষ্মণ। বিদেশে—বহুদূরে—তোমাকে অট্টালিকা দিব—ধন দিব—দাস-দাসী দিব, রাণীর ন্যায় থাকিবে।

কপালকন্ডলা আবার চিন্তা করিতে লাগিলেন। পৃথিবী সর্বত্র মানসলোচনে দেখিলেন—কোথাও কাহাকে দেখিতে পাইলেন না। অন্তঃকরণমধ্যে দৃষ্টি করিয়া দেখিলেন—তথায় ত নবকুমারকে দেখিতে পাইলেন না, তবে কেন লক্ষ্মণ-উন্মিসার সন্দের পথ রোধ করিবেন? লক্ষ্মণ-উন্মিসাকে কহিলেন,

“তুমি আমার উপকার করিয়াছ কি না, তাহা আমি এখনও বুঝিতে পারিতেছি না। অট্টালিকা, ধন, সম্পত্তি, দাস-দাসীরও প্রয়োজন নাই। আমি তোমার সন্দের পথ কেন রোধ করিব? তোমার মানস সিদ্ধ হউক—কালি হইতে বিঘ্নকারিণীর কোন সংবাদ পাইবে না। আমি বনচর ছিলাম, আবার বনচর হইব।

লক্ষ্মণ-উন্মিসা চমৎকৃত হইলেন, এরূপ আশু স্বীকারের কোন প্রত্যাশা করেন নাই। মোহিত হইয়া কহিলেন, “ভগিনি! তুমি চিরায়ত্ত্বমতী হও, আমার জীবনদান করিলে। কিন্তু আমি তোমাকে অনাথা হইয়া যাইতে দিব না। কল্য প্রাতে তোমার নিকট আমার একজন বিশ্বাসযোগ্য চতুরা দাসী পাঠাইব। তাহার সঙ্গে যাইও। বর্ধমানের কোন অতিপ্রাধানা স্ত্রীলোক আমার সন্নিহিত।—তিনিই তোমার সকল প্রয়োজন সিদ্ধ করিবেন।”

লক্ষ্মণ-উন্মিসা এবং কপালকন্ডলা এরূপ মনঃসংযোগ করিয়া কথা-বার্তা কহিতেছিলেন যে, সম্মুখবিঘ্ন কিছুই দেখিতে পান নাই। যে বন্য পথ তাঁহাদিগের আশ্রয়স্থান হইতে বাহির হইয়াছিল সে পথপ্রান্তে

দাঁড়াইয়া কাপালিক ও নবকুমার তাঁহাদিগের প্রতি যে করাল দৃষ্টিপাত করিতেছিলেন, তাহা কিছুই দেখিতে পান নাই ।

নবকুমার ও কাপালিক ইহাদিগের প্রতি দৃষ্টি করিয়াছিলেন মাত্র, কিন্তু দূর্ভাগ্যবশতঃ তত দূর হইতে তাহাদিগের কথোপকথনের মধ্যে কিছুই তদুভয়ের শ্রুতিগোচর হইল না । মনুষ্যের চক্ষু কণ্ঠ যদি সমদূরগামী হইত, তবে মনুষ্যের দুঃখস্রোত শ্রুতি কি বর্ধিত হইত, তাহা কে বলিবে ? সংসাররচনা অপূর্ণ কৌশলময় ।

নবকুমার দেখিলেন, কপালকুণ্ডলা আলমুলায়িতকুমুস্তলা । যখন কপালকুণ্ডলা তাঁহার হয় নাই, তখনই সে কুমুস্তল বর্ধিত না । আবার দেখিলেন যে, সেই কুমুস্তলরাশি আসিয়া ব্রাহ্মণকুমারের পৃষ্ঠদেশে পড়িয়া তাঁহার অংসসংবলম্বী কেশদামের সহিত মিশিয়াছে । কপালকুণ্ডলার কেশরাশি ঈদৃশ আয়তনশালী এবং লঘু স্বরে কথোপকথনের প্রয়োজনে উভয়ে এরূপ সন্নিবিষ্ট হইয়া বসিয়া ছিলেন যে, লুৎফ-উল্লিসার পৃষ্ঠ পর্য্যন্ত কপালকুণ্ডলার কেশের সম্প্রসারণ হইয়াছিল । তাহা তাঁহারা দেখিতে পান নাই । দেখিয়া নবকুমার ধীরে ধীরে ভূতলে বসিয়া পড়িলেন ।

কাপালিক ইহা দেখিয়া নিজে কটিবলম্বী এক নারিকেলপাত্র বিমদ্রুস্ত করিয়া কহিল, “বৎস ! বল হারাইতেছ, এই মহৌষধ পান কর, ইহা ভবানীর প্রসাদ । পান করিয়া বল পাইবে ।”

কাপালিক নবকুমারের মুখের নিকট পাত্র ধরিল । তিনি অনামনে পান করিয়া দারুণ তৃষ্ণা নিবারণ করিলেন । নবকুমার জানিতেন না যে, এই সন্স্বাদ পেয়ে কাপালিকের স্বহস্তপ্রস্তুত প্রচণ্ড তেজস্বিনী সূরা । পান করিবামাত্র সবল হইলেন ।

এ দিকে লুৎফ-উল্লিসা পূর্ণবৎ মৃদুস্বরে কপালকুণ্ডলাকে কহিতে লাগিলেন,

“ভগিনি ! তুমি যে কাৰ্য্য করিলে, তাহার প্রতিশোধ করিবার আমার ক্ষমতা নাই ; তবু যদি আমি চিরদিন তোমার মনে থাকি, সেও আমার সুখ । যে অলঙ্কারগুলি দিয়াছিলাম, তা শুনিয়াছি,

তুমি দরিদ্রকে বিতরণ করিয়াছ। এক্ষণে নিকটে কিছই নাই। কলাকার অন্য প্রয়োজন ভাবিয়া কেশমধ্যে একটি অঙ্গুরীয় আনিয়াছিলাম, জগদীশ্বরের কৃপায় সে পাপ প্রয়োজন সিদ্ধির আবশ্যক হইল না। এই অঙ্গুরীয়টি তুমি রাখ। ইহার পরে অঙ্গুরীয় দেখিয়া শ্ববনী ভগিনীকে মনে করিও। আজ যদি স্বামী জিজ্ঞাসা করেন, অঙ্গুরীয় কোথায় পাইলে, কহিও, লুৎফ-উন্নিসা দিয়াছে।” ইহা কহিয়া লুৎফ-উন্নিসা আপন অঙ্গুলি হইতে বহুধনে ক্রীত এক অঙ্গুরীয় উন্মোচন করিয়া কপালকুণ্ডলার হস্তে দিলেন। নবকুমার তাহাও দেখিতে পাইলেন; কাপালিক তাহাকে ধরিয়াছিলেন, আবার তাহাকে কম্পমান দেখিয়া পুনরপি মদিরা সেবন করাইলেন। মদিরা নবকুমারের মস্তিস্কে প্রবেশ করিয়া তাহার প্রকৃতি সংহার করিতে লাগিল, স্নেহের অঙ্কুর পর্যন্ত উন্মূলিত করিতে লাগিল।

কপালকুণ্ডলা লুৎফ-উন্নিসার নিকট বিদায় হইয়া গৃহাভিমুখে চলিলেন। তখন নবকুমার ও কাপালিক লুৎফ-উন্নিসার অদৃশ্য পথে কপালকুণ্ডলার অনুসরণ করিতে লাগিলেন।

অষ্টম পরিচ্ছেদ : গৃহাভিমুখে

“No spectre greets me—no vain shadow this.”

Wordsworth

কপালকুণ্ডলা ধীরে ধীরে গৃহাভিমুখে চলিলেন। অতি ধীরে ধীরে মৃদু মৃদু চলিলেন। তাহার কারণ, তিনি অতি গভীর চিন্তামগ্ন হইয়া যাইতেছিলেন। লুৎফ-উন্নিসার সংবাদে কপালকুণ্ডলার একেবারে চিন্তাভাব পরিবর্তিত হইল; তিনি আত্মবিসর্জনে প্রস্তুত হইলেন। আত্মবিসর্জন কি জন্য? লুৎফ-উন্নিসার জন্য? তাহা নহে।

কপালকুণ্ডলা অন্তঃকরণ সম্বন্ধে তান্দ্রিকের সন্তান; তান্দ্রিক স্বরূপ কালিকাপ্রসাদাকাঙ্ক্ষায় পরপ্রাণ সংহারে সৎকাচন্দ্রা, কপালকুণ্ডলা সেই আকাঙ্ক্ষায় আত্মজীবন বিসর্জনে তদ্রূপ। কপালকুণ্ডলা

যে কাপালিকের ন্যায় অনন্যচিত্ত হইয়া শক্তিপ্রসাদপ্রার্থিনী হইয়াছিলেন, তাহা নহে ; তথাপি অহর্নিশ শক্তিভক্তি শ্রবণ, দর্শন ও সাধনে তাঁহার মনে কালিকান্দ্রাগ বিশিষ্ট প্রকারে জন্মিয়াছিল। ভৈরবী যে সৃষ্টিশাসনকর্ত্রী মূর্ত্তিদাত্রী, ইহা বিশেষ মতে প্রতীত হইয়াছিল। কালিকার পদজাভূমি যে নরশোণিতে প্রাবিত হয়, ইহা তাঁহার পরদুঃখ-দুঃখিত হৃদয়ে সঁহিত না, কিন্তু আর কোন কার্যে ভক্তি প্রদর্শনের চেষ্টা ছিল না। এখন সেই বিশ্বশাসনকর্ত্রী, সুখদুঃখবিধায়িনী, কৈবল্য-দায়িনী ভৈরবী স্বপ্নে তাঁহার জীবনসমর্পণ আদেশ করিয়াছেন। কেনই বা কপালকুণ্ডলা সে আদেশ পালন না করিবেন ?

তুমি আমি প্রাণত্যাগ করিতে চাহি না। রাগ করিয়া তাহা বলি। এ সংসার সুখময়। সুখের প্রত্যাশাতেই বন্ধুত্ব সংসার-মধ্যে ঘূরিতেছি—দুঃখের প্রত্যাশায় নহে। কদাচিৎ যদি আত্মকর্ম-দোষে সেই প্রত্যাশা সফলীকৃত না হয়, তবেই দুঃখ বলিয়া উচ্চ কলরব আরম্ভ করি। তবেই দুঃখ নিয়ম নহে, সিদ্ধান্ত হইল ; নিয়মের ব্যতিক্রম মাত্র। তোমার আমার সর্বত্র সুখ। সেই সুখে আমরা সংসারমধ্যে বন্ধমূল ; ছাড়িতে চাহি না। কিন্তু এ সংসার-বন্ধনে প্রণয় প্রধান রঞ্জক। কপালকুণ্ডলার সে বন্ধন ছিল না—কোন বন্ধনই ছিল না। তবে কপালকুণ্ডলাকে কে রাখে ?

যাহার বন্ধন নাই, তাহারই অপ্রতিহত বেগ। গিরিশিখর হইতে নির্ঝরিনী নামিলে, কে তাহার গতি রোধ করে ? একবার বায়ু তাড়িত হইলে কে তাহার সঞ্চার নিবারণ করে ? কপালকুণ্ডলার চিত্ত চঞ্চল হইলে কে তাহার স্থিতিস্থাপন করিবে ? নবীন করিকরভ মাতিলে কে তাহাকে শাস্ত করিবে ?

কপালকুণ্ডলা আপন চিত্তকে জিজ্ঞাসা করিলেন, “কেনই বা এ শরীর জগদীশ্বরীর চরণে সমর্পণ না করিব ? পণ্ড ভূত লইয়া কি হইবে ?” প্রশ্ন করিতেছিলেন, অথচ কোন নিশ্চিত উত্তর দিতে পারিতেছিলেন না। সংসারের অন্য কোন বন্ধন না থাকিলেও পণ্ড-ভূতের এক বন্ধন আছে।

কপালকন্ডলা অধোবদনে চলিতে লাগিলেন । যখন মনুষ্যহৃদয় কোন উৎকট ভাবে আচ্ছন্ন হয়, চিস্তার একাগ্রতায় বাহ্য সৃষ্টির প্রতি লক্ষ্য থাকে না, তখন অনৈসর্গিক পদার্থও প্রত্যক্ষীভূত বলিয়া বোধ হয় । কপালকন্ডলার সেই অবস্থা হইয়াছিল ।

যেন উন্মদ হইতে তাঁহার কণকন্ডরে এই শব্দ প্রবেশ করিল, “বৎসে ! আমি পথ দেখাইতেছি ।” কপালকন্ডলা চকিতের ন্যায় উন্মদদৃষ্টি করিলেন । দেখিলেন, যেন আকাশমন্ডলে নবনীরদানন্দিত মূর্তি ! গলবিলম্বিত নরকপালমালা হইতে শোণিতস্রুতি হইতেছে ; কটিমন্ডল বেড়িয়া নরকররাজি দুলিতেছে—বাম করে নরকপাল—অঙ্গে রুধিরধারা, ললাটে বিষমোজ্জ্বলজ্বলাবিভাসিতলোচনপ্রাস্তে বালশশী স্নশোভিত ! যেন ভৈরবী দক্ষিণ হস্ত উত্তোলন করিয়া কপালকন্ডলাকে ডাকিতেছিল ।

কপালকন্ডলা উন্মদমুখী হইয়া চলিলেন । সেই নবকাদম্বিনী-সন্নিভ রূপ আকাশমার্গে তাঁহার আগে আগে চলিল । কখনও কপালমালিনীর অবয়ব মেঘে লুক্কায়িত হয়, কখনও নয়নপথে স্পষ্ট বিকশিত হয় । কপালকন্ডলা তাঁহার প্রতি চাহিয়া চলিলেন ।

নবকুমার বা কাপালিক এ সব কিছুই দেখেন নাই । নবকুমার সুরাগরলপ্রজ্বলিতহৃদয়—কপালকন্ডলার ধীর পদক্ষেপে অসহিষ্ণু হইয়া সঙ্গীকে কহিলেন, “কাপালিক !”

কাপালিক কহিল, “কি ?”

“পানীয়ং দৌহি মে ।”

কাপালিক পুনরাপি তাঁহাকে সুরা পান করাইল ।

নবকুমার কহিলেন, “আর বিলম্ব কি ?”

কাপালিক উত্তর করিল, “আর বিলম্ব কি ?”

নবকুমার ভীম্বাদে ডাকিলেন, “কপালকন্ডলে !”

কপালকন্ডলা শূন্য চমকিতা হইলেন । ইদানীন্তন কেহ তাঁহাকে কপালকন্ডলা বলিয়া ডাকিত না । তিনি মুখ ফিরাইয়া দাঁড়াইলেন । নবকুমার ও কাপালিক তাঁহার সম্মুখে আসিলেন । কপালকন্ডলা

প্রথমে তাঁহাদিগকে চিনিতে পারিলেন না—কহিলেন,

“তোমরা কে ? যমদূত ?”

পরক্ষণেই চিনিতে পারিয়াই কহিলেন, “না না পিতা, তুমি কি আমায় বলি দিতে আসিয়াছ ?”

নবকুমার দৃঢ়মুষ্টিতে কপালকুণ্ডলার হস্তধারণ করিলেন । কাপালিক করুণার্দ্ৰ মধুময় স্বরে কহিলেন,

“বৎসে ! আমাদের সঙ্গে আইস ।” এই বলিয়া কাপালিক শ্মশানাভিমুখে পথ দেখাইয়া চলিলেন ।

কপালকুণ্ডলা আকাশে দৃষ্টি নিক্ষেপ করিলেন ; যথায় গগন-বিহারিণী ভয়ঙ্করী দেখিয়াছিলেন, সেই দিকে চাহিলেন ; দেখিলেন, রণরঞ্জিণী খল খল হাসিতেছে ; এক দীর্ঘ ত্রিশূল করে ধরিয়া কাপালিকগত পথপ্রতি সঙ্কেত করিতেছে । কপালকুণ্ডলা অদৃষ্ট-বিমূঢ়ার ন্যায় বিনা বাক্যব্যয়ে কাপালিকের অনুসরণ করিলেন । নবকুমার পদ্বৎসর দৃঢ়মুষ্টিতে তাহার হস্তধারণ করিয়া চলিলেন ।

নবম পরিচ্ছেদ : প্রেতভূমে

“বপুষা করণোজ্জ্বলেন সা নিপতন্তী পতিমপ্যপাতয়ৎ ।

ননু তৈলনিষেকবিবন্দনা সহ দীপ্তাচ্চিরুপৈতি মেদিনীম্ ॥”

রঘুবংশ

চন্দ্রমা অন্তর্মিত হইল । বিশ্বমণ্ডল অন্ধকারে পরিপূর্ণ হইল । কাপালিক যথায় আপন পূজাস্থান সংস্থাপন করিয়াছিলেন, তথায় কপালকুণ্ডলাকে লইয়া গেলেন । সে গঙ্গাতীরে এক বৃহৎ সৈকতভূমি । তাহারই সম্মুখে আরও বৃহত্তর দ্বিতীয় এক খণ্ড সিকতাময় স্থান । সেই সৈকতে শ্মশানভূমি । উভয় সৈকতমধ্যে জলোচ্ছ্বাসকালে অগ্নি জল থাকে, ভাঁটার সময়ে জল থাকে না । এক্ষণে জল ছিল না । শ্মশানভূমির যে মৃদু গঙ্গা সম্মুখীন, সেই মৃদু অতুচ্চ ; জলে অবतरণ করিতে গেলে একেবারে উচ্চ হইতে অগাধ জলে পাড়িতে হয় । তাহাতে

আবার অবিরতবায়ুতাড়িত তরঙ্গাভিঘাতে উপকূলতল ক্ষয়িত হইয়াছিল ; কখনও কখনও মৃত্তিকাখণ্ড স্থানচ্যুত হইয়া অগাধ জলে পড়িয়া যাইত । পূজাস্থানে দীপ নাই—কাষ্ঠখণ্ড মাঠে অগ্নি জ্বলিতেছিল, তদালোকে অতি অস্পষ্টদৃষ্ট শ্মশানভূমি আরও ভীষণ দেখাইতেছিল । নিকটে পূজা, হোম, বলি প্রভৃতির সমগ্র আয়োজন ছিল । বিশাল তরঙ্গিণীহৃদয় অন্ধকারে বিস্তৃত হইয়া রহিয়াছে । চৈত্র মাসের বায়ু অপ্রতিহত বেগে গঙ্গাহৃদয়ে প্রধাবিত হইতেছিল ; তাহার কারণে তরঙ্গাভিঘাতজনিত কলকল রব গগন ব্যাপ্ত করিতেছিল । শ্মশানভূমিতে শবভুক পশুগণ কল্লশকণ্ঠে ক্রিচৎ ধনি করিতেছিল ।

কপালিক নবকুমার ও কপালকুণ্ডলাকে উপযুক্ত স্থানে কদ্বাসনে উপবেশন করাইয়া তন্ত্রাদির বিধানানুসারে পূজারম্ভ করিলেন । উপযুক্ত সময়ে নবকুমারের প্রতি আদেশ করিলেন যে, কপালকুণ্ডলাকে স্নান করাইয়া আন । নবকুমার কপালকুণ্ডলার হস্ত ধারণ করিয়া শ্মশানভূমির উপর দিয়া স্নান করাইতে লইয়া চলিলেন । তাহাদিগের চরণে অস্থি ফুটিতে লাগিল । নবকুমারের পদের আঘাতে একটা জলপূর্ণ শ্মশান-কলস ভগ্ন হইয়া গেল । তাহার নিকটেই শব পড়িয়া ছিল—হতভাগার কেহ সৎকার করে নাই । দুইজনেরই তাহাতে পদস্পর্শ হইল । কপালকুণ্ডলা তাহাকে বেড়িয়া গেলেন, নবকুমার তাহাকে চরণে দলিত করিয়া গেলেন । চতুর্দিক বেড়িয়া শবমাংসভুক পশুসকল ফিরিতেছিল ; মনুষ্য দুইজনের আগমনে উচ্চকণ্ঠে রব করিতে লাগিল, কেহ আক্রমণ করিতে আসিল, কেহ বা পদশব্দ করিয়া চলিয়া গেল । কপালকুণ্ডলা দৌখলেন, নবকুমারের হস্ত কাঁপিতেছে ; কপালকুণ্ডলা স্বয়ং নিভাঁক, নিষ্কম্প ।

কপালকুণ্ডলা জিজ্ঞাসা করিলেন, “ভয় পাইতেছ ?”

নবকুমারের মদিরার মোহ ক্রমে মন্দীভূত হইয়া আসিতেছিল । অতি গম্ভীর স্বরে নবকুমার উত্তর করিলেন,

“ভয়ে, মৃন্ময়ী ? তাহা নহে ।”

কপালকুণ্ডলা জিজ্ঞাসা করিলেন, “তবে কাঁপিতেছ কেন ?”

এই প্রশ্ন কপালকুণ্ডলা যে স্বরে করিলেন, তাহা কেবল রমণী-কণ্ঠেই সম্ভবে। যখন রমণী পরদগ্ধে গলিয়া যায়, কেবল তখনই রমণীকণ্ঠে সে স্বর সম্ভবে। কে জানিত যে, আসন্ন কালে শ্মশানে কপালকুণ্ডলার কণ্ঠ হইতে এ স্বর নিগত হইবে?

নবকুমার কহিলেন, “ভয়ে নহে। কাঁদিতে পারিতেছি না, এই ক্রোধে কাঁপিতেছি।”

কপালকুণ্ডলা জিজ্ঞাসিলেন, “কাঁদিলে কেন?”

আবার সেই কণ্ঠ!

নবকুমার কহিলেন, “কাঁদিলে কেন? তুমি কি জানিলে মৃন্ময়ী! তুমি ত কখন রূপ দেখিয়া উন্মত্ত হও নাই—” বলিতে বলিতে নবকুমারের কণ্ঠস্বর যাতনায় রুদ্ধ হইয়া আসিতে লাগিল। “তুমি ত কখনও আপনার হৃৎপিণ্ড আপনি ছেদন করিয়া শ্মশানে ফেলিতে আইস নাই।” এই বলিয়া সহসা নবকুমার চীৎকার করিয়া রোদন করিতে করিতে কপালকুণ্ডলার পদতলে আছাড়িয়া পড়িলেন।

“মৃন্ময়ী!—কপালকুণ্ডলে! আমায় রক্ষা কর। এই তোমার পায়ে লুটাইতেছি—একবার বল যে, তুমি অবিশ্বাসিনী নও—একবার বল, আমি তোমায় হৃদয়ে তুলিয়া গৃহে লইয়া যাই।”

কপালকুণ্ডলা হাত ধরিয়া নবকুমারকে উঠাইলেন—মৃদু স্বরে কহিলেন, “তুমি ত জিজ্ঞাসা কর নাই!”

যখন এই কথা হইল, তখন উভয়ে একেবারে জলের ধারে আসিয়া দাঁড়াইয়াছিলেন; কপালকুণ্ডলা অগ্রে, নদীর দিকে পশ্চাৎ করিয়া-ছিলেন, তাঁহার পশ্চাতে এক পদ পরেই জল। এখন জলোচ্ছ্বাস আরম্ভ হইয়াছিল, কপালকুণ্ডলা একটা আড়ার উপর দাঁড়াইয়া-ছিলেন। তিনি উত্তর করিলেন, “তুমি ত জিজ্ঞাসা কর নাই!”

নবকুমার ক্ষিপ্তের ন্যায় কহিলেন, “চৈতন্য হারাইয়াছি, কি জিজ্ঞাসা করিব—বল—মৃন্ময়ী! বল—বল—বল—আমায় রাখ।—গৃহে চল।”

কপালকুণ্ডলা কহিলেন, “বাহা জিজ্ঞাসা করিলে, বলিব। আজি

বাহাকে দেখিয়াছ,—সে পশ্চিমাবতী । আমি অবিম্বাসিনী নহি । এ কথা স্বরূপ বলিলাম । কিন্তু আর আমি গৃহে যাইব না । ভবানীর চরণে দেহ বিসর্জন করিতে আসিয়াছি—নিশ্চিত তাহা করিব । তুমি গৃহে যাও । আমি মরিব । আমার জন্য রোদন করিও না ।”

“না—মৃন্ময়ী !—না !—” এইরূপ উচ্চ শব্দ করিয়া নবকুমার কপালকুণ্ডলাকে হৃদয়ে ধারণ করিতে বাহ্য প্রসারণ করিলেন । কপালকুণ্ডলাকে আর পাইলেন না । চৈত্রবায়ুত্যাগিত এক বিশাল তরঙ্গ আসিয়া, তীরে ষথায় কপালকুণ্ডলা দাঁড়াইয়া, তথায় তটোধোভাগে প্রহত হইল ; অমনি তটমৃত্তিকাখণ্ড কপালকুণ্ডলাসহিত ঘোর রবে নদীপ্রবাহমধ্যে ভগ্ন হইয়া পড়িল । নবকুমার তীরভঙ্গের শব্দ শুনিলেন, কপালকুণ্ডলা অন্তর্হিত হইল দেখিলেন । অমনি তৎপশ্চাৎ লক্ষ্য দিয়া জলে পড়িলেন । নবকুমার সমুদ্রগে নিতান্ত অক্ষম ছিলেন না । কিছুক্ষণ সাঁতার দিয়া কপালকুণ্ডলার অব্যবস্থা করিতে লাগিলেন । তাঁহাকে পাইলেন না, তিনিও উঠিলেন না ।

সেই অনন্ত গঙ্গাপ্রবাহমধ্যে, বসন্তবায়ুবিক্ষিপ্ত বীচিমাল্য আন্দোলিত হইতে হইতে কপালকুণ্ডলা ও নবকুমার কোথায় গেল ?
